

E lab júu^ quiá'- Dsea` Jmáang` e cajme' JUAN

*Lajíi' mi~ ná'-gui e nitiroo`jmigü'ba' e niseeng`
Dsea`Jmáang`*

¹ Jo júi'~ lati' mi~ uiim~ nisea` e sii` Júu^ do, jo e jo líng' Joo' Fidiéé'; jo cøøm` seeng` cõo'~ Fidiéé', cõ' íb` dseáng'- Fidiéé' cajo. ² Jo colim~ seeng` e Júu^ do cõo'~ Fidiéé' lajii'~ lati' mi~ uing`. ³ Jo la'eáng' cõo'~ e Júu^ dob cajméé` Fidiéé' lajalé" e sea` fí' jmigüi'; joba' lajalé" e sea` fí' jmigüi' cajméé` Fidiéé' coling~ cõo'~ e Júu^ do. ⁴ Jo la'eáng' cõo'~ e Júu^ daba' cuø` e seë`-naa' fí' jmigüi', jogui íb` cajo i líng' i Jing" quiá'- Fidiéé' i cuø` e tiing` ngáng" jaléng" dsea` jmigüi'. ⁵ Jo i Jing" quiá'- Fidiéé' do jmóo` e lijneá' lacaang` lí` n# s'ó", jogui e n# s'ó" do ja` mí' caquí'~ jm#` fa' nijmé` e niyúng` i Jing" quiá'- Fidiéé' do.

⁶⁻⁷ Jo malii~gui caliséng` jaang` dseañu" i calisí Juan i seáng` dsea` jm#; jo Fidiéé' cagúing" ír` jogui casíng`neiñ' e laco' dsea` do nini'r- júu^ quiá'- i Jing" quiá'- Fidiéé' do, jogui e laco' ninú` jogui e já'- nilíng` jaléng" dsea` lajii'~ júu^ e niguiá` dsea` do. ⁸ Jo dsu' i Juan i seáng` dsea` jm#` do ja` líiñ' dseáng'- i Jing" quiá'- Fidiéé' do, cõ' líiñ' jaang` dsea` i casíng` Fidiéé' e laco' nini'r- júu^ quiá'- i Jing" do jee~ jaléng" dsea` góor` dsea` Israel. ⁹ Jo cagüéng` i dseáng'- já'- Jing" quiá'- Fidiéé' do fí' jee~ dsea` jmigüi' e laco' nijmér` jial e niliseeng` dsea` fí' lí` jneá' jì.

10 Jo i dsea` i lling` Júu` quiá'- Fidié` do niseem`bre lajii` latí' mi` uiing`; jo nañi' fa' la'eáang` cóo` i`bre cajmée` Fidié` lajalé' e sea' fi' jmigüf, jo dsu' jaléng` dsea` jmigüi` ja` já'- calíin` júu` quiá'- dsea` do. 11 Jogui dseáng'- fi' góo`bre cagüéin` cajo, dsu' ja` ca'íng` dsea` góor` ír. 12 Jo dsu' jaléng` i` dsea` i` ca'íng` ír` jogui i` já'- calíng` júu` quiá'r-, joba' cacuø'reiñ' fi' e ca'uíin`- do jóo' Fidié`. 13 Jogui lhiñ' do jóo' Fidié` dsu' o' uii` e caliséin` fi' jmigüi` la, o'gui fa' lling` ii` quiu' ta` quiá'r- e ca'uíin` lajo, dsuco' lhiñ' do lajo uii` e 'ñiab' Fidié` cajméer` e ca'uíin`- do jóor`.

14 Jo e Júu` do ca'uíng`- dseáng'- jaang` dsea` jmigüi`, jo caliséng` jee` jneaa`aa' fi' jmigüi` la, jogui dsíng'- jmi'neáang` jneaa`aa', jogui jmang'- júu` já'- quie'. Jo mi` calicuíng`naa' e Júu` do i` lling` jóo' Fidié` i` camíng` do, joba' caline`baa' jóng` jial dseáng'- jlo`^ niiñ-, jo dsu' e jo catíin`- jii` dseáng'- 'ñia`bre e cacuø' Tiquiá'r` ír, co' dseáng'- eáam` 'néé` dsea` do quiá'r-. 15 Jo lalab cajíng'- Juan i` seáang` dsea` jmii` do cuaiñ` quiá'- dsea` do mi` cajíin`- lala:

—Jo i` lab i` dsea` i` éeng` jnea` do ie` lami` café` a lala: “Jo i` dsea` i` nijáa` cøong`guijiu laco'gui cagüéng`- jnea` fi' jmigüi` la niing`- guir eáang` laco' jnea~, dsuco' lajii` mi` nú'-gui eáang` e niliseeng` jnea`ba' e niseeiñ`.”

16 Jo co' eáam` guiúng`- dsea` do cóo` jneaa`aa', joba' cuø'r` jneaa`aa' jalé'` güea`^ quiá'r- cóo`gui jalé'gui e 'né- quí-ii' dseáng'- lalíng` e jii` ja` catíi`naa' lajo. 17 Jo la'eáang` cóo`- Moi` cacuø' Fidié` jneaa`aa' júu` quiu' ta` quiá'r-; jo dsu'

la'eáang' cōo'~ Dsea` Jmáam~ba' e nicaline~naa' jial tíí' 'neáang' Fidiée' jneaa~aa' jogui la'eáang' cōo'~ íb' cajo e liti~ júu^ quiá'- Fidiée'. 18 Jo jíí'~ jaang` dsea` jmigüí' ja` mí' cangáaiñ` dseáng'~ 'ñia' Fidiée', dsu' jíí'~ i Jōor' camáing'~ do i líng' Fidiée' cajo, jíí'~ íbing' i nicajmijnéeng` jial líng' Tiquiá'r^ Fidiée' uíí'~ e dseáng'~ cōom` seeiñ` cōo'~ dsea` do.

*Mi~ café` Juan i seáang` dsea` jmí` cuaiñ` quiá'-
Dsea` Jmáang`*

(Mt. 3:11-12; Mr. 1:7-8; Lc. 3:15-17)

19 Jo cōo` jmíí~ jaléng' i dsea` i quie' nifí' quiá'- jaléng' dsea` Israel i seeng' fí' Jerusalén casííñ` cōo` tú~ míing'~ jmidsea` quiá'r~ cōo'~ gui jaang` gáng~ dsea` levita fí' lí~ táang` i Juan i seáang` dsea` jmíí` do e cangojmingí'r` dsea` do lala:

—¿I~ dsea` lín'?

20 Jōba' cañíí' i Juan do dseáng'~ la líí' jo casíí'-reiñ' do lala:

—O' jnea~ i Dsea` Jmáang` i í' áa'na' i nisíng~ Fidiée' i nicá' nifí' quíí'na'.

21 Jo cajmingí'-tu i dsea` do i Juan do calé' catú~ jo cajííñ'~:

—Jo ¿i~ dseáng'~ líng' 'nu` jóng? ¿Su Líí' i café' cuaiñ` quiá'- Fidiée' malí'gui eáang'?

Jōba' cañíí'tu i Juan do jo cajííñ'~:

—U~, o' í' jnea~.

Jōba' calé' catú~ cajmingí'tu i dsea` do jo cajííñ'~ lala:

—¿Osi 'nu`bi i dsea` i caguíng' Fidiée' i nifé' cuaiñ` quiá'r~ i sijeeng'naa' fí' jmigüí' la?

Jōba' cañíí'tu i Juan do quiáíñ'~ do jo cajííñ'~:

—U~, o' í' jnea~ cajo.

22 Jɔba' i dseá do caléb' catú- cajmingí'r- i Juan do jɔ cajíñ'-:

—Jɔ song ɔ' lajogui, jɔba' ʒi~gui dseáng'- líng' 'nɔ' jóng? Jɔ cɔ' dseáng'- la guím' 'né- lé^naa' júu^ i~ dseáng'- líng' 'nɔ' quiá'- i dseá i casíng' jnea'^ do, jɔba' ʒe~ fó' 'nɔ' uø' e lin'?

23 Jɔba' cañí'tu i Juan do quiáiñ'- do:

—Jnea~ lín'n jaang' i fé' i cagüéng- fí' nĩ guóo' uó^ quiá, jɔ quiee- júu^ quiá' Fidiéé~ e catíng- 'nú' e fé' lala: “Nea~na' condsée' cɔɔ' fí', cɔ' tí lí~ nijáab' Fí'naa'” —lí^ lacɔ' cajíng'- Fidiéé~ fí' nĩ jì quiá'r- e cajme' Saíí^, jaang' dseá i café' cuaiñ~ quiá'- Fidiéé~ ie~ malií~gui eáang'.

24 Jɔba' i dseá i casíng' dseá fariseo fí' lí táang' i Juan i seáang' dseá jmíi do cangosiiñ~ cɔɔ' dseá do 25 jɔ cajmingí' tureiñ':

—Jɔ song ja' líng'gui' i Dseá Jmáang- i nisíng- Fidiéé~ fí' la i nicá' nifí' qui~naa' ɔ'gui Lí^ ɔ'gui i dseá i fé' cuaiñ~ quiá'- Fidiéé~, jɔba' ʒjalí' jmoo' ta~ seáang' dseá jmíi jóng?

26 Jɔba' cañí'tu i Juan do quiáiñ'- do jɔ cajíñ'-:

—Jnea~ seáan'n dseá jmíi jíi~ cɔɔ' layaang~ jmíi; jɔ dsɔ' jee~ 'nú' niseem' jaang' i ja' mí' cuíng'na'. 27 Jɔ lana tí lí~ nilicuím'ba' i dseá í, cɔ' tí lí~ ninám~bre ta~ quiá'r-. Jɔ jnea~ fí' quini~ í ja' ee' quín'n, cɔ' jì'gui cɔ' nisíi'~ nĩ' 'ñúú' lomíir- ja' quín'n.

28 Jɔ jalé' e la cangojée' fí' cɔɔ' fíi lí~ sii Betania e néé' lí^ lí' 'ngóo'~ gua Jordán, cɔ' fí' jɔb lí~ táang' i Juan i seáang' dseá jmíi do ie~ jɔ.

Jesús líiñ' i Jo'se' Jiuung~ quiá'- Fidiéé~

29 Jo mi~ cajneá~ coo`gui jmi~ lajo, i Juan do cangár~ e nijaquíéng' Jesús fí' lí' siñ'. Joba' café'r' uii~ quiá'- dsea` do, jo casí'r~ jaléng' i dsea` i teáang~ cóo'r~ do lala:

—Fing na jóø-na', dob nijáa' i líng' i Jo'se' Jiu-ung~ quiá'- Fidiéé' i íng~ jalé' dsee~ e røong' dsea` jmi~. 30 Jo i dsea` lab i éeng' jnea~ do ie~ lamí~ café'a lala: “Mi~ nisóong~ jnea~, nijáa' jaang' i niing~gui eáang' laco' jnea~, dsuco' i dsea` í' lajii' mi~ ná'gui eáang' e niliseeng' jnea`ba' e niseeiñ.”

31 Jo jii' jnea~ ja' mí' caliñi`bí' i~ dseáng'- dsea` do, jo dsu' cagá~ a fí' jmi~ la e gaseáan`n dsea` jmi~ e laco' jaléng' dsea` góo` dsea` Israel nilicuiñ` dsea` do.

32 Jo cajíng'-gui i Juan do lala cajo:

—Coo` jmi~ camó~ jnea~ Jmi~ quiá'- Fidiéé' e cajgó~ fí' ñiff~ jo cajé' fí' yú' gui~ Jesús e líng~ jaang' mee~. 33 Jo lajee' e ná'gui lajo ja' mí' ñi' jnea~ i líng' dsea` do, jo dsu' Fidiéé' i casí' quié~ e e cagaseáan`n dsea` jmi~ casí'r~ jnea~ lala: “I dsea` i nimáan' i nijgiéé' Jmi~ quié~ e fí' yú' gui~, i dsea` í'bing' i niseáng~ dsea` jmi~ cóo' Jmi~ quié~ e.”

34 Jo camób~ jnea~ mi~ cangojée' jalé' e jo, joba' dseáng'- lajam' nita~ dsii~ e Jesús líiñ' dseáng'- i jóo' Fidiéé' camíng' do.

La'uii~ dsea` i ca'uíng~ dsea` quiá'- Jesús

35 Jo mi~ cajneá~ coo`gui jmi~ lajo, i Juan i seáang' dsea` jmi~ do táaiñ` colíng~ cóo' gáang~ dseañu' i níng' dsea` quiá'r~. 36 Jo lajee' job cangár~ e cangíng' Jesús, joba' cajíñ'- casí'r~ i dsea` quiá'r~ do e fé'r' uii~ quiá'- dsea` i cangíng' do jo cajíñ':

—Fing na jóø⁻na', i dsea`ngóo' dob i líng' i Jo'se' Jiuung` quiá'- Fidiée` i íng` jalé' dsee` e røøng` dsea` jmigüí'.

³⁷ Jo dsifí' mi~ canúu⁻ i dsea` gáng⁻ do lajii~ e cajíng'- i Juan do, joba' lajmináb⁻ cangolíñ⁻ ti'leáaiñ' lacó' ngóo' Jesús. ³⁸ Jo mi~ calilí'^ Jesús e líng` ii` ngolíng⁻ caluur~, joba' dsifib' cají'r' nir~ e cajøøiñ⁻ i dsea` do jo cajmingí'- reiñ':

—¿I~ ñilíng⁻na' 'náng'na'?

Joba' cañíi' i dsea` do quiá'- Jesús jo cajíñ'-:

—Tifa', ¿jie~ fí' quií'-?

³⁹ Joba' cañíi' Jesús quiá'- i dsea` do jo casí'- reiñ':

—Má-aa' cóo'~ jnea~, jo lajob nilíñ'na'.

Jo colim~ cangolíñ⁻ cangojmiñir~ jie~ quiá'- Jesús, jo fí' job cajer' colíng~ lata~ e jmii~ jo, có' la ii~ quií' e ca'lóob⁻ ningóo' ie~ jo.

⁴⁰ Jo jaang` lajee` i dsea` gáng⁻ i canúu⁻ júu^ quiá'- Juan i seáang` dsea` jmii~ do siir` Dí' i nilíng` dsea` ngáang^l cóo'~ jaang`gui dseañu' i sii` Simón, jo íb` i cangotáang⁻ cóo'~ Jesús do. ⁴¹ Jo dsifí' lajob cangó⁻ Dí' e cango'néeiñ' i rúíñ' i sii` Simón do, jo mi~ cadséng'neiñ' do lalab casí'r⁻:

—Janú', Simón, lana nicalicuím'baa i dsea` i cajíng'- Fidiée` i nisíñ⁻ fí' jmigüí' la i sii` Dsea` Jmáang` i nicá' nifí' quií'-ii' do.

⁴² Jo dsifí' lajob i Dí' do cangojéeiñ' i rúíñ' i sii` Simón do fí' lí~ guiing~ Jesús; jo mi~ tí' lí~ cangá⁻ dsea` do quiá'- Simón lalab cajíñ'- casí'-reiñ':

—Jo 'nub` i sii` Simón, jo lin' jóo' jaang`gui i sii` Juan, jo dsu' latí' lana nilisii'^ Cefas osi Tú^ cóo'~ jmí' griego é.

Mi~ cató'- Jesús Lii~ cóo'~ Natanael

⁴³ Jō mi~ cajneá~ cōo`gui jmi~ lajō, ca'f̂ dsí' Jesús e cangó~tur fí' lí' se' Galilea, jō fí' jōb cajíng' rúíñ' cōo'~ jaang`dseañu' i sii' Lii~, jō lalab casí'~ reiñ' do:
—Má~aa' cōo'~ jnea~.

⁴⁴ Jō i Lii~ do niseeiñ` fí' cōo` fii` e sii` Betsaida, jō dseá`góo`bre nilíng' i Dí' do cōo'~gui Tú^ Simón, cō' cōob' fii` lí' seeiñ`. ⁴⁵ Jō dsifí' lajōb cangó~ Lii~ e cango'néeiñ'~ jaang`gui dseañu' i sii` Natanael, jō mi~ cajíng'neiñ' do, lala casí'~ reiñ':

—Lanab nicalicuíng`naa' i dseá` i ca'éeng` Moi' fí' ni~ jì` quiá'r~ malii~gui eáang', jōgui cajo i ca'éeng` jaléng` dseá` i café' cuaiñ~ quiá'~ Fidiée' lí' laco'gui cajme'r' fí' ni~ jì` malii~gui eáang'. Jō i dseá`íb` i sii' Jesús i seeng' fí' Nazaret i líng' jōo` Sé^.

⁴⁶ Jō mi~ canúu~ Natanael e júu^ jō, jōba' cajíñ'~ lala:

—Ja` lí'^ dsii~ e fí' Nazaret nigüi'f̂ jaang` i ni'é`guiá~ cōo'~ dseá` rúng'.

Jōba' cañíi` Lii~ quiá'~ i dseá` do jō cajíñ'~:

—Má~aa' fí' lí' guiiñ~, jō lajōba' nilicuíñ' dseá` do.

⁴⁷ Jō mi~ cangá~ Jesús e nijaquíéeng' dseá` do fí' lí' siñ', jōba' cajíñ'~ lala e café'r' uii~ quiá'~ Natanael:

—I nab dseáng'~ lajang'^ jaang` dseá` góo`naa' dseá` Israel i ja` quie' júu^ ta~ júu^.

⁴⁸ Jō mi~ canúu~ Natanael e jō, jōba' cañíir` quiá'~ Jesús jō cajming'~r~ dseá` do lala:

—Jō ¿jial nicuíñ' jnea~ jial lín'n?

Jōba' cañíi` Jesús quiáíñ'~ do jō cajíñ'~:

—Co' lajii'~ ná'~gui e nitó'~ Lii~ 'nu', jéem' nicamáng~ jnea~ 'nu' e guiin'~ uii' 'ma' güiñí'^.

⁴⁹ Jōba' cañíi`tu Natanael quiá'~ Jesús jō casí'r~ dseá` do lala:

—Tifa', 'nub` dseáng' i líng' Jóo' Fidiéé', jogui 'nub` cajo dseá` lin' dseata` dseá` féng' quiá'- jaléng' jneaa`aa', dseá` líí' dseá` Israel.

⁵⁰ Jōba' cañi'tu Jesús quiá'- i dseá` do calé` catú` jō casí'- reiñ':

—¿Su já'- lín' lana dsu' uí' e fá'a e camán` n' nua` e guin'~ uii` 'ma` güñí'!? Jō dsu' jnea` fii`-i 'nua` e nábi nimó'` jalé` e niing`-gui eáang' e tiin` jmee`e.

⁵¹ Jō lalab cajíng'~gui Jesús cajo e casí'r` lajaléiñ' do:

—Jō lalab jmitaa` óo'na' cajo e nimó`ba' jial jnéeng` fí` ñíff` fí` lí` guing` Fidiéé', jogui jial soo` jogui jgáang` jaléng'` ángeles quiá'- Fidiéé' fí` lí` sín`n, jnea` dseá` gáa'a fí` ñíff` e lín`n jaang` dseá` jmigüí`.

2

Mi` cajméé` Jesús la'uii` e quí'r` jmí`

¹ Jō mi` cangí` 'n' jmi` lajō, jō ie` jō caliseá` cōo` jmí` e cung' guó` dseá' fí' cōo` fii`jiu e sií` Caná e née' lí` se' Galilea. Jō ie` jō dob táang` Yá`, niquiá'^ Jesús, ² jō Jesús cóo'~gui i dseá` quiá'r` do líiñ' dseá` i simíng` quiá'- e jmí` e tí' do, jōba' fí' dob quijgeáiñ` cajo. ³ Jō lajee` e teáiñ'~ e jmí` do, cōob` mi` cadseá` e jmí'^ mí'^ huíng` jó'^ e jmáiñ' ta` do, jōba' niquiá'^ Jesús cajíñ'~ casí'r` dseá` do lala:

—Ngóo' cadseáb` e jmí'^ mí'^ huíng` jó'^ e jmáang` ta` do.

⁴ Jōba' cañi' Jesús quiá'- i niquiá'r` do jō cajíñ'~ casí'r` dseá` do lala:

—Nea~, ¿jali' fí' jnea` lana? Cō' lana ja` mí` catí'bi í' e nijmee` e lajii'~ ta` e si'ín`n do.

⁵ Joba' cajíng' tu níquiá' Jesús e sír' i dsea` i jmóo` ta~ jmicóo` e sínúu` do:

—Jmee` na' lajaléb' ta~ quiu' i Jesús na.

⁶ Jo ie~ jo nitée~ jñúu` tu' cóo` e lí' cóo` layaang` cuu~, jo e jo líng` ta~ e a~ jmíi` e jmáng` dsea` Israel ta~ e lacó' jmiguiúng` yaaiñ` fí' quini` Fidiée~, co' lajob qui' tñiñ` e jmóor`. Jo lacoo` e dsí' tu' cuu` do ab~jiu la cincuenta si la setenta litro jmíi`. ⁷ Jogui Jesús casí'r` jaléng' i dsea` i jmóo` ta~ e sínúu` do lala:

—Jmiróong` na' jmíi` lacoo` lacoo` e tu' na.

Joba' dsifí' lajob cajmiróong` i dsea` do dseáng` la có' e tu' do. ⁸ Jo mi~ cangí' jo, cajíng' tu Jesús casí'r` reiñ':

—Lana fñi` i 'nú' güiseáng` jiú' e nicaguiée` na' dsí' e tu' do, jo güica` na' quiá' i dsea` née' ni~ e jmíi` la.

Joba' lajob cajméeiñ` do.

⁹ Jo i dsea` i quie' nifí' quiá' e jmíi` do ca'í' bre capí' e do, jo dsu' jmí' mí' huíng` jó' nica'uíng` do, jo jíi' ja` ñir' jial ca'uíng` do lajo. Jo jíi' i dsea` jmóo` ta~ sínúu` dobing' i ñi' jial ca'uíng` jmí' mí' huíng` jó' e jmíi` do, dsuco' yaam` bre cajmiróoiñ` jmíi` e dsí' tu' do. Jo mi~ ca'í' i dsea` quie' nifí' e jmíi` e ca'uíng` jmí' mí' huíng` jó' do, joba' dsifí' lanab cató'r` i siming' i cacúng' guó' do ¹⁰ jo casí'r` reiñ':

—Lajim` dsea` cuør' la'uii~ e jmí' mí' huíng` jó' e jlo' gui, joba' mi~ tí' lí' nica'í' i dsea` simíng` do jmiguiúng` jiú' e jmí' e jlo' do, joguiba' e niguié'r` e jmí' mí' huíng` jó' e uóng` gui do quiá' i dsea` simíng` do. Jo dsu' 'nu` nica'meá'ba' e jmí' mí'

huñing` jò' e jlo'^gui do quiá'- tí li` ningóó' dséng` jmíi`.

11 Jo e la cajmée` Jesús fí' e fií` e sii` Caná e née' li` se' Galilea. Jo e lab la'uii` e quí'r` jmíi` e dsigá' dsíí' dsea` e cajméer` fí' jmigüi` la, jo lajoba' cajmijnéeiñ` jial tíí' 'gøiñ'. Jo jaléng` dsea` quiá'r` jáb'- caliñ` júu` quiá'- dsea` do.

12 Jo mi` cangí jo, Jesús cangór` fí' coo` fií` e sii` Capernaum colíng` cóo`~ niquiá'r` cóo`~gui jaléng` rúíñ` jogui cóo`~ jaléng` dsea` quiá'r` cajo; jo fí' job cajer` coo` tú` jmíi` lajo.

Mi` ca'uóøng` Jesús jaléng` dsea` i jmóo` ta` 'nii` fí' guá'-

(Mt. 21:12-13; Mr. 11:15-18; Lc. 19:45-46)

13 Jo mi` cangígui lajo, co' nijaquíem`bi e jmíi` quiá'- dsea` Israel e sii` Pascua, joba' Jesús cagüi`íir` fí' Capernaum jo cangór` fí' Jerusalén. 14 Jo mi` tí li` caguiér` fí' jo, dsifib` cangór` fí' guá'- fé' e si' fí' jo, jo fí' sigui` job cadséiñ` jaléng` dsea` i teáng` ta` 'níng` jaléng` güitá` cóo`~gui jaléng` jo'se` jogui jaléng` mee`. Jogui cangáñ` cajo jaléng` i neáng` ta` jmísiñg` cuu` e 'né` jaléng` dsea` i dsitáng` fí' e guá'- fé' do. 15 Joba' mi` tí li` cangáng` Jesús jaléng` i dsea` í, dsifí' lalab casá'r` coo` tú` 'nii` jo catáñ` 'máng` jo cóo`~ e job ca'uóøiñ` i dsea` do colíng` cóo`~ i jó` núu` i jéeiñ` do e 'niiñ`. Jogui cajím` Jesús jalé` mes` quiá'- jaléng` i dsea` i neáng` ta` jmísiñg` cuu` do, jo caguiáb` e cuu` do fí' ni` uó`. 16 Jogui lalab casí'- Jesús jaléng` i dsea` i jmóo` ta` 'níng` jaléng` mee` do jo cajíñ`:

—iUøøng`-na' jaléng` i mee` na, jo ja` jmoo`na' 'móo` fí' guá'- li` jmiféng` dsea` Tiquié`e Fidié`!

17 Jo dsifí' laj_o cadseng'⁻ dsí' i dsea` quiá'r⁻ do laj_i' e tó_o fí' ni' jì' quiá'⁻ Fidié' lî' fé' lala: "Liguím⁻ jnea~ mi' ja' jmi'gó' dsea` guá'⁻ lî' jmiféng'⁻ dsea` Tiquié'e."

18 J_oba' i dsea` Israel i quie' nifí' do cañir` quiá'⁻ Jesús j_o casí'⁻ reiñ' do lala:

—¿E~ quí'⁻ jmí~ nijmée'⁻ e laco' nilita~ dsi'naa' e cangín'⁻ fí' e cajmee'⁻ lajalé'⁻ e ná?

19 J_oba' cañí'tu Jesús quiá'⁻ i dsea` do:

—Íng'na' e guá'⁻ fé'⁻ e si' la, j_o jnea~ gui quí'⁻ baa jmí~ e nijmilíng'túu có_o'⁻ 'ní' jmí~.

20 J_oba' cañí'tu i dsea` Israel do quiá'⁻ Jesús:

—Jial lí' e laj_o, co' tuló⁻ dsí' jñá~ jii' cali'í'⁻ jnea'⁻ e calí'⁻ e guá'⁻ fé'⁻ na, j_ogui 'n_u' fó' lana e có_o'⁻ 'ní' jmí_b~ lí' nijmilíng'tu'.

21 Jo dsu' café'⁻ Jesús laj_o e éeng'⁻ 'ñia'r' có_o'⁻ ngúú' táam'bre mi~ cajíñ'⁻ cuaiñ~ quiá'⁻ e guá'⁻ fé'⁻ do. 22 Jo dsu' cartí' mi~ cangí' e cají'tu Jesús, j_o laj_ogui'ba' e cadseng'⁻ dsí' i dsea` quiá'r⁻ do laj_i' júu^ e cajíng'⁻ dsea` do ie~ j_o, ie~ lamí~ cajíñ'⁻ e có_o'⁻ 'ní' jmí_b~ nilí'r' e nijmilíng'tur e guá'⁻ fé'⁻ do. Jo j_ogui'ba' dseáng'⁻ já'⁻ calíng⁻ i dsea` quiá'⁻ Jesús do laj_i' júu^ e silí' fí' ni' jì' quiá'⁻ Fidié' có_o'⁻ gui jalé'⁻ júu^ e cajíng'⁻ dsea` do lajee' cateáaiñ' fí' jmigúí' la.

Niñib' Jesús jial líng' dsea` laj_i'ñ

23 Jo lajee' táam'bi Jesús fí' Jerusalén, lajee' jmí~ e qui'⁻ títng' dsea` Israel e jmóor' jmí~ e sií' Pascua do, j_o lajee' j_o jmigui'ab' jalé'⁻ e quí'⁻ Jesús jmí~ cajmээр' fí' quini' jaléng'⁻ i dsea` i siseáng'⁻ do ie~ j_o, j_oba' i fíim' i dsea` í' já'⁻ calíng⁻ júu^ quiá'⁻ dsea` do. 24 Jo dsu' Jesús ja' ta~ dsír' có_o'⁻ i dsea` do co' nicuíim'breiñ' do guiá'⁻ jial lííñ' do laj_i'ñ. 25 Jo co'

niñí'bre 'ñia'r' guiú- jial líng' dsea`jmigüí, joba' ja`
'neaiñ- dsea`jiéng' i nijmeá'- júu^ ír` jial í dsí' dsea`
jmigüí.

3

Mi~ casñng- Nicodemo cóo~ Jesús

¹ Jo mi~ cangí'jiu lajo, lajee` e táam`bi Jesús fi`
Jerusalén, jo ie~ jo nitáang` fi' jo jaang` dsea` Israel i`
sii` Nicodemo i` nilíng' dsea` fariseo, jo i` dsea` í` líiñ`
jaang` dsea` i` laniing- jee~ jaléng' dsea` góor` dsea`
Israel. ² Jo cóo` lajee` e uø` cangór- e cango'eer`
Jesús, jo mi~ caguiér- fi' jo lalab casí'r- dsea` do:

—Tifa', nineb~ jnea'^ røø` e Fidiéeb` dsea` casíiñ`
'nu` fi' jmigüí la e cañi'éé~ jnea'^, dsaco' jíi' jaang`
dsea` jmigüí ja` quí'r~ jmí~ fa' líng~ ee' lí~ nijmér-
e dsigá` dsí' dsea` jíi' laco' quí'~ 'nu` jmí~ e jmoo`
fing song ja` jmicoó'~ Fidiéé` quiá'r-.

³ Joba' cañi' Jesús quiáiñ'- do jo cajíñ'-:

—E laba' jmitaa^ o', e doñi' iì` dsea` i` ja`
niníng'~tu calé` catú- e ni'uíiñ- jaang` dsea` i`
'míng- la'eáang' cóo'~ Fidiéé`, joba' ja` quí'- jmí~
jóng fa' e dsea` do nicá` nifí' quiá'r-.

⁴ Joba' cajmingí~tu Nicodemo e cajmingí'r- Jesús
jo cajíñ'-:

—¿Jial quí'- jmí~ e jaang` dsea` yáa~ niquing'~tur
fi' dsí' tu' niquiá'r^ jo niníng'~tur calé` catú`?

⁵ Joba' cañi'~tu Jesús quiá'- Nicodemo jo cajíñ'-
casí'-reiñ':

—E laba' jmita~guí o' cajo, e doñi' iì` dsea` i`
ja` ngáang'~ la'eáang' cóo'~ jmí~ jogui cóo'~ Jmiguí`
quíá'- Fidiéé`, joba' ja` quí'- jmí~ fa' e nilí'r` e
Fidiéé` nicá` nifí' quiá'r-. ⁶ Co' doñi' iì` dsea` i` níng'~

quia' tiquia'^ niquia'^, joba' jii' dsea` jmigüib`
 líiñ; jo dsu' jaléng' i dsea` i liseeng` la'eáang` cóo'`
 Jmiguí` quia'` Fidiéé', joba' Jmiguí` job` jée' quia'r`.
 7 Jo ja` güidsigá` o' dsu' uíi' e fíi` i 'nu` na, e lajim`
 dsea` 'né` e niliseeng`tur e laco' ni'uíiñ` dsea`
 'míng` la'eáang` cóo'` Fidiéé'. 8 Cofa' guí` fí' la
 fí' nab` í', jo lico' nuu`baa' e ii` dsu' ja` jnéeng` e
 jóø`naa' jie` fí' ngóo' osi` jie` fí' jáa` é. Jo dseáng'`
 lajob` líi' cajo` cóo'` i dsea` i uíng` dsea` 'míng`
 la'eáang` cóo'` Jmiguí` quia'` Fidiéé', co' ja` lí' dsea`
 jóør` jial` mi` uíng` dsea` lajo.

9 Joba' cajming`tu Nicodemo cajming`r` Jesús
 calé'` catú` jo casí'r` dsea` do:

—¿Jial` cuøøng` e nilí` e fó'` na, Tifa'?

10 Joba' cañi'tu Jesús quia'` dsea` do jo cajíñ'`
 casí'` reiñ':

—¿Jaang` tifab'` líng` 'nu` quia'` dsea` Israel, jo ja`
 ngám'`bi' jalé'` e fá'a` la? 11 Jo jnea` jmitaa` o'` e
 lajii'` e neb` jnea'^, jii'` joba' fé'`naa', jogui` lajii'` e
 nuu`naa' jogui` ne'naa', lajii'` e job` júu` e guia'naa'
 jee` 'nú'; jo dsu' 'nú' ja` já'` líng`na' lajii'` júu`
 e fé'`naa' do. 12 Jo song` 'nú' ja` já'` líng`na' mi`
 fá'a` júu` cuaiñ` quia'` fí' jmigüi'` la, joba' ¿jial` já'`
 nilíng`na' jóng` mi` fá'a` cuaiñ` quia'` fí' ñifí'?

13 Jo jii'` jaang` dsea` ja` mi'` cajgóor` fí' ñifí',
 co' dseáng'` lajii'` 'ñiá'`baa` dsea` gáa'a` fí' jo; jo
 cagüén`n` fí' jmigüi'` la e lín'n` jaang` dsea` jmigüi'`.

14 Jo lí'^ laco' cajmée` Moi` ie` lamí` cajmeaaiñ`
 jaang` mi'` cóo'` layaang` ñi'` jo cateaaiñ` fí' yá'^ cóo`
 'ma', jogui` dseáng'` lajob` 'né` nidsing`ing` jnea`
 cajo, jnea` dsea` gáa'a` fí' ñifí' e lín'n` jaang` dsea`
 jmigüi', co' niteáng` dsea` jnea` fí' cóo` dse'` 'ma`

cajo¹⁵ e laco' doñí' ii dsea` i ja' nilíng` júu^ quié` e quí' jmi~ e niliseeiñ` cøøng` cóo~ Fidié` lata`.

Dsíg'` 'neáang` Fidié` jaléng` dsea` jmiçüü'

¹⁶ 'Jo co' eáam' 'neáang` Fidié` jaléng` dsea` jmiçüü', joba' cacuóøiñ` i Jóor' camíng` do e laco' cajúng` dsea` do cuaiñ` quiá' jaléng` dsea` jmiçüü'; jo lajoba' jaléng` dsea` i jáng` yaang` fí jaguó` dsea` do ja quí' jmi~ fa' e ni'náañ` quiá' Fidié`, co' cøøm` niliseeiñ` cóo~ dsea` do lata`. ¹⁷ Dsaco' Fidié` ja` casíñ` i Jóor' do fí jmiçüü' la e laco' ni'í` dsea` do í' e nidsilíng` dsea` fí lí` 'lí'^, co' casíñ` dsea` do fí la e lí'^ laco' nileáañ` dsea` jee` jalé' dsee` quiá'-biñ'.

¹⁸ 'Jo doñí' ii dsea` i jáng` 'ñia' fí jaguó` i Jóo' Fidié` do, joba' i dsea` í ja` ni'íñ` iihuí' uii` quiá' jalé' dsee` quiá'r` mi~ nití` í' lajo; jo dsu' i dsea` i ja` jáng` 'ñia' fí jaguó` i Jóo' Fidié` do, joba' i dsea` í ni'ím` bre iihuí' uii` quiá' jalé' dsee` quiá'r`, co' ja` mí cajáng` 'ñia'r' fí jaguó` i Jóo' Fidié` camíng` do. ¹⁹ Joba' lajaléng` dsea` i ja` jáng` yaang` fí jaguó` Fidié`, nibíñ` fí lí` 'lí'^ uii~ e eáang` gui catí dsír' e cajméer` jalé' e ja` dseeng`; co' ie~ mí cagüéng` fí jmiçüü' la i Jíng` quiá' Fidié` do, ja` calijí~ jaléng` dsea` i dsea` í, co' e lí` nua` só' dob cajmeáang` gui quiá'r` e laco' gui i Jíng` quiá' Fidié` do é. ²⁰ Jo jaléng` dsea` i jmóo` jmang` e 'lí'^ 'ní' ním` bre i Jíng` quiá' Fidié` do, jo jíí~ capí' ja` iñ~ nidsiquiéeiñ` fí cáang` dsea` do, co' ja` iñ~ e nilí'í'^ dsea` jmiçüü' jalé' e 'lí'^ e jmóor` do. ²¹ Jogui dsu' jaléng` i dsea` i seeng` cøøng` cóo~ júu^ quiá' Fidié` laco' catíng`, joba' tib' dsír' e dsiquiéeiñ` fí quini` i Jíng` quiá' Fidié` do e laco' cuø` lí` quiá'r`

e jaléb' e jmóor` do cóøm` røø` laco'gui jii~ e iing~ Fidiée` e nilî.

Mi~ café'tu Juan i seáang` dsea` jmii` do cuaiñ~ quiá'- Jesús

²² Jo mi~ cangí'guijiu lajo, cangób-tu Jesús colíng~ cóo'~ jaléng' dsea` quiá'r- fí' lí' se' Judea, jo fí' job cajer' huóøm`jiu e seáaiñ` jmii` jaléng' dsea` i guilíng- fí' do. ²³ Jo ie~ job cajo i Juan do táaiñ` ta~ seáang` dsea` jmii` fí' quiá'- coo` fii` lí' sii` Enón ca' lí' née' coo` fii` e sii` Salim, co' fí' job lí' sea` jmii` jmiguiúung, jogui fíim' dsea` dsilíiñ- fí' jo e sáaiñ` jmii`. ²⁴ Jo jalé' e la calí- lajee` nú'-gui e nitáaiñ' i Juan do fí' dsí' 'nuñí'.

²⁵ Jo i líng~ i dsea` i ngí' cóo'~ i Juan do canaiñ` jiiñ` cóo'~ jaang`gui dsea` Israel cuaiñ~ quiá'- jalé' e quiá'- tiiñ` jmóor` e laco' liguiúíñ- fí' quini` Fidiée`. ²⁶ Joba' cangolíim`bre e cangosí'r~ i Juan do, jo lalab casí'r- dsea` do:

—Tifa', i dsea` i lamí` táang` cóo'~ 'nu` lí' lí' ngóol` gua` Jordán do i ca'eeng- 'nu` do jogui i nicafée'~ uii~ quiá'- do, lana dsea` í` dob nitáaiñ` seáaiñ` dsea` jmii`, jo fíng`gui dsea` nidsiquí'r` ír` laco'gui 'nu`.

²⁷ Joba' lalab cañí' Juan quiá'- i dsea` do:

—Lajim` dsea` lí'r` jalé' e sea` quiá'r- dsu' uíi~ e Fidiée`bing' i jmicóo'~ quiá'r- e lí'r` jalé' e jo. ²⁸ Jo 'náb' dsea` nicanáa-na' røø` mi~ café'a e o' jnea` Dsea` Jmáang-, co' jnea` lín'n jaang` i casíng` Fidiée` i caguéng- jéeng`gui laco' dsea` do e laco' cagaguaiaa- guiá- fí' quiá'- dsea` do. ²⁹ Cofa' coo` lí' cung' guó` dsea`, jo i siming' do í'bing' i jée' quiá'- i simí' i cacúng'- guó` cóo'r~ do, jogui i dsea` i ngóo' caluu` i siming' do eám' lí'iaang` dsír' mi~ núur` e

síiñ' do. Jøgui dseáng'- lajob lí' quié- jnea~ lana, cø' dseáng'- eáam' íáang` dsii- mi~ núu'u lajo. ³⁰ Jø dsea` do eáang'gui ngóo' líniiñ-, jø dsu' jnea~ lí' lí ngóo' lí'uóng-guáí.

Dsea` i jaa' fi' ñifi-

³¹ Jø lalab cajíng'-gui Juan:

—Jø i dsea` i jaa' fi' ñifi- niing-guir jee~ jaléng' dsea` jmigüi; jogui i dsea` i líng' dsea` jmigüi, jmang'- júu^ quiá'- fi' jmigüi'ba' quier'. Jø i dsea` i jaa' fi' ñifi- do, niing-guir jee~ jaléng' dsea` jmigüi'.

³² Jø íb` dsea` i fé' quiá'- lajii~ e nicangár- jogui lajii~ e nicanúur- fi' lí' guíng- Tiquiá'r' fi' ñifi-, jø dsu' jii~ jaang` dsea` ja` jí'r~ lajii~ júu^ e fé' dsea` do. ³³ Jø dsu' doñi' ii` dsea` i já'- líng' júu^ quiá'- dsea` do, joba' tí' nir~ e jmang'- júu^ já'-ba' fé' Fidié'.

³⁴ Jø i dsea` i nicasing' Fidié' fi' jmigüi' la, jmang'- júu^ quiá'- dsea` í'ba' fé'r, dsucø' Fidié'bing' i cuø' dsea` do lalíng' Jmiguí quiá'r-.

³⁵ Jø Fidié' eáam' 'neáaiñ` i Jøor' camíng'- do, jogui cacuø'r' dsea` do e óoiñ' ta~ e ninéé niñ' lajalé' e sea` fi' jmigüi'. ³⁶ Jø doñi' ii` dsea` i jáng' yaang~ fi' jaguó` i Jøo' Fidié' do, joba' niliseeiñ` cøøng` cøo'~ dsea` do lata~; jø dsu' i dsea` i ja` iing~ jáng' yaang~ fi' jaguó` i Jøo' Fidié' do, joba' ja' qui'-

jmii~ fa' e niliseeiñ` cøøng` cøo'~ Fidié' lata~, cø' lí' lí latab~ niñiñ` ihuáí eáang' e cuø' Fidié' jaléng' i dsea` la'í.

4

Mi~ cangíng' Jesús fi' lí' se' Samaria

¹ Jø mi~ cangíng'gui lajo, lajee~ e táam'bi Jesús fi' lí' se' Judea, calilí' jaléng' dsea` Israel i líng' dsea`

fariseo e fñing'gui dsea` nidsiqui' quiá'- Jesús e sáaiñ` jmiñ` laco'gui i dsea` i dsiqui' Juan i seáng` dsea` jmiñ` do. ² Jo dsu' e já'-, o' dseáng'- Jesús dsea` i seáng` dsea` jmiñ` do, co' dsea` quiá'- bre i jmoo` ta~ lajo e júu` sinú'r^ quiá'- dsea` do. ³ Joba' mi~ caliñi' Jesús lajii~ e í dsí' i dsea` Israel i lñing' dsea` fariseo do uii~ quiá'r-, joba' cagüi'ñ bre coling~ cóo'~ dsea` quiá'r- fí li~ se' Judea, jo cangolíng-tur fí li~ se' Galilea.

⁴ Jo dseáng'- la guím` 'né- ngüñ- fí li~ se' Samaria lajee` e teáaiñ~ fí e ngoliñ` fí li~ se' Galilea. ⁵ Jo lajob caguiliñ- fí coo` fñ e née dsí' li~ se' Samaria li~ siñ Sicar, fí quiá'- li~ röö` guoo'~ uo~ quiá'- 'li~ yuu~ Jacoo^ e cangüñ fí jaguó` i jóor' i siñ Sé^ do lajii~ mali'. ⁶ Jo fí job li~ lí coo` too` e a' eáang' li~ níng'~ jmiñ, jo fí job li~ calí- ojmi^ quiá'- 'li~ yuu~ Jacoo^. Jo nijaquiéeng' guieñb'- mi~ caguié- Jesús coling~ cóo'~ dsea` quiá'r- e fí ojmi^ do, jo fí job cajmi'íng' dsea` do co' eám' nifñiñ' e ngir', jo dob caguár` cáang` e too` a~ jmiñ` do. ⁷⁻⁸ Jo lajee` jo i dsea` quiá'r- do cangoliñ^ e cangoleáar` jalé' e nidó'r- e fí fñ Sicar do. Jo e fí ojmi^ dob cajé Jesús 'ñia'r' lajee` jo, jo co'ná^ lajob caguié- jaang` dseamî i seeng` fí li~ se' Samaria e fí ojmi^ do, joba' lalab casi'- Jesús i dseamî do:

—¿Já^ cuó'ñia' jnea~ jmiñ` dúu~u?

⁹ Jo co' jaléng' dsea` Israel dseáng'- ja` røø` seem`bre cóo'~ jaléng' dsea` i seeng` fí li~ se' Samaria, joba' i dseamî do cañir' quiá'- Jesús lala:

—¿Jial cuóøng` fo^ lajo? Co' jaang` dsea` Israel lñing` 'nu', jo ja` litñing` 'nú' fa' lñing~ ee` mñi~na' jnea'^, dsea` lí'naa' dsea` Samaria.

10 Jōba' cañíi'tu Jesús quiá'- i dseam̃f do:

—Facō' jīũ ñí' 'nū' jalé' e guíá' e iing̃ Fidiéé' e cuø'r- 'nū', jogui facō' ñí' cajo ĩ jnea~ dsea` i m̃í' i 'nū' jm̃i, jōba' facō' lajō, 'nūb` dsea` cat̃iñ' e nim̃í'~ jnea~ jm̃i jóng, jōba' jneab~ nicuøø^ø 'nū' e jm̃i` cōo'~ e cuø' e seeng` dsea` lata~.

11 Jōba' cañíi' i dseam̃f do quiá'- Jesús jō casí'r- dsea` do lala:

—Fíi'i, j̃i' cōo' ja` quié' 'nū' cōo'~ e niguí' j̃m̃i fí dsí' e too` la, jō dsíng' a'. Jōba' ¿e~ cōo'~ niqúin' e jm̃i e fó' e nicuøø'^ jnea~ do? 12 Jō 'lī~ yáu' quí-ii' Jacóo^ caséer' e ojm̃í' la quí-ii', cō' fí lab lí cacár- jm̃i e jm̃áiñ' ta~ cajo, jogui lajōbi jaléng' jōor' cōo'~ guí jaléng' jō' núu^ i ca'eáaiñ', fí lab lí ca'uø'r' jm̃i e ca'íng' neiñ' do. Jō ¿su 'nū' í o' e niing- guí' laco' i dsea` í?

13 Jōba' cañíi'tu Jesús quiá'- i dseam̃f do jō ca- j̃iñ'-:

—Jaléng' dsea` i í' jm̃i e uøø` dsí' e too` la niguiáb'tu jm̃ijm̃iñ- calé' catú-; 14 jō dsu' i dsea' guí i ni'í' e jm̃i e nicuøø^øre do, jōba' jō tōo` jm̃i fa' e niguiá' guí jm̃ijm̃iñ-. Dsuo' e jm̃i jō lí lafa' e contøøm- sea` jm̃i fí dsí' tu'r' cōo'~ e cuø' e seeiñ, jō e jō lí' e contøøm- seeiñ cøøng` cōo'~ Fidiéé' lata~.

15 Jōba' cañíi'tu i dseam̃f do quiá'- Jesús jō casí'r- dsea` do lala:

—Fíi'i, iim~baa nicuøø'^ jnea~ e jm̃i e fó' na e laco' jō` niguiá' guí jm̃ijm̃iñ- o' guí 'né' guí fa' e gáa' a tí' la e gaquiee^ jm̃i.

16 Jōba' cajíng'- Jesús casí'r- i dseam̃f do:

—Guøng' cateá' jō güitee- dseañu' quíi'- jō ñilíng-tu' fí' la.

17 J̄oba' cañíi' i dseamî do quiá'- Jesús:

—Ja` cóo'~o dseáng'- dseañu" quié-e.

J̄oba' cañíi'tu Jesús quiá'- dsea` do:

—Jáb'- laco' cafée'~ na, dseamî, e o' dseáng'- dseañu" quií'- i cóo'~ lana; 18 dsuco' lamî~ jéeng'gui 'ñíing-gui dseañu" i nicacúng'- guóo' cóo'~, j̄oba' i dseañu" i cóo'~ na lana ja` líiñ' dseáng'- dseañu" quií'-.

19 J̄o mi~ tí li~ canúu- i dseamî do e cajíng'- Jesús e júu^ j̄o, j̄oba' cañíir` quiá'- dsea` do lala:

—Fíi'i, lanab calilí'^i e 'nu` lin' jaang` dsea` i fé' cuaiñ` quiá'- Fidiée'. 20 J̄o jaléng' 'lii~ yúu'~ quií-ii', dsea` Samaria, quií'- tñiñ` e jmiféiñ' Fidiée' fí ni` e mó' la, j̄o dsu' jaléng'gui 'nú', dsea` Israel, fól'na' e j̄úí'~ fí Jerusalén li~ 'né- e nijmiféng'naa' Fidiée'.

21 J̄oba' cañíi'tu Jesús quiá'- i dseamî do j̄o casí'-reiñ':

—Já'- güilín" júu^ quié-e, dseamî, e nijaquíém' e nití- í" e 'nú" nililí'^na' e ja` 'né- nigüilíng-na' fí' e yú'^ mó' na e güijmiféng'na' Tiquí'ii' Fidiée', o'gui 'né- fa' e nigüilíng-na' cartí Jerusalén cajo e laco' güijmiféng'na' dsea` do. 22 Co' 'nú', jaléng' dsea` Samaria, j̄úí'~ ja` cúing'na' i~ i jmiféng'na' do; j̄o dsu' jaléng' jnea'^, dsea` lí'naa' dsea` Israel, nicuímbaa' i~ i 'né- jmiféng'naa' do, co' jee~ jnea'^, dsea` lí'ñ' dsea` Israel, j̄ob li~ cagúing' Fidiée' jaang` i nileáng- dsea` jee~ jalé' dsee- quiá'r-. 23 J̄o catb'e í" j̄o, j̄o dseáng'- lanab liy, e jaléng' dsea` i dseáng'- lajang'- júu^ i jmiféng' Tiquí'ii' Fidiée' 'né- nijmér- dseáng'- laco' sí'í^ la'eáang' cóo'~ Jmiguí quiá'- dsea` do, dsuco' dseáng'- laj̄ob iing~ Tiquí'ii' Fidiée' e nijmé- jaléng' dsea` i jmiféng' ír'. 24 Dsuco'

Fidiéẽ lãĩĩ' Jmiguĩ, joba' jaléng' dsea` i jmiféng' ír, 'né- nijmér- lajõ la'eáang' cóo' Jmiguĩ quiáb'- dsea` do dseáng'- laco' sí'í.

25 Joba' cañi'tu i dseamf do quiá'- Jesús jõ ca-jíĩ'-:

—Niñib` jnea~ e tí lĩ~ nijáab' i cajíng'- Fidiéẽ i nisíĩ- do i lĩng' Dsea` Jmáang- i nicá` nifí' quí-ii', joba' mi~ tí lĩ~ nigüéeng- dsea` do fí' la, íguib dsea` i ni'é'- jnea^ jalé' e jõ.

26 Joba' cañi'tu Jesús quiáiĩ'- do jõ cajíĩ'-:

—Dsea` íbi jnea~ i sing' sĩng' cóo' 'nú' lana.

27 Jõ lajee~ gui'nang' fé' Jesús e job, mi~ caguilíng` i dsea` quiá'r- do i cangolíng` e cangoleáa` e nidø'r-, jõ mi~ cangáiĩ- Jesús e táang` dsea` do siiiĩ` cóo' jaang` dseamf, joba' eám' cangogá` dsíir' mi~ cangár- lajõ. Jõ dsu' júi' jaang` dsea` do ja` cateá- dsíir' fa' ee` nijming'f'r- Jesús uii~ quiá'- i dseamf i sing' do, õsi e~ quiá'- e siiiĩ' do é. 28 Jõ ngí jõ, jõ dob caséé' i dseamf do e dsuu- quiá'r- do e lí~ sí'í niguié'r' jmii do, jõ caquim'- tur fí' jee~ fiĩ; jõ mi~ caguiéiĩ'- fí' jõ, canaaiĩ' guiar' júu^ jee~ jaléng' dsea` góor` jõ sí'reiĩ' lala:

29 —Má-aa', jõ majmicuíng`naa' jaang` dseañu' i nicamán- n i nicajmea' jnea~ júu^ quiá'- jalé'ba' e nicajmé- e jéeng'gui, jõ jangám- íb' i dsea` i cajíng'- Fidiéẽ i nisíĩ- fí' jmigü' la i lĩng' Dsea` Jmáang- i nicá` nifí' quí-ii'.

30 Jõ mi~ canúu- i dsea` góor` do e júu^ jõ, dsifib' ca'uøøiĩ' fí' jee~ fiĩ colĩng` cóo' i dseamf do jõ cangolíĩ^ fí' lĩ táang` Jesús. 31 Jõ dsu' lajee~ ná' gui e niguilíĩ'- do fí' lĩ táang` Jesús, i dsea` quiá'- Jesús do casí'r- dsea` do jõ cajíĩ'-:

—¿Já^ cø^'jiu' í^, Tifa'?

³² Jøba' dsea` do cañír` lala:

—Seab` cøø` e jié`gui e 'né- nidøø`ø e jii~ 'nú' ja` ñí^na' jial lí'.

³³ Jø mi~ tí lí canúu- i dsea` quiá'r- do e jø, jøba' canaaíñ` sñiñ` lajee` la'ó' yaaiñ~ jø jmingí'~ rúíñ':

—Jangám- song líng~ ii` nijaca~ e nicagø'r'.

³⁴ Jøba' cañí` Jesús quiá'- i dsea` quiá'r- do jø casí'-reiñ':

—'Né- nijmee~ e lajii~ e iing~ i dsea` i casíng` jnea~ do, jøgui e nijmité'e lajii~ ta~ e cangín`n quiá'- dsea` do, jøba' e jøb e lí' lafa' mi~ gø'ø ii- e lítaan`n guiá^'. ³⁵ Jø dsu' 'nú' fó'na' lala: "'Né- bi quiúung- gui si' e nicuø- lajii~ e cangojneá` do"; jø dsu' jnea~ gui fñ- i 'nú' e 'né- cá^na' cuente e lajii~ e sijnea` do nicalineáang~, jøba' nicuø` lí` jóng e nicatíb` í' e nisitíng'. ³⁶ Dsøco' i dsea` i jmóo` ta~ e sitíng` lajii~ e roo` do, jøba' ím`bre lajii~ e catíiñ- quiá'- e ta~ e jmóor` do. Cø' jalé' e roo` e sitíiñ' do lí' lacø' jaléng` dsea` i liseeng` cøøng` cøø'~ Fidiéé` lata~. Jø cø' lajòb lí', jøba' i dsea` i jni` do cøø'`gui i dsea` i sitíng` do, røøb` nili'íáang` dsíir' laji` tú- íiñ' do mi~ caroo` e cajnír` do. ³⁷ Cø' e jáb'- dseáng'- lajii~ e júu^ róø` e fé' lala, "I jjiém' i dsea` i jni` do, jøgui i jjiém' bi i nisití' mi~ niró'." ³⁸ Jø jneab~ dsea` casín`n 'nú' e caguisitíng`na' lajii~ e caroo` do e jii~ 'nú' ja` caquié`na' ta~ quiá'- jial cangojneá~ jalé' e jø, cø' i jjiém' i dsea` i cajmée` ta~ jø, jøgui 'núb' dsea` i nicali'øøng` lajii~ ta~ e cajmée` i dsea` í'.

³⁹ Jø i fñm' dsea` i seeng` e fñ` Sicar do jáb'- calíiñ- júu^ quiá'- Jesús la'eáang` cøø'~ júu^ e cajmée` i dseamí do ie~ mi~ cajíñ'- lala: "I

dseañu" do nicajmea'bre jnea~ júu^ quiá'- jalé'ba' e nicajmé-e jéeng'gui." ⁴⁰ Jo mi~ tí' lí' caguilíng- i dsea' góo' i dseamî samaritana do fí' lí' táang` Jesús, joba' camir' jmi'ee' fa' nijé'-bi dsea' do cóo' ír'. Joba' lajob cajmée` dsea' do, caje'bre cóoiñ'- do lajee' tú- jmi~, ⁴¹ jo i fím'bi i dsea' í' cajáng' yaaiñ~ fí' jaguó' Jesús mi' canúur- lajii'~ júu^ e fé' dsea' do. ⁴² Jo lalab casí'- i dsea' do i dseamî dsea' góor' do:

—Jo lana dseáng'- lajang'^ júu^ nijá'- lí'naa' júu^ quiá'- i dsea' na, co' dseáng'- nicanú'baa' yee~naa' jial lí' júu^ quiá'r-, jo o' jii'~ e júu^ e cajmée' 'na jnea'^ do. Joba' nine~baa' jogui nita~bi dsi'naa' cajo e dsea' íb' i láang` dsea' jmi'güi' jee~ jalé' dsee- quiáiñ'^.

Mi~ cajmi'leáng- Jesús jaang` siming` jiuung~

⁴³ Jo mi~ cangî e tú- jmi~ e caje' Jesús cóo' i dsea' do, cagüi'íbre e fí' guóo'~ uó- lí' se' Samaria do jo ca'íb-tur fí' e ngóor' fí' lí' se' Galilea. ⁴⁴ Dsuo' lí'^ laco'gui jii'~ júu^ e tting` Jesús, e jii'~ jaang` dsea' i fé' cuaiñ~ quiá'- Fidiée' fa' jmi'gó' dsea' góor' ír'. ⁴⁵ Jo dsu' mi~ caguíeng'- Jesús fí' góor' fí' lí' se' Galilea, jalém' i dsea' i seeng` fí' jo guiúb- ca'íñ' dsea' do, co' jaléng' i dsea' í' cangolímbre fí' Jerusalén e catí' jmi~ Pascua, jogui cangá-bre jalé' e quí'~ jmi~ e cajmée` Jesús ie~ jo.

⁴⁶ Jo lajee' jo caquim'-tu Jesús fí' e fi' e sii' Caná do e née' lí' se' Galilea e fí' lí' cajméer' e ca'uíng- jmi'^ mí'^ huíng` jó'^ e jmi' do. Jo fí' job niseeng` jaang` dsea' nu'luu~ quiá'- jaang` dseata~ dsea' féng', jo dsea' í' niseeng` jaang` siming` jiuung~ quiá'r- i niráang` dsée'~ fí' e fi' e sii' Capernaum. ⁴⁷ Joba' mi~ tí' lí' caliñi' dsea' do e nitáang` Jesús e

fi' fi# jo e jaiñ' fi' li~ se' Judea, joba' cangó-bre fi' li~ táang` dsea` do, jo camí'r` dsea` do jmi'ee' fa' e nidséiñ' do fi' quiá'r` e nidsijmi'leáaiñ` i siming` jiuung` quiá'r` do, co' ráaiñ' do e tí' li~ nijúum`-bre.
 48 Joba' cañí' Jesús quiá' i dsea` do jo cajíñ':

—'Nú' ja` já' nilím`bi' fíng song ja` nimó`na' jalé' li~ e quí' i jmi# jmóo`.

49 Joba' cañí'tu i dsea` nu'luu~ do quiá'- Jesús jo casí'r` dsea` do:

—Fí'i, fa' jgiée` o' e guó`ba' lajminá` fi' quié` e nú' gui e nijúung` i jiuung` quié` e do.

50 Joba' lalab cañí' Jesús quiá' i dseañu' do jo casí'-reiñ':

—Quíng`tu fi' quí', co' nica'láam` jóo`.

Joba' lajob cajmée` i dseañu' do, caquim`-tur fi' quiá'r`, co' jáb' calíñ` lají~ júu` e casí' Jesús ír`.
 51 Jo lajee` iuuiñ` fi' e ngaiñ' fi' quiá'-bre mi~ cajíñ' guiá' fi' i dsea` 'léeng` quiá'r` i jalíng` fi' jo, jo lalab cajíng` dsea` do mi~ cajíñ':

—Nica'láam` jóo`.

52 Jo mi~ canúu` i dsea` do e júu` jo, joba' cajmíngí'-reiñ' do e í` dseáng' e ca'láang` i jóor` do.

Joba' lalab cañí' i dsea` 'léeng` do quiá'r`:

—Lado guié` la ii` coo` e ca'lóob` caguá` iu` guíiñ` jo ca'láam`-bre.

53 Jo mi~ canúu` i tiquíá' i jiuung` do e júu` jo, joba' dseáng' calilí'r` e dseáng' e í' job mi~ casí' Jesús ír` e nica'láam` jóor`. Joba' i dsea` do colíng` cóo` jaléng` dsea` sinúu` quiá'r` cajám' yaaiñ` fi' jaguó` Jesús ie~ jo.

54 Jo cóo' e nab catî tú e li e quí~ Jesús jmí~ e cajméer` ie~ mi~ caquing'-tur fí' lí se' Galilea e jaiñ' fí' lí se' Judea.

5

Mi~ cajmi'leáng- Jesús jaang` dsea` i caang` tñ-

1 Jo mi~ cangîgui lajo, mi~ catîtu í' e jmóo` dsea` Israel jmí~ fí' Jerusalén, joba' fí' job caquing'-tu Jesús e ngotíñ~ e jmí~ jo. 2 Jo ie~ jo, e fí' dsí' iá` cuu~ e si' lacúng' Jerusalén do, quiéeng` coo` o'nú^ fí' lí ngîng` jaléng' jo'se` jiuung` i tîng` dsea` Israel jngaiñ' mi~ tí' jmí~. Jo quiá'- e o'nú^ do silí' coo` lí a~ jmí~ e fe' eáang` e sii` Betzata cóo'~ jmí' hebreo. Jo e fí' 'ni' e lí a~ jmí~ do quiéeng` ñiá` ni'núu'jiu, 3 jo fí' job seeng` fîng` dsea` dsée' e lí^ doñí' ee` jmohuí' líiñ'; do i tiuung-, dogui i jlúu~, dogui i caang` tñ- i teng' ni` uó^ . Jo jaléng' í' sijeeiñ` e nijó' e jmí~ do. 4 Co' fé' dsea` e seab` mi~ jgáang` jaang` ángel fí' dsí' e jmí~ do, joba' nijóbb' e jmí~ do mi~ nijgiáang` í; jo mi~ calí- jo, i dsea` la'uii~ i ni'í' fí' dsí' e jmí~ do, joba' ni'leáam-bre jóng lí^ doñí' ee` jmohuí' líiñ'. 5 Jo jee~ jaléng' i dsea` dsée' do niquiéeng` jaang` dseañu' i nidsée' lajii' nîngóo' guigui dsí' jñiá- jii. 6 Jo mi~ caguié- Jesús fí' jo, cangaiñ- i dseañu' i dsée' do e dob ráaiñ' jogui caliñir' e lajii' lí'ba' nidsée' i dsea` do, joba' cajmingí'-reiñ' do jo casí'-reiñ':

—¿lin' e ni'leáan'- lajii'~ jmohuí' lin'?

7 Joba' cañi' i dsea` dsée' do quiá'- Jesús lala:

—Fí'i, ja` ii` seeng` fa' ii` nijmicóo'~ jnea~ e ni'ú^u fí' dsí' e jmí~ do mi~ cangî e nijó', jo co' lacoo` ya' mi~ iin~ n ni'ú^u fí' jo, dsea` jiém' dsijéeng` quié'e.

8 Joba' cañíi' Jesús quiá' i dsea` do:

—Ráan' , jo see e 'ma` li` dsín'^ na jo guóng'.

9 Jo dsifí' lanab ca'láang` i dseañu' do, jo cacó`bre e 'ma` li` dsíiñ'^ do, jo canaaíñ` ngí`bre jóng. Jo ie` jo dseáng'` cangotíng` jmiñ` e jmi'íng' dsea` Israel. 10 Joba' mi` cangá` i dsea` quie` nifi' quiá'` dsea` Israel e niquié` i dsea` ca'láang` do e 'ma` li` dsíiñ'^ do, joba' lalab casí'r` dsea` do:

—Jmiñ` e jmi'ím' dsea` lana, joba' ja` cuóøng` fa' e co'^ e 'ma` na.

11 Jo dsu' lalab cañíi' i dsea` i lami` dsée'~ do quiá'` i dsea` góor` dsea` Israel i casí'` ír` lajo:

—Jo i dsea` i cajmi'lée` quie` e do casí'r` jnea` lala: “Ráan' , jo see e 'ma` li` dsín'^ na jo guóng'.”

12 Joba' cajmingí'` tu i dsea` Israel do i dseañu' do jo cajíñ'`:

—¿I` gui i dsea` i casí'` 'nu` e nicó'^ e 'ma` li` dsín'` do jo gui e niguón'?

13 Jo dsu' i dseañu' do júi` ja` ñir' i` i cajmi'leáang` ír` do, co' ladsifib' cango'íng` tu Jesús jee` i dsea` fíng` i siseáng'` do ie` jo. 14 Jo mi` cangí` jo, dob cadséng'` tu Jesús i dsea` i cajmi'leáaiñ` do fí` dsíi' sináa` guá'` fé' e si' fí` Jerusalén jo lalab casí'` reiñ' do:

—Janú' , lana nica'láam`ba' lajúi'~ jmohuí' e lami` lin' , jo jie` mi' ee` tu' dsee` calé'` catú' , dsuco' fíng song cajmee` tu' lajo, joba' huñg` guib nid-sijéé' quíi'` jóng.

15 Jo ngí` jo, cangób` i dseañu' i lami` dsée'~ do e cangojmea'r' júu` jaléng'` i dsea` i quie` nifi' quiá'` dsea` Israel e Jesús sií` i dsea` i cajmi'leáang` ír` do.

16 Joba' jaléng'` i dsea` Israel do ñingir'` 'naíñ'` Jesús e laco' nijmeáiñ'` dsea` do ga` uíi'` e cajmée` dsea` do

e jo 'ñia' ie~ jmiñ e jmi'ing' jaléng' dsea`góor` dsea` Israel. 17 Jo dsu' Jesús lalab casí'r~ jaléng' i dsea` do:

—Tiquié`e ja` mí` catúr` jíi~ cateá` ta~ quiá'r~, jogui lajõb jmóo` jnea~ cajo.

18 Jo mi~ canúu~ jaléng' i dsea` i quie` nifi` quiá' dsea` Israel do e cajíng'~ Jesús lajo, joba' eáang`guib ca'f dsíir' e nijngáañ' dsea` do, co' o' jíi~ e cajmi'leáañ' i dsea` dsée'~ do 'ñia' ie~ jmiñ e jmi'ing' dsea` góor` dsea` Israel, co' lajõb cajo fé'r` e røøb` láañ` cóo'~ Fidié` mi~ fé'r` e Fidiéeb` dsea` líng` Tiquiá'r`.

Ja` jmóo` i Joo' Fidié` i camñg'~ do la tñiñ` 'ñia'r`

19 Jo co' niñib' Jesús jial' í` dsíi' i dsea` do, joba' lalab casí'r~ dsea` do:

—E laba' jmitaa` óó'na', e jíi~ cóo` cuøøng` lí jmee~ jnea~ la tñiñ` 'ñiá'a, jnea~ dsea` lín'n i Joo' Fidié` camñg'~, co' dseáng'~ lajii' e móo`o e jmóo` Tiquí'ii', lajii' e joba' e jmóo`o cajo. Co' jalé' e móo` jnea~ e jmóo` Tiquí'ii', joba' e job jmóo`o cajo. 20 Co' Tiquí'ii' eáam'`neáañ` jnea~, jogui e'bre jnea~ jalé' e jmóor`; jogui ni'é'~bir jnea~ cajo jalé' e niing`~gui e laco' nidsi'gó` óó' 'ná' eáang`gui. 21 Co' lí' laco' jmóo` Tiquí'ii' e jmi'itúr` jaléng'` líi~ jogui e cuør` e niliseeng`tuiñ', joba' lajõb jnea~, dsea` lín'n Joor', lajõb jmóo`o cóo'~ jaléng'` dsea` i iin`n jmee` cóo'~ lajo. 22 Jo Tiquí'ii' ja` quidsir' í' quiá' jíi~ jaang` dsea` uii'~ dsee` quiáañ'~, co' jneab~ dsea` nicangñ'n quiá'r~ e ta~ jo e catñn`n nijmee~ e lajo. 23 Jo cajmée` Tiquí'ii' lajo e lí' laco' lajñng` dsea` nijmi'gór` jnea~ lí' laco' gui jmi'gó` dsea` ír`. Dsuco' i dsea` i ja` jmi'gó` jnea~, dsea` lín'n Joo' Fidié`, joba'

lajob cajo ja` jmi'gór` Tiquí'ii', dsea` i casíng` jnea` fí` jmi'güí' la.

24 'Jo e laba' jmitaa` óó'na', e doñi' ii` dsea` i já'` líng` júu` quié`-e jogui núu'r` júu` quiá'` i dsea` i casíng` jnea` fí` jmi'güí' la, joba' jaléng` dsea` í` niñim`bre e seeiñ` cøøng` cóo'~ Fidiéé` lata` jo ja` nidsiliñ` fí` lí` 'lí'`; co' lí' lafa' lamí` sijúum`-bre, jo dsu' lana lí' lafa' nicají'tur la'eáang` cóo'~ Fidiéé`.

25 Jogui dseáng'` jmita`baa óó'na' e tí` lí` nitib` í'` jo dseáng'` lanab liy e jaléng` dsea` i lafa' 'líng` uí'~ jalé` dsee` quiá'r` ninúr` júu` quié`-e, dsea` lín'n` Jóo' Fidiéé`; jogui jaléng` dsea` i ni'íng` e júu` jo, niliseem`bre la'eáang` cóo'~ jnea`. 26 Jo lí'` laco' Tiquí'ii' Fidiéé` 'ñia'`bre dsea` cuør` e seeng` dsea`, joba' lajob cajo dsea` í'bing` i nicacuø'` jnea`, dsea` lín'n` Jóor`, e laco' 'ñia'`baa dsea` cuøø`ø` dsea` e seeiñ`. 27 Jogui nicacuø'`bir jnea` e oo` ta` e niquidsii`- í'` quiá'` jaléng` dsea` jmi'güí' uii` quiá'` jalé` dsee` quiá'ñ'`, co' jneab` dsea` cagá`-a fí` ñiff` e lín'n` jaang` dsea` jmi'güí'. 28 Jo ja` güidsigá` óó'na' quiá'` jalé` e fíi` i 'nú'` la, co' niguiéeb'` jmi` mí` jaléng` dsea` i ni'líng` ninúr` júu` quié`-e 29 jo ni'uøiñ` fí` dsí'` ée` quiá'r`. Jo ie` jo jaléng` i dsea` i ca'ée` jmang'` e guiá`- nijí'tur e laco' niliseeiñ` cøøng` cóo'~ Fidiéé`, jo dsu' jaléng` i dsea` i cajmée` jalé` e ja` dseeng` nijí'tur e lí'` laco' ni'íñ` iihuí'.

Jie` fí` lí` jáa' fí` quiá'`- Jesús cóo'~ jalé` e jmóor`

30 'Jo fíi`-túu` 'nú'` e jíi'~ cóo'~ cuøøng` lí'` jmee` jnea` la ñii` 'ñia'`a. Co' jnea` mí` quidsii`- í'` quiá'` jaléng` dsea`, e jo jmóo`o` laco' ta` quiu'` Tiquí'ii' Fidiéé`, jogui dseáng'`- røøb` jalé` e jmóo`o` do cajo. Jo ja` jmóo`o` la tñn` 'ñia'`a jalé` e jo, co' lajii'` e

iing~ Tiquí'baa' e jmóo`o, co' dsea`íb` i casíng` jnea~
 fí' jmgüü' la. ³¹ Jo faco' jnea~ fá'a juguiá~ cuaiñ~
 quié~ e 'ñiá'a, joba' ja` e quíng' jíi~ coo` e júu^ do
 fí' quiniá' 'nú' jóng. ³² Jo dsu' seem` jaang`gui i fé'
 guiá~ uii~ quié~ e, jogui tab~ dsii~ e jalé' e júu^ do
 quíim' fí' quiniá' 'nú'. ³³ Jo 'núb' dsea` casíng`na'
 dsea` i cangojmingíi' i Juan i seáang` dsea` jmíi'
 do i dseáng' jnea~, jo tab~ dsii~ e jmang' júu^
 jáb' dseáng' fé' i Juan do. ³⁴ Jo dsu' jnea~ ja`
 'neán`n dsea` jiéng' i nijmé~ júu^ uii~ quié~ e i~
 dsea` líng' jnea~; jo fá'a e júu^ la e lí' laco' 'nú'
 nilí'na' leáng`na' jee~ jalé' dsee~ quí'na'.

³⁵ 'Jo jalé' júu^ e caguia' i Juan do lí' laco' cajlíi~
 quíi' e coo` e laco' e' dsea` fí'; jo 'nú' lajee~ cateá'ba'
 cajmi'íáang` óo'na' cóo'~ jalé' e júu^ e caguia' i Juan
 do. ³⁶ Jogui jalé' e jmóo` jnea~ do eáang`gui cuø lí~
 i jnea~, jo eáang`guib niing~ laco' e júu^ e cajíng'~
 i Juan do uii~ quié~ e; co' lajíi' e jmóo` jnea~, ta~
 job e cacuø' Tiquí'ii' Fidiéé~ jnea~ e nijmee~ e. Jo
 jalé' e jmóo`o do cuø lí~ e Tiquí'ii' Fidiéeb` dsea`
 casíiñ` jnea~ fí' jmgüü' la. ³⁷ Jo i Tiquí'ii' do, dsea`
 íb` i fé' juguiá~ uii~ quié~ e. Jo dsu' 'nú' ja` mí'
 canúu`na' júu^ quiá'r` o'gui mí' cańíng`na're cajo,
³⁸ o'gui seeng`na' e jmití'na' júu^ quiá'~ dsea` do,
 co' ja` mí' ca'íng'~na' jnea~ dsea` casíiñ` fí' jmgüü' la.
³⁹ Jogui 'nú' dseáng'~ tá'~ camí'~ júub` jmitíng`na' e
 fé' fí' ni~ jì' quiá'~ Fidiéé~, co' sijeeng`na' e fa' lajob
 nilíi'na' jial cuøng` e seeng`na' cøng` cóo'~ dsea`
 do lata~; jo dsu' jalé' e júu^ do lajíi'~ uii~ quié~ baa e
 fé'. ⁴⁰ Jo dsu' 'nú' ja` iing`na' fa' nijáang`~ yaang`na'
 fí' jaguóo`o e laco' niliseeng`na' cøng` cóo'~ Fidiéé~.

⁴¹ 'Jo fhí-guá' 'nú', ja` e lí' quié~ jnea~ jial lí'

jalé' e fé' dsea` jmigüü` uii~ quié~e, ⁴² dsu' nicuíim` jnea~ 'nú' guiú` jial líng`na', jo niñi`baa guiú` e ja` 'neáang`na' Fidiéé'. ⁴³ Jo jnea~ cagá~a fí` jmigüü` la cuaiñ~ quiá'~ Tiquié`e, jo dsu' 'nú' ja` líng`na' jnea~. Jogui faco' jaang`gui dsea` i nijáa` i ja` ii` seeng` i sá' quiá'r~, jo dsu' ni'íim`ba' i dsea` í. ⁴⁴ Jo çjial já'~ nilíng` 'nú' júu^ quié~e fíng song lico' jmiféng` rúng`na' lajee` la'ó' yaang~na' jo dsu' ja` jmi'goo`na' 'ñia' Fidiéé` dsea` fé'r` guiú` uii~ quií~na'? ⁴⁵ Jo ja` í^ óo`na' e jnea~ ni'nín~n 'nú' fí` quini` Tiquié`e, co' 'lii~ yúu~` quií~na' i sii` Moí~ dsea` ca'níiñ` 'nú' cóo'~ júu^ quiu` ta' e cajme'r' do, jo íb` i sijeeng` 'nú' i nijmicóo'~ quií~na'. ⁴⁶ Cofa' 'nú' já'~ calíng`na' lajii'~ júu^ e cajme' i Moí~ do fí` ni` jì` quiá'r~, joba' lajob` já'~ líng`na' jnea~ cajo, co' e fí` ni` júu^ jo cuaiñ~ quié~baa e fé'. ⁴⁷ Jo song` 'nú' ja` já'~ líng`na' e júu^ e cajme' í, joba' çjial cuóøng` e já'~ nilíng`na' lajii'~ júu^ e fíi` i 'nú' jóng?

Jo lanab` jii'~ líi` júu^ quiá'~ Jesús e casí'r~ dsea` i quié' nifi' quiá'~ dsea` Israel ie` jo.

6

Mí` cahéng` Jesús` ñia` mil dseañu`

(Mt. 14:13-21; Mr. 6:30-44; Lc. 9:10-17)

¹ Jo mi~ cangí` jo, coo` jmii~ cangó~ Jesús lí' lí' 'ngóo'~ e guiéé' e sii` Galilea do, jogui sii`bi cajo Tiberias. ² Jo fíim' dsea` ngolíñ~ fí` lí' ngóo' dsea` do, dsuco' jéeng`gui nicangár~ jalé' e lí~ e quií~ dsea` do jmii~ e jmóor` mi~ jmi'leáaiñ~ jaléng` dsea` dséel~. ³ Jo mi~ caguié~ Jesús colíng~ cóo'~ dsea` quiá'r~ fí` lí' lí' 'ngóo'~ e guiéé' do, jo cangolíñ` fí` coo' yú'^ mó', jo mi~ caguilíñ~ fí` jo, dob caguár`

coling~ cóoiñ~ do. ⁴Jo nijaquíeng' jmii~ Pascua ie~ jo e qui~ t'ing` dsea` Israel e jmóor' fí' Jerusalén.

⁵Jo lajee~ guing~ Jesús e fí' yá^ mó^ do, cangár~ e i f'ing` dsea` nijalíng~ fí' lí~ guiiñ~, joba' lalab casí'r~ jaang` lajee~ i dsea` quiá'r~ do i sii~ Lii~ jo cajíñ~':

—¿Jie~ fí' nidsileá^aa' jalé^ e nidó^ i dsea` 'leáang~ i nicagüilíng~ la lana?

⁶Dsu' cajíng~ Jesús e jo e lí^ laco' niliñir' e nijíng~ i Lii~ do cuaiñ~ quiá~ e jo, co' niñí^bre guiá~ 'ñia'r' quiá~ jial nijmér~ cuaiñ~ quiá~ e do. ⁷Jo lalab cañí~ Lii~ e casí'r~ Jesús:

—Nañí' fa' nilí^léé^ cabøø~ iñí^ e nidsé~ lajì^ cuu~ e 'léeng~ dsea` lajee~ guiáng~ sí^, dsu' ja' nilíim^bi quiá~ laj'ing~ i dsea` na e nitíñ~ jmá~ capí^ lajaang` lajaaíñ`.

⁸Jo mi~ canúu~ e júu^ jo i dsea` jaang`gui quiá~ Jesús i sii~ Dí^, i líng' rúng^ Tú^ Simón, joba' lalab casí'r~ Jesús:

⁹—Lab sing' jaang` jiuung~ i quie' 'ñiá^ iñí^ e lí^ cóo~ mí^ cebada cóo~gui gáng~ 'ñu~ i nicuíng~, jo dsu' e la ja` jíé^ lí~ nidsibó^ jee~ i dsea` f'ing` na.

¹⁰Joba' cañí^tu Jesús quiá~ i dsea` quiá'r~ do jo cajíñ~':

—Síí~go' jaléng^ i dsea` na güi^né'r' lí~ nigüear` lajaang` lajaaíñ`.

Jo e fí' mó^ jo ia' sea` nuu` rø^, joba' fí' job caguá^ jaléng^ i dsea` do, jo jee~ i dsea` do quíng~ jíé^ ja` 'ñiá^ mil dseañu'. ¹¹Jo mi~ cangí jo, ca'im^ Jesús e iñí^ e se' i jiuung~ do jo cacuø'r' gui'máang~ Fidiée~; jo mi~ cangí jo, canaaíñ` jmóor' guiée^ jee~ jaléng^ i dsea` i caseáng^ do ie~ jo. Jo lajob cajo cajmээр` cóo~ i 'ñu` do, cajmée^bre guiée^ jee~

jaléng` i dsea` do car` jié` jíi` iĩĩ` do. ¹² Joba' mi` tí li` calítaang` i dsea` do guiá`, lalab cajíng` Jesús casí'r` i dsea` quiá'r` do:

—Sitíi`na' jalé` 'ná` e caseáng`gui na, jo tea'na' líng', co' jíi` ca'ná` ja` 'né` nidsitøng`.

¹³ Joba' lajob cajmée` i dsea` do, casitím`bre jalé` e 'ná` e caseáng`gui do quiá` laji` 'ñiá` e iĩi` cebada do, jo guitú` 'matá`gui carøng` cõo` e 'ná` e caseáng` do. ¹⁴ Jo mi` tí li` cangá` i dsea` fíng` do e li` e quíi` Jesús jmii` e cajmée` do, joba' canaiĩ` síiĩ` lajee` yaaiĩ` jo fé'r`:

—I nab dseáng` dsea` i cajíng` Fidiée` i nisíi` fí jmigüi` la i nifé` cuaiĩ` quiá'r`.

¹⁵ Jo niĩb` Jesús e i dsea` i fíng` do iĩi` nitø`bre ír` la'úung` e laco' nicár` nifí` quiáiĩ` do, joba' cajmi'nám`tu` 'ñia'r` jee` i dsea` do, jo cajgóor` calé` catú` cartí` yá' e mó' do e laco' niliúng` 'ñia'r`.

Mi` cangí` Jesús fí` ni` jmii`

(Mt. 14:22-27; Mr. 6:45-52)

¹⁶ Jo mi` tí li` jaquíéng` e ni`i` núu` e jmii` do, i dsea` quiá` Jesús do catisím`bre fí` li` née` e guiée` do. ¹⁷ Jo mi` caguiliĩ` fí` 'ni` e guiée` do, cangotáam`bre fí` dsíi` cõo` móo', jo canaiĩ` cua`bre e guiée` do e teáiĩ` fí` ngolíiĩ` fí` Capernaum. Jo cõob` mi` ca'í` núu`, jo dsu` Jesús ja` mí` cajím`bi` rúiiĩ` cõo` i dsea` quiá'r` do. ¹⁸ Jo lajee` ngolíng` i dsea` quiá` Jesús do e teáiĩ` fí` dsíi` e móo' do, jo cõo` canaang` e íi` guí` e teá` eáng`, joba' canaang` e rõo` jmii`.

¹⁹ Jo lajee` nĩngolíiĩ` e fí` ni` jmii` do tíb`jiu` la 'ñiá` osi jñuu` kilómetro, jo cõo` cangám`bre Jesús e nijaquíéng` dsea` do fí` quiá` e móo' do e nijaiĩ`

ngir' fí' ni~ jmiĩ. Jo mi~ cangáng- i dsea` do Jesús e jang' dsea` do ngir' fí' ni~ jmiĩ, joba' cajá- e 'gó'bre. ²⁰ Joba' dsifí' lanab cajíng'- Jesús casí'r- i dsea` do lala:

—jneab~ la, jo ja` f0øngl~na'!

²¹ Jo i dsea` quiá'r- do e iáang` dsí'bre calíñ' dsea` do fí' dsí' e móo' lí~ teáaiñ' do; jo dsu' lajee` job e jii~ ja' lí~ lanab catíñ' lajaléiñ' do fí' u0- quiú' e fí' lí~ sí'í^ nitíñ' do.

Mí~ canaang` i dsea` fñng' do 'náiñ' Jesús

²² Jo mi~ cajneá- e jmii~ jo, jaléng' dsea` i sijeeng` Jesús lí'^ lí' 'ngóo~ cataang` e guiéé' do calilí'r^ e jaléng' i dsea` quiá'- Jesús do nicangolímbre c0o~ e móo' c0o` 'ñia' e sí' do jééng'gui, jo dsu' Jesús ja` mí' cangaiñ' c0o~ i dsea` quiá'r- do. ²³ Jo lajee` job caguilíng- jíéng'gui dsea` i teáang'~ dsí' m0o' i jalíng- fí' c0o` fiĩ e sii' Tiberias, jo caguilíñ- fí' gu0o~ u0- quiú' quiá'- fí' lí~ cag0' i dsea` i fñng' do mi~ cangí' e cacu0' Fí'naa' Jesús gui'máang' Fidiéé'. ²⁴ Joba' mi~ tí' lí~ calilí'^ i dsea` fñng' do e jo` seeng` Jesús fí' do o'gui i dsea` quiá'r- do, joba' cajg0o~bre fí' dsí' c0o` m0o', jo cangolíñ^ cango'néem~bre dsea` do fí' Capernaum.

Jesús láíñ' laco' e iní'^ e cu0' e seeng` dsea` lata~

²⁵ Jo mi~ tí' lí~ caguilíng` i dsea` fñng' do fí' lí'^ lí' 'ngóo~ cataang` e guiéé' do, joba' fí' job cajíñ' Jesús jo lalab cajmingí'r- dsea` do:

—Tífa', ¿lí~ cañing'- 'nu' fí' la?

²⁶ Joba' cañí' Jesús quiá'- jaléng' i dsea` do jo cajíñ'-:

—E laba' jmitaa^ óo'na' e 'nú' 'náng'tu' jnea~ lana, dsu0' lado guiéé- caquié'na' car`

caróm̄ba', jò dsu' ja` 'náng'na' jnea~ uiing~ quiá'- e nicangáng'na' e~ guóng' jalé' e li~ e quí'~i jmií~ e nicajmé~e do. ²⁷ Jòba' fí~i 'nú' ja` jmiquíng'li óó'na' cuaiñ~ quiá'- jalé' e gø' dsea` e ja` huøø^ ee~, co' 'nú' lí^ lí' né~ e guing~ óó'na' cuaiñ~ quiá'- jalé' e taang~ dsea` e sea` contøøng~, co' e jòba' e cuø' e seeng` dsea` cøøng` cóo~ Fidié~ lata~. Jo e jòba' nicuøø^ jnea~ jaléng' dsea`, jnea~ dsea` gáa'a fí' ñifí~ e lín'n jaang` dsea` jmigüí, co' ta~ jòba' casíng` Tiquí'ii' Fidié~ jnea~ fí' jmigüí la.

²⁸ Jòba' cajmingí'~ i dsea` do Jesús, jò casí'r~ dsea` do lala:

—¿E~ 'né~ nijmó^ jnea'^ e lacø' niliti~ jalé' e iing~ Fidié~ e nijmó^oo'?

²⁹ Jòba' lalab cañí' Jesús quiá'- dsea` do:

—E lab e iing~ Fidié~ e 'né~ nijmee~na', e ni'íng'na' jnea~, dsea` i casíñ' fí' jmigüí la.

³⁰ Jòba' cañí'tu i dsea` do quiá'- Jesús, jò casí'r~ dsea` do lala:

—Jøgui 'nu', ¿e~ li~ e quí'~ jmií~ cuøøng` lí' jmée'^ quí'naa' la e lacø' já'- nilí'naa' júu^ quí'~?, jøgui ¿e~ jalé' jmoo` 'nu'? ³¹ Co' lalab júu^ sea` quiá'- 'lií~ dsea` áang' quí'-ii' e cangíiñ' e cagø'r' iñí'^ e sií maná lajee~ cangir' fí' ni~ guóo~ uø~ quiú' malí~ gui lí' lacø'gui la fé' fí' ni~ jì quiá'- Fidié~ lí' fé': “Jo Fidié~ dsea` cacuø' jaléng' i dsea` do iñí'^ e cagø'r' e jáa' fí' ñifí~.”

³² Jòba' lalab cañí' Jesús quiá'- i dsea` do jò cajíñ'~:

—E laba' iin~n jmítaa^ óó'na', e o' Moi~ i cacuø' i dsea` áang' quí'-na' do e iñí'^ e cajalí' fí' ñifí~ do, dsuco' ñiab' Tiquié^ e Fidié~ dsea` cuø' e iñí'^ e já'- e jáa' fí' ñifí~ do. ³³ Dsuco' jnea~, dsea` gáa'a fí' ñifí~,

lín'n laco' e iñí' e cuø' Tiquí'ii' Fidié' do e laco' liseeng' dsea` cøøng` còo'r` lata`.

34 Jòba' ì dsea` do cam'r' Jesús lala jò cajíñ'`:

—Fíi'ì, cuøø'~ jnea'^ contøøng` e iñí'^ jò.

35 Jòba' casí'~ Jesús jaléng' ì dsea` do jò cajíñ'`:

—Jneab~ dsea` lín'n e iñí' e cuø' e seeng` dsea` lata`; jøgui ì dsea` ì já'~ líng` júu^ quié` e jøgui nicajáng' yaaiñ` fí jaguó'o, jòba' jò` tóo` jmí~ fa' niguiá'gui jmi'aaíñ` o'gui jmi'jmiíñ`. 36 Jøgui lí' laco' jí'~ e nicafí' ì 'nú', nañí' fa' nicañíim'ba' jnea~, dsu' ja` já'~ lím`bi' jnea`. 37 Jò jaléng' dsea` ì nicacuøng' Fidié' jnea~, jòba' jaléng' dsea` í ím`bre jnea~; jøgui jaléng' ì dsea` í ni'íim'~baare cajo. 38 Cò' jnea~ ja` cagá` a fí ñíff` e cagajmée`e lají'~ e iin`n 'ñiá'a, cò' cagá` a e lí' laco' cagajmée`e lají'~ e iing` Tiquié` e e nijmee`baa, cò' íb` dsea` ì casíng` jnea~ fí jmi'güí' la. 39 Jò ì dsea` ì casíng` jnea~ fí jmi'güí' la iíñ` e ja` ni'íing` jí'~ camíng' ì dsea` ì nicacuøíñ' jnea` do, cò' lí' lí' iíñ` e nijmee` e e nijí'`tur mî` tí' lí' jò. 40 Cò' lají'~ e iing` Tiquié` e Fidié` e jaléng' dsea` ì jáng' yaang` fí jaguó'o jøgui já'~ líiñ` júu^ quié` e, jnea~ dsea` lín'n Jò' Fidié', jòba' iing` Fidié' 'ñia'r' e jaléng' ì dsea` í niñíim`bre e niliseeiñ` cøøng` còo'r` lata~; jøgui jnea~ nijmee` e e nijí'`tur mî` tí' lí' nití' í' lajò.

41 Jò mî` tí' lí' canúu` ì dsea` Israel do e júu^ quiá'~ Jesús do, jòba' canaaíñ` éeiñ` dsea` do lajee` la'ó' yaaiñ`, cò' dsea` do fé'r' e íbre dsea` líiñ` e iñí' e cajgò` fí ñíff`. 42 Jòba' canaaíñ` sí' rúíñ' lala:

—Jò ¿su o' ì Jesús labi ì líng' ì jòo' Sé' do? Cò' jneaa~aa' cuíim'baa' ì~ niquíar` jøgui ì tiquiá'r`, jò ja` ne`naa' jiali' fé'r' e jáar' fí ñíff`.

43 Jo mi~ canúu~ Jesús e júu^ jo, joba' casí'-reiñ' do lala:

—Túu'na' e éeng'na' jnea~. 44 Jo fñi~i 'nú' e jji~ jaang` dsea` cuøøng` lí` jáng` 'ñia'r' fí` jaguóo`o fíng song Tiquí`ii' Fidiée` i casíng` jnea` fí` jmigüi` la ja` nijajéeng` i dsea` í` fí` quini~; jogui` jneab` dsea` nijmée'~e e nijí`tu jaléng` i dsea` í` mi~ tí` lí` jo. 45 Jo lalab fé'` fí` ni~ ji` quiá'- Fidiée` e cajme'` i dsea` i café'` cuaiñ` quiá'r~ mali~gui eáang` ie~ lamí~ cajíñ'- lala: “Fidiéeb` dsea` ni'é'r~ lajaang` lajaang` dsea.” Joba' jaléng` dsea` i ninú~ júu^ quiá'- Tiquí`ii' do jogui` nilitiñ` guiá~ quiá'- dsea` do, joba' cóo~ jneab` nijatáaiñ` jóng.

46 'Jo dsu' ofa' fá'a e seeng` dsea` i nicangáng~ Tiquí`ii', co' lajji~ jnea`bing' i nicangáng~ dsea` do, jo íb` dsea` i casíng` jnea` fí` jmigüi` la. 47 Jo e laba' jmitaa` óo'na' e jaléng` dsea` i já'- líng` júu^ quié~e, joba' cøøng` liseeiñ` cóo~ Fidiée` lata~.

48 'Jo dseáng` jneab` lín'n e iñí'^ e cuø` e seeng` dsea` lata~. 49 Jo jaléng` 'li~ yúu'` quíi~ 'nú' cagó'b're e iñí'^ e sii` maná do ie~ lamí~ cangir' fí` ni~ guóo'~ uø~ quiú` do, jo dsu' nañi' fa' cagó'r` e jo co' cajúm~bre mi~ catí` í' quiá'r~; 50 jo dsu' jnea`gui fá'a quiá'- e iñí'^ e jáa' fí` ñifí~ do, co' ii` dsea` i ni'íng` e nidó'- e jo, joba' ja` tóo` jmñi~ fa' nijúuiñ~. 51 Jogui` co' jneab` dsea` lín'n e iñí'^ e nicajá~ fí` ñifí~ e lacó' cuø` e seeng` dsea` lata~, joba' doñi` ii` dsea` i ni'íng` e nidó'- e iñí'^ jo, joba' dseáng` lata~ niliseeiñ` cøøng` cóo~ Fidiée`. Jo e iñí'^ jo líí` ngúu' táam'baa, co' e joba' nijáa'~a e lacó' cøøng` niliseeng` dsea` cóo~ Fidiée` lata~.

52 Jo mi~ tí` lí~ canúu~ i dsea` Israel do e júu^ jo,

jōba' canaañ` t̄ing' júu^ quiá'r- lajee` la'ó' yaaiñ`
uii~ quiá'- Jesús, jō jmingí'- rúñ` lala:

—Jō ¿jial cuóøng` e ì dseañ` na nicuór- ngúu`
táaiñ` e lafa' niquiee~naa'?

⁵³ Jōba' cañí'tu Jesús quiá'- ì dsea` do jō
casí'- reiñ':

—Dseáng'- e laba' jmitaa^ óo'na', e song 'nú' ja`
ni'ling'-na' jnea~ laco'gui mi~ jmitaang` yaang~na'
guiá- cóo~ e iñí^ do, o'gui ni'u'^na' jmi'øøñ-, jnea~
dsea` cagá-a fí ñifí- e lán'n jaang` dsea` jmigüí,
jōba' ja` quí~ jmi~ jóng e nilí'na' e niliseeng'na'
cøøng` cóo~ Fidiée` lata~. ⁵⁴ Co' ì dsea` ì íng' jnea~
lí^ laco'gui mi~ jmitaang` yaaiñ` guiá- jogui í'r`
jmi'øøñ-, jōba' dsea` íb` ì niñíng` e niliseeiñ` cøøng`
cóo~ Fidiée` lata~; jogui jneab~ nijmee~ e e nijí'tu
jaléng' í mi~ nití- í' lajō. ⁵⁵ Dsuo' mi~ íng' dsea`
jneá~, lí' coo` e gø' dsea` e laniing- íng` ta~ quiá'r-,
jogui e jmi'øøñ- do, lí' coo` e í' dsea` e laniim- cajo.
⁵⁶ Co' ì dsea` ì íng' jnea~ lí^ laco'gui mi~ jmitaang`
yaang~ dsea` guiá- jogui ì í' jmi'øøñ- do, jōba' cøøm`
niliseeiñ` cóo~ jnea~, jogui lajōbi jnea~ cajo cøøm`
niliseen- cóo~ ír`.

⁵⁷ 'Jō Tiquí'ii' Fidiée` ì casíng` jnea~ fí jmigüí la
contøøm- seeiñ`, jogui la'eáang' íba' seeng` jnea~
cajo; jogui lajōbi jaléng' ì dsea` ì íng' jnea~ laco'gui
mi~ jmitaang` yaaiñ` guiá-, dseáng'- contøøm-
niliseeiñ` la'eáang' cóo~ jnea~. ⁵⁸ Jō fá'a e júu` na
cuaiñ` quiá'- e iñí^ e cajgó- fí ñifí-, co' e iñí^ la
ja` lí' laco' e iñí^ e sii` maná do e cagó' 'lí~ yáui~
quí-na' lajee` cangir' fí ni~ guóo~ uó- quiá-, co'
nañí fa' cagó' bre e jō, jō dsu' cajúm-bre mi~ catí
í' quiá'r-; dsu' jaléng' ì dsea` ì íng' jnea~ laco'gui

mi~ jmítaang~ yaaiñ~ guiá~ cóo~ e iñí^ do, joba' dseáng~ latab~ niliseeíñ cøøng` cóo~ Fidiée~.

⁵⁹ Jo lanab jii~ lí júu^ quiá~ Jesús e ca'e'r' jaléng' dsea` i caseáng' e fi' sinúu^ guá~ quiá~ dsea` Israel e si' fi' Capernaum.

Seem` dsea` i ja` íng` júu^ quiá~ Dsea` Jmáang~

⁶⁰ Joba' mi~ tí lí~ canúu~ i dsea` do lajii~ e cajíng~ Jesús do, i fíim' jaléng' i dsea` do i lamí~ ngí cóo~r` do cajíñ~ lala:

—Dsíng~ huíng' e ni'íng~naa' lajii~ e júu^ e fé'r' na, jo ja' lí^ dsi'naa' e seeng` dsea` i ja~ nilíng' lajii~ júu^ quiá~r~.

⁶¹ Jo co' niñib' Jesús lajii~ e ée' i dsea` do quiá~r~, joba' cajmingí~r~ dsea` do lala:

—¿Su 'ní' máam' 'nú' e júu^ quié~ e la? ⁶² ¿E~ ni'í^ áa'na' fíng song nimáang~na' jnea~ e niníng~túu fi' lí~ lamí~ guíin~n fi' ñífi~, jnea~ dsea` cagá~a fi' jo e lín'n jaang` dsea` jmígüi'? ⁶³ Jo e Jmiguí quiá~ Fidiée~ e cuø e seeng` dsea` lata~, jo dsu' ja` quí~ dsea` jmígüi' jmí~ fa' e nijmér~ e niliseeng` dsea` lata~; jogui jalé' júu^ e nicafí~i 'nú' na lí' la'eáang` cóo~ Jmiguí quiá~ Fidiée~, jogui cajo cuø e liseeng` dsea` lata~. ⁶⁴ Jo dsu' seem` 'nú' i ja` mí ca'ím^bi júu^ quié~ e latí' lana.

Jo cajíng~ Jesús lajo co' ñi'bre guiá~ latí' mi~ uíng~ i jaléng' i dsea` do i dseáng~ ja' ni'íng' ír', jogui i~ i nijáng' ír' fi' jaguó' jaléng' dsea` cøøng' e quiá~ e nijúuñ~.

⁶⁵ Jogui lalab cajíng~ guí~:

—Jo uí~ e lajob lí', joba' nicafí~i 'nú' e jii~ jaang` dsea` cuøøng` lí' jáng' ñia'r' fi' jaguó'o fíng song ja' nijajéng` Tiquí'ii' Fidiée~ ír' fi' quini~.

66 Jo latí' ie~ job, i fím' dsea` i lamí~ ngí' cóo'~ Jesús catiúum~bre dsea` do, jo caquiium'bre e ngír' cóo'~ dsea` do. 67 Jo có' calilíb'^ Jesús e jo, joba' cajmingí'r~ i dsea` guitúung` quiá'r~ do jo cajíñ'~:

—Jo ¿su la quie' 'náb'` iing~na' nijmi'naang` yaang~na' quie' e cajo?

68 Joba' cañí' Tá^ Simón quiá'~ Jesús jo cajíñ'~:

—Fí'naa', dseáng'~ ja` í' dsí'baa' e nidsitáang^naa' cóo'~ dsea` jiéng', có' jí'~ 'náb' dsea' cuø' júu^ quiá'~ jial seeng` dsea' cøøng` cóo'~ Fidiéé~ lata~. 69 Joba' jnea'^, nicajáang'~ yee~naa' fí' jaguóo', có' dseáng'~ nitab~ dsí'naa' e 'náb' lin' dsea` i casíng` Fidiéé~ fí' jmigüü` la e lin' dsea` güeang'^ quiá'r~.

70 Joba' lalab cañí' Jesús quiá'~ i dsea` quiá'r~ do:

—Jneab~ dsea` nicaguíin'~n 'náb' e nilíng'na' dsea` guitúung` quie' e, jo dsu' jee~ 'náb' quiijgeáang` jaang` i nilíng` dsea` quiá'~ fi~ i 'ling'^.

71 Jo mi~ cajíng'~ Jesús lajo, café'r' dsu' e éeiñ` i Judas i líng' jóo' Simón Iscariote, jo ja` e lí' e i Judas do quíim'~bir jee~ i dsea` guitúung` do, dsu' dsea` í'bing' i nijáng' Jesús fí' quini~ dsea` cøøng' e quiá'~ e nijúuiñ~.

7

Ji'gui jaléng'` rúng'` Jesús ja` já'~ líiñ` júu^ quiá'~ dsea` do

1 Jo mi~ cangí'gui lajo, dob ngí' Jesús fí' jalé' fi~ e téé'~ lí' se' Galilea e jmóor` lají'~ ta~ sinú'r^ . Jo ie~ jo ja` iíñ~ dsér~ fí' lí' se' Judea, có' jaléng' dsea` góor` dsea' Israel i teáang~ nifí' i seeng` fí' jo 'náíñ' dsea` do e iíñ~ nijngám'~breiñ'. 2 Dsu' ie~ jo nijaquíéng`

jm̄ĩ~ quiá'- dsea` Israel e quí'- t̄iĩñ` jmo'r' 'núu' má' 'ma~ e laco' jmiguiéng' dsír' jial mi~ cangir' fí ni~ guóo'~ uó' quiú' maliĩ~ gui eáang', ³ joba' lalab cajíng'- jaléng' i rúng' Jesús do jo casí'- reiñ':

—Ja` guing̃ j̄á'^ fí' la, jo fí' lí' se' Judeab guó'^, jo lajoba' jaléng' dsea` i t̄í' dsír' núu' júu^ qui'~ i seeng̃ fí' jo nijóør~ jalé' e quí'~ jm̄ĩ~ jmoo'. ⁴ Co' mi~ jaang` dsea` iĩñ` e nilicuí'gui dsea` quiá'r~, joba' fí' lí' jóø- dseab 'né~ jmér~ jalé' e jmóor' do. Jo co' 'nú' jmoo' jalé' e dsigá' dsír' dsea`, joba' fí' quini' dsea` f̄im' 'né~ jmé'^ jalé' e jo.

⁵ Jo fé'r' lajo co' j̄i'gui jaléng' i rúng' Jesús do ja` já'- líiĩñ` júu^ quiá'- dsea` do. ⁶ Jo lalab cañí' Jesús quiá'- i rúĩñ' do jo cajíñ'-:

—Ja` gui mí' cat̄í' í' quié' e e nijmijnéeng' 'ñiá' a fí' quini' f̄iing' dsea`, jo dsu' qui'~ 'nú' doñí' ee' jm̄ib~ cuóøng` lí' güilíng~ na' j̄ié' fí' lí' iing~ na'. ⁷ Jo f̄i- i 'nú' e ja' ee' uing̃ sea` quiá'- jaléng' dsea` j̄iéng' e nilí' 'ní' níiñ` 'nú', jogu' dsu' jnea~ gui contøøm~ 'ní' níng~ dsea`, co' jnea~ jmóo'o e líñí' dsea` røø' uii~ quiá'- jalé' e ga' e jmóor'. ⁸ Joba' f̄i- i 'nú' e cuóøm` lí' güilíng~ na' e jm̄ĩ~ jo, jo dsu' ja' lí' nii~ jnea~ lajminá~, co' nabi ja' mí' cat̄í' í' quié' e e nijmee~ e lajo.

⁹ Jo lanab casí'- Jesús i rúĩñ' do, jo dob cajer' fí' lí' se' Galilea, jo i rúĩñ' do cangolíim^bre fí' lí' t̄í' jm̄ĩ~.

Mi~ cangotíng' Jesús jm̄ĩ~ quiá'- 'núu' má' 'ma~ fí' Jerusalén

¹⁰ Jo mi~ cangî e cangolíng^ i rúng' Jesús do fí' lí' cat̄í' jm̄ĩ~, joguiba' cangó- Jesús fí' jo, jo ja' f̄iing' dsea` i ngolíng~ cóo'r~, co' ja' iĩñ` dsér~ fí' jo jee~ dsea` f̄iing'. ¹¹ Jo lajee' t̄í' e jm̄ĩ~ do, jaléng' dsea`

quie' nifi' quia'- dsea` Israel ngir' ta~ 'náng' Jesús, jo sñiñ` lajee` la'ó' yaaiñ~ jo fé'r` lala:

—¿Jie~ fi' iuung~ i dseañu' do?

¹² Jo eám' sñng` jaléng' i dsea` Israel i siseáng' do cuaiñ~ quia'- jalé' e jmóo` Jesús. Jo jee~ do quieéng` i liing~ dsea` i fé' lala: “Jaang` dseañu' i guiúm~ liiñ' do”; jogui jee~ dobi quieéng` dsea` i fé' cajo: “I dseañu' í ja` dseeng` éer, jogui lico' ngir' ta~ jmigøøng` jaléng' dseab`.”

¹³ Jo jee~ jaléng' i dsea` do jii'~ jaaiñ` teá` dsíir` nifé'r` uii~ quia'- Jesús, co' 'gó'bre fing ee` cajmée` i dsea` Israel i quie' nifi' do quia'r` song canúur` jalé' e sñiñ' do.

¹⁴ Jo ningóo' guiáam'~ e jmii~ do mi~ caguié` Jesús fi' dsíi' sinúu` guá'- fé' quia'- dsea` góor` dsea` Israel e si' fi' Jerusalén, jo mifíng` canaiñ` e'bre dsea` mi~ caguiér` fi' jo. ¹⁵ Jo eám' dsigá` dsíi' i dsea` quie' nifi' quia'- dsea` Israel do e núur` jalé' júu` 'goo` e guia' dsea` do, jo lalab sñiñ` lajee` yaaiñ~ jo fé'r`:

—¿Jial jmóo` i dseañu' na e tñiñ` ngáiñ' júu` quia'- Fidiée`, jo ja` ne`ee' fa' jie' li~ nicajmitñiñ'?

¹⁶ Jöba' lalab cañíi` Jesús quia'- i dsea` do:

—O' dseáng'~ júu` quie` e lajii'~ e ee` e 'nú' la, co' e júu` la jáa' quia'- i dsea` i casíng` jnea~ fi' jmigüi' lab. ¹⁷ Jo doñi' ii` dsea` i guia' dsíi' e nijmitir~ laco' la iing~ Fidiée`, jöba' dsea` í'bing' i niñi' su jáa' quia'- Fidiée` jalé' e ee` do osi lí' fá'a e la tñiñ` 'ñiá' baa é. ¹⁸ Dsuo' i dsea` i fé' la tñng` 'ñiá' jmóor` lajo e lí' laco' nijmiféng' dsea` í'bre; jo dsu' i dsea` i jmi'úung` e nijmiféiñ' i dsea` i casíi' quia'r` do, jöba' i dsea` í' jmang'~ júu` jáb'~ quier', jo jii'~ jaang` ja` ii` cuøøng` lí' cuø'- dsee` ír, co' ja` dsee` sea` quia'r`.

19 Jo cajíng'⁻ gui Jesús:

—Jo e já'⁻ e Moi~bing' cacuø' 'nú' e júu^ quiu' ta~ quiá'⁻ Fidiéé' do, jo dsu' jji'~ jaang' 'nú' ja' jmití'na' e júu^ jo. Jo zjialí' e iing~na' nijngáng'^na' jnea~?

20 Jo mi~ canúu~ i dsea` do lajo, joba' cañír` quiá'⁻ Jesús jo cajíñ'⁻:

—i' 'lim'⁻ jée' quí'⁻ 'nu'! Co' jnea'⁻ ja' í' dsi'naa' fa' e nijngáng'^naa' 'nu'.

21 Joba' cañítu Jesús quiá'⁻ i dsea` do jo casí'⁻ reiñ'!

—Mi' 'noo' dsigá'bi áa' 'nú' cóo'~ lajii'~ e cajmé~ e do 'ñia'⁻ ie~ jmi~ e jmi'íng'naa', jneaa~aa' dsea' lí'ii' dsea' Israel. 22 Jo ie~ malii'gui do Moi~ caquiur' ta~ e nitó~ cóo' e lí' fí' ngúu' táang' lajii'~ yuu siñuu^ lí' laco' quí'⁻ tíng'naa', jo dsu' e jo o' jji'~ quiá'⁻ Moi~ jáa', co' jáa' tí' quiá'⁻ 'lí' yúu' quí'ba'; jogui 'nú' tóo'ba' e lí' do fí' ngúu' táang' jiuung~ siñuu^ quí'na' mi~ catí' í' quiá'r~ lajo, jo ja' e lí' quí'na' nañí' fa' 'ñia'⁻ ie~ jmi~ e jmi'íng'naa'. 23 Jogui song 'nú' tóo'na' e lí' do quiá'⁻ jiuung~ siñuu^ quí'na' dseáng'⁻ 'ñia'⁻ ie~ mi~ jmi~ e jmi'íng' jneaa~aa', dsea' Israel, co' dseáng'⁻ ie~ jmi~ jo catí' í' e ni-jmé'na', jo jmoo'na' lajo e lí' laco' nijmití'na' e júu^ quiu' ta~ quiá'⁻ Moi~, joba' lana ja' e uiing~ sea` quí'na' e jmiguíng^ yaang~na' cóo'~ jnea~ uí' e cajmi'leáan^n i dseañu' do 'ñia'⁻ ie~ jmi~ e jmi'íng'naa'. 24 Joba' fñ' i 'nú', ja' cuó'na' dsee~ jaang` dsea` quiá'⁻ lajii'~ e í' óo'na' e jmóor', co' 'né~ jang'⁻ jmitá' óo'na' dseáng'⁻ røøb' su dseeng` osi ja' dseeng` é lajii'~ e jmóo' i dsea` í', jo lajoguiba' cuóøng` e ni'í'na' í' røø'.

Mi~ cajíng'⁻ Jesús jie~ fí' dseáng'⁻ lí' jáar'

25 Jo mi~ canúu~ i lling~ dsea` i neáng' fi Jerusalén do júu^ quiá'- Jesús, joba' canaain` jmingí'- rúin' jo jín'-:

—Jo ¿su o' i dseañu' nabi i ngí' dsea` 'náiñ' e quiá'- nijngáng'-neiñ'? 26 Jo jíi~ jaang` dsea` ja` i jnáng' quiá'r~, co' dob siñ' guiar' júu^ quiá'- Fidié~ jee~ dsea`. Jo jangám~ í' dsíi' jaléng' dsea` i quie' nifi' quí-ii' e dseáng'- já'-ba' e dsea` dob i Dsea` Jmáng~ i sijeeng'naa' i nicá' nifi' quí-ii'. 27 Jo jneaa~ guíi' ne'baa' røø' jie~ fi' lí' jáa` i dseañu' na, jo dsu' mi~ nití- í' e nijáa` i dsea` i sijeeng'naa' do, jíi~ jaang` dsea` ñir' jie~ fi' lí' nijáa` dsea` do.

28 Jo mi~ tí' lí' canúu~ Jesús lajíi~ e sáing` i dsea` do lajee~ e iuuiñ- e'r' dsea` fi' sinúu^ guá'- fé' e si' fi' Jerusalén, joba' cañír` teá' jo cajín'-:

—E já'- e nicuíim`ba' jnea~, jogui niñí'bi' jie~ fi' lí' gáa'a. Jo dsu' jnea~ ja` cagá-a fi' la e la ñii- 'ñiá'a, co' cagá-baa dsu' júu^ e sinúu^ quiá'- i lajang'^ do e jíi~ 'nú' ja` cuíing`na' í'. 29 Jo dsu' jnea~ cuíim`baare guíá-, co' cuaiñ~ quiá'-bre e cagá-a fi' jmigüü' la, jogui dsea` í'bing' i casíing` jnea~ cajo.

30 Jo mi~ canúu~ jaléng' i dsea` Israel do júu^ quiá'- Jesús, joba' lamí~ iin~ nisám'bre dsea` do, jo dsu' ja` calí'r- fa' cajméer` lajo, co' ja` mí' catí' í' quiá'- dsea` do fa' e nidsingíiñ- lajo. 31 Jo lajee~ jaléng' i dsea` i teáng' núu^ júu^ quiá'- Jesús do, fíim' i dsea` í' já'- calíiñ- júu^ quiá'- dsea` do ie~ jo, jo lalab síiñ`:

—Mi~ nigüéeng~ i Dsea` Jmáng~ i sijeeng'naa' i nicá' nifi' quí-ii', ja` lí'^ dsí'naa' e nijmér- jmigui'gui jalé' e lí' e quí'r~ jmíi~ laco'gui la jmóo' i dseañu' la lana.

Mi~ cajmée` dsea` quijí` jial nisáin' Jesús

³² Jo mi~ canúu~ dsea` Israel i líng' dsea` fariseo lajúi~ e síng` dsea` uii~ quiá'- Jesús, joba' jaléng' i dsea` î cóo'~gui jaléng' fii~ quiá'- jmidsea` casíin` jaang` gáng~ íi~ quiá'- guá'- e laco' nidsiséiñ~ Jesús e fí' lí' iuung~ dsea` do. ³³ Jo co' niñib' Jesús e í' dsíi' i dsea` do, joba' cajíin'- casí'r~ jaléng' i dsea` teáng'~ do ie~ jo:

—Ja` huøø~ eáang' nitaang~ jnea~ cóo'~ 'nú' fí' la, jo mi~ ningî jo, niním'~túu cóo'~ i casíng' jnea~ e cagá~a fí' jmigüi' la. ³⁴ Jo ie~ jo, fíim' 'nú' ni'nang'~na' jnea~ jo dsu' jo` niguiéng'~na' jnea~, co' ja` quí'- jmíi~ e nigüilíng'~na' fí' lí' ninín'~n.

³⁵ Jo mi~ canúu~ i dsea` i quie' nifi' quiá'- dsea` Israel e jo, jo ladsifí' lanab canaaiñ` e jmíngí'- rúin'~ lala jo fé'r':

—¿Jie~ fí' lí' nidséng'~ i dseañu'~ na e jo` quí'- jmíi~ fa' e niguiéng'~naa're? Jo jangám~ song nidsér~ fí' guóo'~ uø~ lí' huíi~ fí' lí' neáang' jaléng' dsea` góo'~naa' dsea` Israel e nidsi'ée'r~ jaléng' dsea` i ja` líng' dsea` góo'~naa' i neáang' fí' jo. ³⁶ Jo ¿e~ guøng' mi~ fé'~ i dseañu'~ na e ni'náng' dsea` ír' jo dsu' ja` ii` niguié' quiá'r~, jogui e ja` cuøøng` ii` nidsilíng' fí' lí' niguiéiñ' do?

Jo lanab casíng' i dsea` quie' nifi' quiá'- dsea` Israel do ie~ jo.

Jial lí' mi~ íng' dsea` Jmíguí' quiá'- Fidiée'

³⁷ Jo 'ñia' ie~ ngóo' cadséng~ jmíi~ e jmóo' dsea` Israel ie~ jo, jo dseáng'~ ie~ jmíi~ job e í' dsíir' e niing~gui lajee~ e jmíi~ e jmóor' do. Jo ie~ job casíng' 'ñia' Jesús fí' quini' jaléng' dsea` jo café'r' teá jo cajíin'-:

—Song *iì* 'nú' lí'na' e *jmijmüing*-na', *joba* ñilíng-na' fí' lí' sín'n la, *jo* nilí'ba' *jmü* e u'na'.
 38 *Jo* lí' laco'gui la fé' Fidié' fí' ni' jì' quiá'- lí' fé'r' lala: “*Jo* mi' já'- líng` dsea` júu^ quié`e, *jo* e *jo* lí' lafa' niníng' *jmü* fí' dsír'; *jo* e *jo* cuø' e liseeiñ` cøøng` cóo~ Fidié' lata~.”

39 *Jo* cajíng'- Jesús lana uí'~ quiá'- *Jmiguí* quiá'- Fidié' e ni'íng' jaléng' dsea` i' nijá'- líng` júu^ quiá'r-. *Jo* dsu' e *Jmiguí* do ja' mí' cagüéá- jee` ír', co' ja' mí' casám'bi Jesús e nidséiñ'- lí' lí' cajár- fí' ñifí- e ni'uíng`túr dsea` laniing-.

Mi' ca'naang` jaléng' dsea` quiá'- rúíñ' uii~ Jesús

40 *Jo* mi' canúu- i' dsea` do júu^ quiá'- Jesús, *jo* i' líng` i' dsea` í' canaiñ` sáiñ` lala:

—Dseáng'- i' dseañu' lab i' sijeeng`naa' i' nisíng- Fidié' i' nifé' cuaiñ` quiá'r-.

41 *Jogui* i' líng`gui i' dsea` do fé'r`:

—I' lab Dsea` *Jmáang*- i' sijeeng`naa' do i' nicá' nifí' quí-ii'.

Jo dsu' i' líng`guiiñ' do fé'r`:

—U~, o' Dsea` *Jmáang*- i' na, co' ja' cuøøng` e dsea` í' nijáar' e líiñ' jaang` dsea` i' seeng` fí' lí' se' Galilea. 42 Co' lalab fé' Fidié' fí' ni' jì' quiá'r- e dseáng'- 'néb- e Dsea` *Jmáang*- líiñ' dsea` siju` dseata~ Daví'^, *jogui* 'né- e niníiñ'~ fí' Belén e fí' lí' calí- góo` dseata~ Daví'^.

43 *Jo* lajob jaléng' i' dsea` do ca'naam`bre quiá'- rúíñ' uí'~ Jesús. 44 *Jo* lajee` i' dsea` í' seem`biñ' do i' lamí~ iing` nitøø` Jesús e nijníiñ- dsea` do, *jo* dsu' ja` calí'r- fa' cajméer` lajo.

*Jaléng` dsea` i quie` nifí` quía`- dsea` Israel ja` iñ`
Jesús*

⁴⁵ Jo mi~ caguilíng`tu i íi~ quía`- guá`- i casíng` dsea` Israel i líng` dsea` fariseo do i lamí~ sí`í` nisáng` Jesús do, jo i dsea` fariseo do colíng` cóo`- jaléng` fii~ jmidsea` cajming`r` dsea` do jo cajíñ`-:

—¿Jialí` ja` catee`na`re?

⁴⁶ Joba` cañí` i íi~ do quíaiñ`- do lala:

—Jíi~ jaang` dsea` ja` mí` calicuíng`naa` i fé` jlo` laco` fé` i dsea` do.

⁴⁷ Joba` lalab cañí` i dsea` Israel i líng` dsea` fariseo do quía`- i íi~ do:

—Jo ¿su la quie` 'núb` cajo nicaligóng`na` júu` quía`r`-? ⁴⁸ Co` jíi~ jaang` dsea` quie` nifí` quí`-ii' o`gui dsea` Israel i líng` dsea` fariseo caguaang`gui fa` ja` nicalíñ` júu` quía`- i dsea` do. ⁴⁹ Jo dsu` i dsea` i la 'nú` i ja` cuí` júu` quí` ta` quía`- dsea` Israel, fí` lí` 'lib`^ catíng`na` quía`- Fidié`.

⁵⁰ Jo mi~ canúu` i Nicodemo do, jaang` dsea` Israel i líng` dsea` fariseo i cangó` cango`ee` Jesús coo` née`~, joba` dsea` í` lalab cañí`r` quía`- dsea` do:

⁵¹ —Lí`^ laco`gui la fé` fí` ní` jì` quía`- júu` quí` ta` quí`-ii', e ja` cuóøng` nicuóø`naa` dsee` jaang` dsea` e jíi~ ja` mí` cane`ee' røø` jalé` e jmóor` do, su guí` osi ja` dseeng` é.

⁵² Joba` lalab cañí` i dsea` do quía`- Nicodemo:

—Jo ¿su dsea` Galileab líng` 'na` cajo? Jo jminá` jmitíng` júu` quía`- Fidié`, jo lajoba` niliñ`^ e jíi~ jaang` dsea` i fé` cuaiñ` quía`- Fidié` ja` mí` cajáar` fí` lí` se` Galilea.

⁵³ Jo mi~ cangí` jo, lajaléng` i dsea` do caquiñ`- cangolíñ` fí` quía`r`.

8

Jaang`dseamf`i catáng`i iuung` ta`'lée`

¹ Jo mi~ cangf` e cangolíng` jaléng` i dsea` do, ca'ib` Jesús fí e cangór` fí cōo` yá^ mó` e sií Olivos. ² Jo mi~ cajneá` e jmii~ cōo`gui do, joba' caquim`-tur fí guá'- fé' e si' fí Jerusalén, jo mi~ caguiéiñ'- fí jo, fñm' dsea` i cangoquiéeng' fí li~ siñ', joba' caguár` lana jo mifñng` canaañ` e'bre i dsea` do júu^ quiá'- Fidiéé`.

³ Jo lajee` e guiing~ Jesús e e'r' i dsea` do, caguilíng` cōo` tú` mñng` dsea` Israel i líng` dsea` fariseo colíng` cōo` tifa' quiá'- júu^ quiu' ta~ quiá'- dsea` Israel, jo jéeiñ` jaang` dseamf` i nīnicatøøiñ` i iuung` ta` 'lée` cōo` jaang` dseañu' i o' quiá'r-. Jo mi~ caguilíñ` fí jo, dob casíñ` i dseamf` do jee~ i dsea` i teáng` do ie~ jo, ⁴ jo lalab casí'r- Jesús:

—Tifa', i dseamf` la nīcatøøng`-naa're lajee` e guiáng` iuuiñ` ta~ 'lée` cōo` jaang` dseañu' i o' quiá'r-. ⁵ Jo fí ni~ júu^ quiu' ta~ e cajme' Moi~ fé' e jaléng` i dseamf` i jmóo` lajo 'né` niquiúng` dsea` ir` cuub` cartí nijúuiñ`. Jogui 'nu`, ¿jial fó'?

⁶ Jo cajíng` i dsea` do lana e lí' laco' 'nór' jial niguié'r e nicuø'r- Jesús dsee` fí quini` dseata~. Jo dsu' Jesús dsifí mi~ canúur` e jo lico' catúum`bre, jo mifñng` canaañ` jmo'r' fí jee~ 'lee` cōo` niguóor`. ⁷ Jo cō' ja` quiung` i dsea` do e jmíngi'-bir Jesús cuaiñ` quiá'- e jo, joba' casíng`tu 'ñia' dsea` do jo cajíñ`- casí'r- i dsea` do:

—Doñí` ii` 'nú' e lí' áa'na' e ja` ee` dsee` røøng`na' jii' cōo`, joba' teáng`na' i dseamf` na la'uii~ cuu~.

8 Jo mi~ cangî e cajîñ'~ lajõ, caléb'tu catúuiñ' fí ni' uó~, jõ canaañ' jmo'tur jee' lee' cóo'~ niguóor'.
 9 Jo dsifí' mi~ canúu~ i dsea` do lajii'~ e cajíng'~ Jesús, dsifí' lanab canaañ' dsilíñ' tá'~ jáiñ', jõ la'uii~ canaang` ngolíng` jaléng' i niyúu'gui, jõ cøøng`gui lajõ cangolíng` jaléng' i le'eáang`gui, jõ lajob cajméer` car` cató' uøøiñ` lajiiñ'. Jo coob` mi~ calilí'^ Jesús e ñia'bre catúung`guir cóo'~ i dseamî do, 10 joba' casíng'tu ñia'r', jõ mifíng` cajmíng'í'r~ i dseamî do jõ cajîñ'~:

—¿Jie' fí' ñingotáang'~ i dsea` i lamí~ 'nñng` 'nñ do? Jo ¿su jii'~ jaañ' ja` ee` cajmeáañ' 'nñ?

11 Joba' cañí' i dseamî do quiá'~ Jesús jõ cajîñ'~:

—U~, jii'~ jaañ' ja` ee` cajmeáañ' jnea~, Fíi'.

Joba' cañí'tu Jesús quiá'~ i dseamî do jõ cajîñ'~:

—O'gui jnea~ ee` nijmeáan'~n 'nñ' cajo, jõ lana guóng' fí' quií'~, jõ jõ` güibeáang'gui uó' dsee` melé'.

Jesús láiiñ' e jî' e jneá'jee` dsea` jmigüi'

12 Jo mi~ cangî jõ, cangób~tu Jesús fí' lí' siseáng' dsea`, jõ lalab casí'r~ jaléng' dsea` do:

—Jnea~ lín'n e jî' e jneá'jee` dsea` jmigüi'; joba' jaléng' dsea` i ngí' colíng` cóo'~ jnea~, niliseab` e jî' do quiá'r~ co' e joba' e cuø' e seeng` dsea` lata~, jogui cajo jõ tóo` jmii~ fa' niliseeng`guir fí' lí' nñ só'.

13 Jo mi~ canúu~ dsea` Israel i líng' dsea` fariseo e júu^ jõ, joba' lalab cañír' quiá'~ Jesús:

—'Nñ' líco' fó' jii'~ uii~ quiá'~ jalé' e guiú~ e jmoo' uøø'ba', joba' jalé' e fó' do ja` e quíng' jii'~ coo'.

14 Joba' cañí' Jesús quiáañ'~ do jõ cajîñ'~:

—Quím' jalé' e júu^ e fá' jnea~, nañí' fa' ñiá'baa fá'a uii~ quie~ e ñiá'a, co' ñi'baa guiá~ jie~ fí' lí' cagá~a jōgui jie~ fí' lí' niníng'^túu cajo; jō dsu' 'nú'gui ja' ñi'na' jii~ coo' e jō. ¹⁵ Co' 'nú' ñi'na' í' quiá'~ jaléng' dsea' lí'^ laco'gui la' í' ó'na' yaam~ba'. Jō dsu' jnea~gui ja' jmóo'ò lajō quiá'~ jii~ jaang' dsea' la ñii~ ñiá'a. ¹⁶ Jō song jmóo'ò lajō dsu' laco' catím~ niquidsii' í', jō ja' ñiá'a niquidsii' í' cajo, co' Tiquí'ii' i casíng' jnea~ fí' jmigüí' la, íb' i jmicóo'~ jnea~ e quidsii' í' quiá'~ dsea' laco' catíng'. ¹⁷ Jō fí' ní' júu^ quiu' ta~ quí' 'nú' fé' e mi~ seeng' gáng~ dsea' i tí' ní' røø' quiá'~ lajii'~ e calí' do, jōba' quím' e júu^ do laco' sí'í'. ¹⁸ Jō jnea~ lín'n jaang' i tí' ní' quiá'~ jalé' e jmóo'ò do, jōgui Tiquí'ii' dsea' i casíng' jnea~ fí' la líiñ' jaang'gui dsea' i tí' ní' quiá'~ jalé' e jō cajo.

¹⁹ Jōba' cajmíng'í' i dsea' do Jesús jō cajíñ'~:

—Jō çjng'gui Tiquí'í'^ jóng?

Jōba' cañí' Jesús quiá'~ i dsea' do jō casí'~reiñ':

—'Nú' ja' cúing'na' jnea~, o'gui cúing'na' Tiquié'e cajo; co' faco' cúing'na' jnea~, jōba' cuím'ba' la quie' Tiquié'e cajo.

²⁰ Jō jalé' e júu^ na cajíng'~ Jesús lajee~ e iuuiñ~ e'r' dsea' fí' dsí' sinúu^ guá'~ fé' e sí' fí' Jerusalén ca' e fí' lí' tée'~ guóo' e ta'r' cuu~ quiá'~ guá'~. Jō dsu' jii~ jaang' dsea' ja' i cateá' dsí' fa' casaiñ'~ dsea' do lajee~ jō, co' ja' mí' catí'bi' í' e nijmé~ dsea' lajō.

“Ja' quí'~ jmü~ nigüilíng'na' fí' lí' niníng'^ jnea~”

²¹ Jō mí' cang' jō, lalab casí'~tu Jesús i dsea' fíng' do:

—Jnea~, coob' mí' nití' í' e ninín'^n, jō 'nú' ní'nam'^ba' jnea~, jō dsu' 'nú' nijúum~ba' jee~

jalé` dsee` quí`na'. Co' 'nú' ja` quí`- jmí` fa' e nigüilíng`na' fí' lí` niníng`^ jnea`.

22 Jo mi canúu` i dsea` Israel i teáng` do ie` jo e júu` jo, joba' lalab cajíñ`-:

—Jangám` song í' dsí' i dsea` na e nijngáng`- 'ñia'r', joba' jíñ`- e ja` cuøøng` nidseá`^naa' cóo`r` fí' lí` nidséíñ`-.

23 Jo mi` calilí`^ Jesús e fé` i dsea` do lajo, joba' casí`r` dsea` do;

—'Nú'` jíí` fí' lab jíí` lí` seeng`na', jo dsu' jnea` fí' yáb`^ gáa'a; co' jíí` dsea` jmigüí` lab líng` 'nú', jo dsu' jnea` ja` lín`n` jíí` dsea` jmigüí`. 24 Jo uing` lajoba' fí`-i 'nú' e nijúum`-ba' jee` jalé` dsee` quí`-na'; co' song ja` já`- líng`na' e jneab` dseáng`- lín`n` jíí` laco' fá'a e lín`n`, joba' jee` jalé` dsee` quí`-ba' nijúung`-na'.

25 Joba' cañí` i dsea` do jo cajmingí`r` Jesús lala:

—Jo, ¿i` dseáng`- líng` 'nu` jóng?

Joba' cañí` Jesús quiá`- i dsea` do jo casí`-reiñ`:

—Lí`^ laco'gui nicafí`-i 'nú' lamí` jéeng`gui, íb` jnea`. 26 Jo jmiguiab` jalé` e sea` e fí`-i 'nú' jogui e niquidsii`- í` quí`-na' cajo. Jo dsu' i dsea` i casíng` jnea` fí' jmigüí` la jmang`- e jáb`- jalé` júu` quiá`r`, jo lajíí` júu` e fá` jnea` jee` jaléng` dsea` jmigüí` røøb` laco' jíí` júu` e núu` jnea` e fé` i dsea` i dseáng`- casíng` jnea` fí' jmigüí` la.

27 Jo dsu' i dsea` do ja` cangáíñ` e Jesús fé`r` uii` quiá`- Tiquiá`r`. 28 Jo casí`- Jesús i dsea` do lala:

—Jo mi` nitáng`na' jnea` fí' yá`, jnea` dsea` cagá`-a fí' ñifí`- e lín`n` jaang` dsea` jmigüí`, joba' nililí`^na' jóng e jneab` dseáng`- lín`n` jíí` laco' fá'a e lín`n`, jogui jíí` cóo` ja` e jmóo`o la ñii` 'ñiá`a, co' lico' fá'a lajíí` e nica`e` Tiquí`ii' jneab`. 29 Jo i dsea`

ḡ casíng` jnea~ do, seem`bre cóo~ jnea~ lana; jo ja` mi' catiúuiñ~ jnea~ 'ñiá'a jíi~ cateá, có' dseáng~ contøøm~ jmóo`o lajúi~ e iñ~ e nijmee`e.

³⁰ Jo mi~ tí li~ cató' e fé' Jesús e júu^ na, joba' fíim' dsea` já'- calíñ~ júu^ quía'- dsea` do ie~ jo.

Mi~ ca'e' Jesús jial líng' dsea` i silaang` jee~ dsee` quía'-

³¹ Jo mi~ cangí jo, casí'- gui Jesús jaléng' i dsea` Israel i já'- calíng~ júu^ quía'r~ do, jo cajíñ'- casí'- reiñ':

—Song 'nú' nijmití^na' lí^ laco' jíi~ e nica'ée~e 'nú' e nijmee~na', joba' dseáng~ dsea` quie~baa ni'uíng~na' jóng; ³² jogu' lajob niliñí^na' dseáng~ la'uíng~ jalé' júu^ quie~e, jo lajoba' ni'uíng~na' dsea` i silaang` jee~ jalé' dsee~ quía'^.

³³ Joba' cañí' i dsea` do quía'- Jesús jo cajíñ'-:

—Jnea'^ lí'naa' dsea` siju` 'lí~ yúu~ Abraham, jo jíi~ cóo` née' ja` mi' calí'naa' dsea` 'léeng~ quía'- dsea` jiéng'; joba' jial lí' e fó' 'nu' e ni'uíng~naa' lafa' dsea` silaang`?

³⁴ Joba' lalab casí'- Jesús i dsea` do:

—E laba' jmitaa^ óo'na', e jaléng` dsea` i beáng' dsee~ yaang~ líiñ' lafa' dsea` 'léeng~, có' e dsee~ quía'r~ dob quiu' ta~ ír. ³⁵ Cofa' jaang` dsea` 'léeng~ quía'- dsea` ja` catíñ~ jalé' e sea` quía'- fiir~, jo dsu' jaang` jóo' dsea` catíim~bre lajalé' e jo. ³⁶ Jo lajob, song jnea~ calaan~ 'nú' jee~ jalé' dsee~ e nica'ee~na', joba' dseáng~ lajang'^ júu^ba' e nileáng` 'nú' jee~ jalé' e dsee~ quí'na' do. ³⁷ Jo niñib` jnea~ guiú~ e dsea` siju` 'lí~ yúu~ Abraham líng' 'nú'; jo dsu' 'nú' iing~na' jngang'^na' jnea~, có' ja` iing~na' íng'na' júu^ quie~e. ³⁸ Jo jnea~

fá'a lajii' e nica'e' Tiquié'e jneab~, jo dsu' 'nú' jmoo'na' lajii' e fé' tiquí'ba'.

³⁹ Jōba' cañi' i dsea`do quiá'- Jesús jō cajíñ'-:

—'Liĩ yáũ' Abrahambing' líng' dsea` mí áang' quí-naa'.

Jō dsu' Jesús cañi'r` quiá'- i dsea`do jō casí'-reiñ':

—Facō' já'- e 'nú' líng'na' siju' 'liĩ yáũ' Abraham, jōba' laco' cajmée' íb` catíng` e nijmee-na' jóng facō' lajō. ⁴⁰ Jō dsu' 'nú' iim~bi' e nijngang'^na' jnea~, nañi' fa' jmang'- júu^ jáb'- fá' jnea~ lí^ laco'gui nica'e' Fidiée' jnea~. Jogui 'liĩ yáũ' quí-na' Abraham dseáng'- ja' cajmée'bre lajō.

⁴¹ Cō' 'nú' dseáng'- laco' jmóo` tiquí'ba' jmoo'na'.

Jōba' cañi' i dsea`do quiá'- Jesús, jō casí'r` dsea`do:

—Ja' lí' jnea'^ dsea` i ja' ñi' i~ tiquiá'^; cō' jaam` Tiquí'naa' seeng~, jō íb` Fidiée'.

⁴² Jōba' cañi' Jesús quiá'- i dsea`do jō cajíñ'-:

—Facō' já'- e Fidiée' líng' Tiquí'na', jōba' 'neáam' 'nú' jnea~ facō' lajō, cō' íb` dsea` i casíng` jnea~ e cagá'-a fí' jmigüi' la, jogui lab sín`n lana. Cō' jnea~ ja' cagá'-a la ñii' 'ñiá'`a, dsaco' dsea` í'bing' i casíng` jnea~ fí' la. ⁴³ Jōba' fá' jnea~ e ja' mí ngáng' 'nú' júu^ quié'-e lana, dsaco' ja' iing~na' núu^na' e jō. ⁴⁴ Jō fiĩ i 'lim'^ líng' tiquí' 'nú'; jogui cō' dsea` quiá'-bre líng'na', jōba' jmoo'na' lajii' e iĩñ~. Jō latí' mi~ uiim~ e fiĩ i 'ling'^ jmóor` ta~ jngang' dsea', jogui dseáng'- jíi' cōo` e jmóor` do ja' cōøng` cōo'~ júu^ quiá'- Fidiée', jogui dseáng'- jmang'- júu^ e o' já'-ba' quier'. Jō mi~ fé'r` júu^ e o' já'-, jōba' dseáng'- fé'r` laco' la líb' jóng, cō' jaang` dsea` adseam` líiñ~, jogui líiñ' tiquiá'^ jalé' e júu^ e o' já'- do. ⁴⁵ Jō jnea~gui jmang'- júu^ já'-ba' fá'`a, dsu'

ja` ja' - líng`na' júu^ quié`-e. ⁴⁶ Jo jíi'~ jaang` 'nú' cuøong` lí fo`na' e jnea` lín`n jaang` dsea` røong` dsee~, co' jaang` dsea` i quié` jmang` - júu^ jáb` - líng` jnea~, joba' çjali' ja` ja' - lím`bi' júu^ quié`-e? ⁴⁷ Jo jaléng` i dsea` i líng` dsea` quiá' - Fidiéé` núu`bre jalé' júu^ quiá' - Fidiéé` ; jo dsu' 'nú'gui ja` líng`na' dsea` quiá' - Fidiéé`, joba' ja` iing`na' núu`na' júu^ quiá' - dsea` do.

Ni`seem` Dsea` Jmáang` lajii'~ ná'gui e nili`seeng` 'lii` yúu'~ Abraham

⁴⁸ Jo mi` canúu` - dsea` Israel lajii'~ e cajíng` - Jesús do, joba' casí'r` - dsea` do lala:

— Nijáb` - júu^ qui`naa' e fé`naa' uii` quií` - , e 'nu` lín' jaang` dsea` samaritano jogui e iuung` i 'líng`a'.

⁴⁹ Joba' cañíi` Jesús quiá' - i dsea` do jo casí' - reiñ`:

— U~, jíi'~ jaang` i 'líng`a' ja` i iuung` dsii` - la, co' lajii'~ e jmóo`o e lico' jmi'goo` - Tiquié`e Fidiéeb` ; jo dsu' 'nú'gui ja` e jmi'goo`na' jnea` jíi'~ capí`^ . ⁵⁰ Jo dsu' jnea` ja` fá`a e iin`n e nijmi'goo`na' jnea~, jo dsu' seem` jaang` i iing` e 'nú' nijmi'goo`na' jnea~, jo dsea` íb` i quidsí` í` laco' catíng` . ⁵¹ Joba' jmitaa` óo`na' e doñí` i` i` núu'~ júu^ quié`-e, joba' dsea` í ja` tóo` jmi` fa' e nijúuiñ` .

⁵² Joba' cañíi` dsea` Israel quiá' - dsea` do:

— Lanaguib dseáng` - nicalita` dsi`naa' e i 'lim` iuung` áa' 'nu` . Co' 'lii` yúu'~ Abraham cóo` - gui jaléng` dsea` i café` cuaiñ` quiá' - Fidiéé` mali`gui eáang` cajúm` - bre, jogui dsu' 'nu` fó` e doñí` i` dsea` i núu'~ júu^ quií` - , joba' ja` tóo` jmi` fa' e nijúuiñ` . ⁵³ Jogui 'nu`, çsu` í` a' e niing` - gui' laco'gui i 'lii` yúu'~ Abraham do? Co' í` nicajúm` - bre, jogui jaléng`

dsea` i café` cuaiñ` quiá`- Fidiéé` maliñ`gui eáang` cajúm`bre cajo. Jogui`nua, ¿i` í` o` e lin`?

⁵⁴ Jöba' cañí` Jesús quiá`- i dsea` do jö casí`-reiñ`:

—Facö' jnea` jmi`goo`- 'ñiá`'a, jöba' ja` e quíing` jji`~ cöo` e jmóo`o do facö' lajō. Jō dsu' Tiquié`e Fidiéeb` dsea` i jmi`gö` jnea~, i dsea` i fó`na' i líng` Fidiéé` quí`-na' cajo. ⁵⁵ Jō dsu' 'nú` ja` cuíing`na' dsea` í, dsu' jnea`gui guiúb`- cuín`nre, jögui facö' jnea` fá`a e ja` cuín`nre, jöba' dsea` adseaam` lín`n jóng` lí` laco`gui la líng` 'nú` facö' lajō. Jō dsu' jnea`gui guiúb`- cuín`n dsea` do jögui jmiti`baa júu` quiá`r`. ⁵⁶ Jō i 'liñ` yúu`~ quí`-na' Abraham do, eáam` cali`iáang` dsír` mi` caliñir` jalé` e nidsing`ng`- jnea~, jō cö' dseáng`- cangá`-bre e jō, jöba' eáam` cali`iáang` dsír`.

⁵⁷ Jō mi` canúu`- i dsea` Israel do jalé` e casí`- Jesús ír, jöba' cañír` quiá`- dsea` do:

—'Nu` ja` mí` guóob`i' cincuenta jji, jō fó` e cañim`ba' 'liñ` yúu`~ Abraham.

⁵⁸ Jöba' cañí`tu Jesús quiá`- i dsea` do jö casí`-reiñ`:

—E laba' iin`n jmitaa` óo`na' e niseem` jnea` lajji`~ mi` nú`-gui e niliseeng` 'liñ` yúu`~ Abraham do.

⁵⁹ Jō mi` canúu`- i dsea` do e júu` jō, jöba' dsifí` lajōb` casitíñ` cüu` cöo`~ e sí`í` nijngáñ`- Jesús; jō dsu' dsea` do ladsifib` ca`mééñ, jō cagü`i`ñ`bre e fi` dsí` sinúu` guá`- fé` do e sí` fi` Jerusalén.

9

Mi` cajmée` Jesús e calijné` jaang` dseañ` i tiu-ung`

¹ Jo mi~ cangîgui lajo, coo` née~ cangîng' Jesús colîng~ cóo~ i dsea` quiá'r~ do fí' quiá'~ lí~ guing~ jaang` dsea` i tiuung~ latí' mi~ cangáang~. ² Joba' i dsea` quiá'~ Jesús do cajmingí'~ reñ' lala jo cajíñ'~:

—Tifa', ¿jiali' cangáang~ i dsea` na e tiuuiñ~? ¿Su calíñ~ lana uí'~ dsee~ quiá'r~ ofa' uí'~ dsee~ quiá'~ sejmiñ`bre é?

³ Joba' cañí' Jesús quiá'~ i dsea` quiá'r~ do jo casí'~ reñ':

—Ja` lí' lajo e uí'~ dsee~ quiá'r~ calíñ~ lana, o'gui uí'~ dsee~ e oo` sejmiir`. Co' calíñ~ lana e lí' laco' cuø lí~ e lajib` quí'~ Fidié~ jmñ~ lí' jmér~. ⁴ Jo lajee~ e jneá, 'né~ jmó^baa' ta~ lí' laco'gui jí'~ júu^ e sinú^naa' quiá'~ dsea` i casíng` jnea~ fí' jmigüî la; dsuco' coob` mi~ ninú, joba' jí'~ jaang` dsea` jo` quí'~ jmñ~ fa' nijmé~ guir ta~. ⁵ Jo lajee~ e táam`bí' fí' jmigüî la, joba' jneab~ lín'n e jí' e cuø e jné' dsea` jmigüî.

⁶ Jo mi~ cangî e café' Jesús e júu^ na, jo cañíir' fí' ní~ uó^, jo cóo~ e jme'e'r' do cacáñ' jee~ 'lee', jo cajméer` capí'^ jí', jo cóo~ e job casúur~ jmini~ i dsea` tiuung~ do. ⁷ Jo mi~ cangî jo, lalab casí'~ reñ' do jo cajíñ'~:

—Gua~ jo güirúu'~ jminí'^ fí' dsí' guiéé' silíng~ e siñ Siloé —jo e Siloé do guóng' Jaang` i Casíng` Dsea`.

Joba' lajob cajmée` i dsea` tiuung~ do, cangó~bre e cangorúu'r~ jminir~, jo nijné'~bre mi~ tí' lí' caquiñ'~ fí' jo. ⁸ Jo jaléng' dsea` i neáang` jíng~ laco' lí~ guíñ'~ do cóo'~gui jaléng' dsea` jiéng' i ní' quiá'r~ lamí~ jéeng'gui e guíñ'~ mir' cuu~, joba' jaléng' i dsea` î jmingí'~ rúñ' jo fé'r':

—¿Su o' i dseañu' nabi i lami~ gua` ta~ mí' cuu` do?

⁹ Jo i liing~ i dsea` do jíñ'⁻:

—Dsea` í'bi na.

Jogui i liing~ gui fé':

—U~, o' í na, lí' lajõjiu jnéem⁻bre.

Jo mi~ calilí' i dsea` tiuung⁻ do e síng` dsea` uii` quiá'r⁻, joba' cañír` jo cajíñ'⁻:

—Jnea~bi dsea` í'.

¹⁰ Joba' cajmingí'⁻ i dsea` do i dsea` lami~ tiuung⁻ do jo casí'⁻reiñ':

—Jo ¿jial cajmee'⁻ e calijné'tu'?

¹¹ Joba' cañí' i dsea` lami~ tiuung⁻ do quiá'⁻ i dsea` do jo casí'⁻reiñ':

—I dseañu' i sii` Jesús dob cajmi'leáaiñ⁻ jnea~ e lico' cajméer` capí'⁻ jí' cóo'⁻ jme'e'r', jo cóo'⁻ e job casúur⁻ jminii⁻, jogui caquiá'r' ta~ jnea~ e ninii~i nirúu'⁻u jminii⁻ e fí' guiéé' sílín'g⁻ e sii` Siloé do, joba' lajob cajmé'e. Jo dsifí' mi~ calí' rúu'⁻u jminii⁻, ladsifí' lanab calijné'e.

¹² Jo mi~ cangí' jo, cajmingí'⁻tu i dsea` do i dsea` lami~ tiuung⁻ do jo cajíñ'⁻:

—Jo ¿jnang~gui i dseañu' í' lana?

Joba' cañí' i dsea` lami~ tiuung⁻ do jo casí'⁻reiñ':

—Ja` ñii⁻ jnaaiñ⁻.

Mi~ cajíng'⁻ i dsea` tiuung⁻ do i~ i cajmi'leáang⁻ ír`

¹³⁻¹⁴ Jo 'ña' ie~ jmii~ e cajmée` Jesús e jí' do cóo'⁻ e calijné' i dsea` i lami~ tiuung⁻ do, ie~ jo dseáng'⁻ cangotíng` jmii~ e quí'⁻ t́ng` dsea` Israel e jmi'íñ'. Joba' jaléng' dsea` i cuí' quiá'⁻ i dsea` tiuung⁻ do cató⁻bre i dsea` í' jo cangojeáang⁻neiñ' fí' quini~ dsea` Israel i líng' dsea` fariseo. ¹⁵ Joba'

mi~ caguiéiñ'- do fi' jo, i dsea` Israel i líng' dsea` fariseo do cajmingí'- reiñ' jial calí- e calijnéiñ'. Jo dsea` do cañíir` quiá'- i dsea` Israel do jo casí'- reiñ':

—Mó'^, jíib` casúu- dsea` do jminii-, jo mi~ cangí' jo, cangorúu'~u, jo lajoba' calijné'e.

¹⁶ Jo mi~ canúu- i dsea` Israel i líng' dsea` fariseo e júu^ jo, joba' i líiñ'~ do cajíñ'-:

—I dsea` i cajmée` e jo ja` lí'^ dsi`naa' líiñ' dsea` quiá'- Fidié~, co' ja` jmi'gór` e jmi~ e jmi'íng' jnea~aa', dsea` lííí' dsea` Israel.

Dsu' caguiaang-gui i dsea` Israel i líng' dsea` fariseo do fé'r` jo jíñ'-:

—Jo ¿jial quí~ i dseañu' do jmi~ nijmér- jalé' e jo song jaang` dsea` dsee- dsea` quib' líiñ'?

Jo e jo ca'uíng- e lajee` la'ó' íbre canaaíñ' e jo sñiñ` røø. ¹⁷ Jo mi~ cangí' jo, cajmingí'-tur i dsea` i lamí~ tiuung- do jo casí'- reiñ':

—Jo lacó' fó' na e ca'láam-ba'. Jo ¿e` fó' uii` quiá'- i dsea` i cajmi'leáang- 'nu' do?

Joba' cañíi` dsea` do quiá'- i dsea` Israel i líng' dsea` fariseo do jo casí'- reiñ':

—Jnea~ lín-n e dsea` í líiñ' jaang` dsea` i fé' cuaiñ` quiá'- Fidié~.

¹⁸ Jo dsu' jaléng' i dsea` Israel i líng' dsea` fariseo do ja` iñ~ fa' já'- calíñ- e lamí~ tiuung- i dsea` i nijné' lana joba' catø'r- sejmií i dsea` do. ¹⁹ Jo mi~ caguiliñ'- do, joba' cajmingí'-reiñ' do jo cajíñ'-:

—¿Su jóo'ba' líng' i dseañu' la? Jo jmée'-na' jnea'^ júu^ røø, ¿su dseáng'- tiuuiñ- calisém`bre? jo song lajo, ¿jial calí- e lana nijné'r'?

²⁰ Joba' lalab cañíi` sejmií i dsea` i lamí~ tiuung- do jo cajíñ'-:

—Cuím` jnea`^ guiá^- jóo`naa', jogui ne~baa' røø` e tiuum`bre caliséiñ`; ²¹ jo dsu' ja` ne~naa' jial e calijné'r, o'gui ne~naa' i~ i cajmée` e calijné'r` cajo; jo nab cuóøng` nijmingí`~na're 'ñia'r` co' nifém`bre, jo 'ñia`bre cuóøng` lí jmeá'r- 'nú' júu^ dseáng`- laco' calí^-.

²² Jo cajíng`- i sejmiir` do lajo, co' 'gó`bre fing ee` cajmeáng` dsea` Israel i líng` dsea` fariseo ír. Co' i dsea` í, røøb` nicasíiñ` e song seeng` dsea` i jmicuíng` Jesús e líiñ` do Dsea` Jmáang`- i sijeeng` dsea` Israel i nicá` nifí` quiá'r-, joba' jaléng` i dsea` i jmóo` lajo, jo` sea` fí` quiá'r` fa' e niquíng` guir jee` dsea` Israel o'gui cuóøng` fa' e nidsilíng` guir fí` guá^- quiá^- dsea` do cajo. ²³ Jo uing` lajoba' cajíng`- sejmií` i dsea` i ca'láang` do e yaang` i dsea` Israel i líng` dsea` fariseo do 'né` nijmingí'r` i jóoiñ` do co' nifém`biñ` do.

²⁴ Jo i dsea` Israel do calé` catú^- cató'r- i dsea` i lamí` tiuung` do jo lalab casí^- reiñ`:

—Fée` júu^ já^- fí` quini` Fidiée`, co' nineb` jnea`^ røø` e i Jesús do líiñ` jaang` dsea` dsee` dsea` quib`.

²⁵ Joba' lalab cañí` i dsea` lamí` tiuung` do quiá^- dsea` do jo cajíñ`-:

—Ja` ñi` jnea` su líiñ` dsea` røøng` dsee` osi o' lajo é, lajii` e ñii` quiá'r- e jnea` lamí` tiuum`baa, jogui lana nicajméer` e nicalijné`baa.

²⁶ Joba' i dsea` do cajmingí`- tur i dsea` i ca'láang` do jo cajíñ`-:

—¿E` jíi` e cajmée` i dsea` do quíi`- e calijné`?

²⁷ Joba' cañíiñ` do quiá^- i dsea` do jo casí^- reiñ`:

—Nícafíi`baa 'nú' lajii` e cajméer` quíe` e do, jo dsu' 'nú' ja` já^- líng`na'. Joba' ¿jialí` iing`na`

e nifá'túu calé' catú- e jo? Ofa' iim~ba' é e ni'uíng-na' dsea` quiá'r- cajō.

²⁸ Jo mi~ canúu- i dsea` Israel i líng' dsea` fariseo do lado, joba' canaañ` s'f'r i dsea` i ca'láang- do júu` 'ní' jo s'f'reiñ':

—'Nu` lin' jaang` dsea` quiá'- i dsea` í, jo dsu' jnea'^gui dsea` quiá'- 'lii~ yáa'~ Moi~ lí'naa'. ²⁹ Co' jnea'^ ne~baa' røø` e Fidiéeb` dsea` casíiñ- cóo'~ Moi~; jo dsu' i Jesús do júi'~ ja` ne~naa' jie~ fí' lí' jáar'.

³⁰ Joba' lalab cañi'tu i dseañu' i ca'láang- do quiá'- i dsea` do:

—Ee`bi júu` jo, e ja` ní'na' jie~ fí' lí' jáar', dsu' jnea~gui, dsea` í'bing' nicacuø' jnea~ e calijné'e.

³¹ Jo ne~baa' røø` e ja` núu` Fidiéeb` júu` quiá'- jaléng' dsea` røøng` dsee-; co' lajúi'~ dsea` i jmiféng' íbre jogui i jmóo` lajúi'~ e iñ~, júi'~ dsea` í'bing' i núur` júu` quiá'- . ³² Jo ja` jíe' lí' mí canú' júu` e seeng` dsea` i quíi'~ jmíi~ e nijmér- e nilijné' jaang` dsea` i tiuung- latí' mi~ caliséng'. ³³ Cofa' i dsea` la ja` jáar' e casíi' Fidiéeb` quiá'r-, joba' júi'~ coo' ja` e quíi'~ jmíi' lí' jmér- jóng faco' lajo.

³⁴ Jo mi~ canúu- i dsea` Israel i líng' dsea` fariseo e júu` quiá'- i dsea` i ca'láang- do, joba' cajíñ'- casí'-reiñ' lala:

—'Nu`, dsea` cangáan'~ e eáang' silíi'~ dsee- 'nu`, jogui lana, çjiali' 'nu` ni'iin'~ e ní'é'^ jnea'^ jial' né- jmó^oo'?

Joba' i dsea` Israel i líng' dsea` fariseo do caguíiñ` i dsea` i lamí~ tiuung- do conguaí' e fí' dsíi' sináa' guá'- quiá'r- do.

Lafa' tiuum- dsea` mi~ røøiñ` dsee-

35 Jo mi~ cangîgui lajo, caliñi' Jesús e caguim` dsea` Israel i líng' dsea` fariseo do fi' sináa` guá'- quiá'r- i dsea` i lamí~ tiuung- do, jo dseáng'- jo` íng'neiñ' do. Jo mi~ cajíng'tu rúng' Jesús cóo' i dsea` i lamí~ tiuung- do, joba' cajming'í'r- i dsea` do jo casí'-reiñ':

—¿Su já'- líng' 'n# júu^ quiá'- i dsea` i jáa' fi' ñiff- e líiñ' jaang` dsea` jmigüí'?

36 Joba' cañi' i dsea` do quiá'- Jesús jo cajíñ'-:

—Jméel~ jnea~ júu^ i~ i dsea` í, jo lajoba' já'- nilín'n júu^ quiá'r-.

37 Joba' cañi' Jesús quiáñ'- do jo casí'-reiñ':

—Nicañim'bi' dsea` í, jneab~ í cóo' i sin' siin'~ lana.

38 Joba' i dseañu' i ca'láang- do casí'r- uó- jnir~ fi' quiniñ' Jesús jo casí'r- dsea` do:

—Jáb'- lín'n júu^ quií'-, Fí'i.

39 Jo mi~ cangî jo, cajíng'tu Jesús casí'-reiñ' jo cajíñ'-:

—Jnea~ cagá- a fi' jmigüí' la e lí'^ laco' niquidsii- í' quiá'- jalé' dsee- quiá'- dsea` jmigüí', jo lajoba' jaléng' dsea` i lafa' tiuung- uí'~ dsee- quiá'r- ni'uíñ- dsea` i lafa' i jné' tu calé' catú-, jogui i dsea` i í dsí' e jné'r', joba' ni'uíñ- dsea` i lafa' tiuung-.

40 Jo mi~ tí lí~ canúu- e jo cóo' tú- míng'~ dsea` Israel i líng' dsea` fariseo i niteáang- cóo' Jesús ie~ jo, joba' cajming'í'r- dsea` do jo cajíñ'-:

—Jo, ¿su jnea'^ lí'naa' lafa' dsea` tiuum- jóng?

41 Joba' cañi' Jesús quiáñ'- do calé' catú- jo casí'-reiñ':

—Faco' 'ná' líng'na' lafa' dsea` tiuung-, joba' ja` e dsee- oo-na' quiá'- lajúí'~ dsee- quií' na' jóng.

Jogui dsuco' 'nú' í' ó'óna' e lafa' jné'ba', joba' seab' dsee- quí'na'.

10

Jaang`dsea`i jmóo`í` guiá` jo'se` quiá`-

¹ Jo mi~ cangí jo, casí- gui Jesús jaléng' i dsea` i caseáng' do jo cajíñ'-:

—E laba' iin~n jmítaa^ ó'óna', e doñí' ií` dsea` i iing~ nicuá'- iá' fí' lí~ sijníng' jo'se" quié~e jo ja' 'nó'r' e ningíñ- fí' o'ía` quiá'- e iá' do, joba' i dsea` í` líiñ' jaang` íi` i 'léé'. ² Jo dsu' i dsea`gui i í' fí' o'ía` quiá'- e iá' do, joba' dsea` í` líiñ' jaang` i jmóo` í` røø` jo'se" quiá'- . ³ Jogui i dsea` i jmóo` í` jní^ e lí~ teáng'~ i jo'se" do, náa`bre o'ía` e laco' ningíng- i dsea` i jmóo` í` guiá` i jo'se" do. Jo i dsea` i jmóo` í` guiá` i jo'se" do nitó'r' lajaang` lajaang` i jo'se" do quiá'r- lí^ laco' la siíñ' do, jo jaléng' i jo'se" do nicuí'bre' luu~ i fii~re' do. Jo i fii~re' do uøøm`bre i jo'se" do e laco' dsijéng`neiñ' fí' jee~ mó'. ⁴ Jo mi~ cató' e uøøiñ' do lajaléng`ne', joba' 'ñiab' i dsea` do quiér' nifí' quiá'- i jó" quiá'r- do, jo lajob nidsilíng- i jo'se" do laco' ngóo' fii~re', co' guiáb- nicuím`bre' luu~ dsea` do. ⁵ Jo dsu' jaléng' i jo'se" do ja` dsiquí're' dsea` i ja` cuíng`ne', co' lí^ lí` cuíi`bre' mi~ níng`ne' i dsea` la'í, co' ja` cuí're' luu~ i dsea` la'í.

⁶ Jo Jesús casí'r- i dsea` do cóo'~ júu^ lana, jo dsu' i dsea` do ja` cangáiñ' e~ guøng' e júu^ e casí'- Jesús i dsea` do ie~ jo.

Jesús líiñ' jaang`dsea`i jmóo`í` guiá` jo'se` quiá`-

⁷ Jo lalab casí'- gui Jesús i dsea` do jo cajíñ'-:

—E laba' jm̄taa^ óóna': Jnea~ lín'n e jn̄í^ quiá'- e iá' e lí' dsitáng' i jo'se" do. ⁸ Jo jaléng' i dsea` i jm̄igóo` i nicajalíng- laj̄j̄i~ nú'- gui e nigáa' jnea~ do, jaléng' i dsea` í l̄iĩñ' ĩ̄ i 'léé', jo dsu' jaléng' i dsea` i l̄iĩng' lafa' jo'se" quié- e ja` calijí'r~ júu^ quiá'- dsea` do. ⁹ Jo jnea~ fá'túu e lín'n e jn̄í^ do, joba' jaléng' dsea` i íng' jnea~ jogui ninḡiĩñ- fí' e jn̄í^ quié- e do, joba' dsea` íbing' i nilí' nileáng` jee~ jalé' dsee- quiá'- . Co' jaléng' i dsea` do l̄iĩñ' lafa' jo'se" quié- e i cuóøng` lí' dsitáng' jogui uóøng` jogui dsé'bre' e gø're'.

¹⁰ Dsu' laj̄j̄i~ ta~ quiá'- jaléng' i ĩ̄ do lico' jmóor` ta~ uóøng` jaléng' jo'se" quié- e jogui jmóor` ta~ íing- neiñ' jogui jngang' neiñ' cajo; jo dsu' jnea~ gui cagüén- n fí' jm̄igüi^ la e lí'^ laco' niliseeng` dsea` cøøng` cóo'~ Fidiéé` lata~ dseáng'- lí'^ laco' sí'í'. ¹¹ Jo jnea~ lín'n jaang` dsea` i jmóo' í' guiá- jo'se" quiá'-, jo cartí' jáam' 'ñiá'a e laco' ja' ni'íing- j̄j̄i~ jaang' i jo'se" quié- e do. ¹² Jo dsu' i dsea` gui i ja' jí'~ e ta~ jo, jo lico' lí' dsír' j̄j̄i~ e 'léem'-bre, joba' fing caguié- jaang' ie'dsinúu^ lajee` e nír` i jo'se" do jo cuíi'bre jóng, jo dob tiúuiñ^ i jo'se" do. Jo lajob jmóor', co' ja' l̄iĩñ' dseáng'- i dsea` i ní' guiá- jo'se" jogui co' o' jo'se" quiá'- guir cajo. Joba' cuó'bre fí' i ie'dsinúu^ do e nijmeáng'ne' jogui nicúng'ne' i jo'se" do jogui e nisojóng- i caguaang- gui do fí' la fí' na. ¹³ Jo tiúum- i dsea` do i jo'se" do, co' lico' lí' dsír' cuub-, jo ja' ee' fí'í^ oor` quiá'- i jó' i jéeiñ' do.

¹⁴⁻¹⁵ Jo f̄i-túu 'nú' e jnea~ lín'n jaang` dsea` i jmóo' í' guiá- jo'se" quiá'- . Jo lí'^ laco' Tiquiéé` guiáb- cuíiñ' jnea~, joba' lajob jnea~ cajo guiáb- cuín`re; jogui lajobi cajo guiáb- cuíng` jnea~

jaléng^h i líng^g lafa' jo'seⁿ quié^{-e}, joba' lajob cajo jaléng^h î guíab⁻ cúíng^re' jnea[~]. Jogui jnea[~], cartí jáam[~] 'ñiá^h'a e nijúun⁻ⁿ uí^h~ jaléng^h í e laco' ja ni'íng⁻ne'. 16 Jo dsu' seem^bi dsea^h i nabi nilíng⁻ lafa' jo'seⁿ quié^{-e} i ngí' fí' caluu^bi lana. Jo co' ja mí líiñ['] dsea^h quié^{-e}, joba' 'né⁻ nitø[^]baar cajo. Jo jaléng^h i dsea^h i nilíng^g lafa' jo'seⁿ quié^{-e} do nilínúu^h~bre júu[^] quié^{-e}, joba' coob['] 'lé^h ni'uíiñ⁻ lajee[~] lajiiñ^h, jo jíi^h~ jneab[~] dsea^h nijmee[~] e í' ír^h.

17 'Jo Tiquí[']ii' eáam['] 'neáaiñ['] jnea[~] co' nijáang^h 'ñiá^h'a e nijúun⁻ⁿ e laco' nijí[']túu^h calé^h catú⁻. 18 Jo jíi^h~ jaang^h dsea^h sea^h fí' quiá^{'r} e nijngáañ⁻ jnea[~], co' 'ñiá^h'baa dsea^h cuø^{-ø} fí' 'ñiá^h'a e nilín⁻ⁿ lajo, co' seab^h fí' quié^{-e} e nijáang^h 'ñiá^h'a e nijúun⁻ⁿ jogui e nijmee[~] e nijí[']túu^h cajo, co' lajob ta^h caqui^h' Tiquié[^]e.

19 Jo mi[~] tí^h lí^h canúu⁻ dsea^h Israel lajii^h~ júu[^] quiá['] Jesús, calé^h catú⁻ canaañ^h e jo' sñiñ^h røø^h uí^h~ e júu[^] e canúur⁻ do. 20 Joba' fñm^hbre lajee[~] la'ó^h ír canaañ^h sñiñ^h jo sí^h rúñ^h lala:

—¿Jiali['] já⁻ nuu^hna' júu[^] quiá['] i Jesús na? Co' i 'lím^h iuung⁻ dsñiñ^h na. ¡Jaang^h dsea^h ngaam^h líiñ['] na!

21 Jo dsu' i líng^ggui i dsea^h do fé^{'r} jo jíñ[']:

—Jíi^h~ jaang^h dsea^h lí^{'r} fé^{'r} dseáng^h laco' fé^h i dseañ^h na faco' já⁻ e iuung⁻ i 'líng^h dsír[']. Co' jíi^h~ jaang^h dsea^h i iuung⁻ i 'líng^h dsí['] lí^{'r} jmér⁻ e nilijné^h jaang^h dsea^h tiuung⁻ laco'gui cajmé^e i dseañ^h na.

Ja' jíi^h~ dsea^h Israel júu[^] quiá['] Jesús

22 Jo coo['] née^h~ mi[~] cang^ggui lajo, coo['] e jii^h güíi⁻ lajee[~] e jmóo^h dsea^h Israel jmñ^h e jmiguiéng['] dsír['] e caligüeang^h tú calé^h catú⁻ e guá⁻ fé^h quiá^{'r} e sí^h

fi' Jerusalén, cō' lami~ jéeng'gui gab` cajmée` dsea` fi' dsí' jō; ²³ jō ie~ jō, dob táang` Jesús fi' cōō` ni'núú' quiá'- e guá'- fé' do, jō tá'- cōō` íng'~ ngir' e fi' cōō` ni'núú' quiá'- e guá'- do, fi' lí~ sii` ni'núú' quiá'- 'lí~ yúu' Salomón. ²⁴ Jō lajee` ngí' Jesús dob mi~ carí` dsea` Israel fi' lí~ siñ', jō cajmingí'r- dsea` do lala:

—Jō çí~ catí' nijmée'^ júu^ røø` e su 'nu` dsea` ì casing` Fidiée` fi' la e lin' Dsea` Jmáang- ì sijeeng` jnea'^ do ì nicá` nifí' quí'-ii'? Jō lana jmee`-du júu^, çsu 'nu` í'?

²⁵ Jōba' cañí` Jesús quiá'- ì dsea` Israel do jō casí'-rein':

—Nicañí-bíi 'nú' e íb` jnea~, jō dsu' 'nú' ja` já'- calíng-na' júu^ quié-e. Cō' jaléb' e nicañí- 'nú' e nicajmé-e, jmóo`o la'eáang' cōō' ta~ huí' quiá'- Tiquié'e, jō lajalé' e jō cuø` lí~ e íb` dseáng'- lán'n; ²⁶ jō dsu' 'nú' ja` já'- líng-na' e íb` jnea~, cō' ja` líng-na' lafa' jo'se' quié-e. ²⁷ Cō' ì dsea` ì líng' lafa' jo'se' quié-e do nicuí'bre lúu`u, joguí jnea~ nicuíim'baare' cajo, jōba' dsea` í jneab~ dsiquí're'. ²⁸ Cō' jnea~ cuøø`-baa jaléng' ì dsea` í e seeíñ` cøøng` cōō'~ Fidiée` lata~, jō ja` tóō` jmíi~ fa' ni'náíñ` quiá'- Fidiée` o'gui fa' quí'- jmíi~ e ii` nijéng'-tu' jaléng' ì dsea` í fi' jaguóo`o. ²⁹ Jō lajíi~ e nicangín'n e nicacuø' Tiquié'e jnea~, e jō lí' e niing'-gui eáang' lajee` lajalé', jō jíi~ jaang` dsea` quí'r~ jmíi~ fa' e niguí'-guir e jō. ³⁰ Jō jnea~ cōō'~gui Tiquié'e jaam` dsea` lí'naa'.

³¹ Jō mi~ canúu- dsea` Israel lajíi~ e cajíng'- Jesús, jōba' casítí'r` cuu~ calé' catú- e lami~ iíñ` niquíúíñ'- dsea` do cartí' nijngáng'-neiñ'. ³² Jō lalab cajíng'- Jesús quiá'- ì dsea` Israel do jō casí'-rein':

—Jmigiub' jalé' e quí'~i jmí~ e nicajmé' e jee' 'nú' la'eáang' cóo'~ güea'^ quíá'- Tiquié'e. Jo lajee' lajalé' e jo, çjnang' e catúng' e nijngáng'^na' jnea' cóo'~ layaang'~ çuü'?

³³ Joba' lalab cañí' dsea' Israel quíá'- Jesús jo cajíñ'~:

—Ja' í' dsi' jnea'^ e nijngáng'^naa' 'nu' uí'~ jalé' e guíá' e nicajmee'~ do, có' nijmé'naa' lajo uí'~ e gab' lí' e júu^ e fó' na fí' quini' Fidié'e. Có' 'nu' jji'~ dsea' jmigüib' lín', jogui iin'~ jmé'e'^ e røøb' cøøn' cóo'~ Fidié'e'.

³⁴ Joba' lalab cañí' Jesús quíá'- i dsea' do jo casí'~ reiñ':

—Jo lalab fé' Fidié'e' fí' ni' júu^ quíu' ta' quíá'r'~: "Jnea' fá'a e 'nú' líng'na' laco' dié'e'." ³⁵ Jo nine'baa' røø' lajji'~ e fé' e fí' ni' jì' quíá'- Fidié'e' do e ja' cuøøng' fé'^naa' e o' já'-; jo e fí' ni' e júu^ do quíá'- Fidié'e' fé' e jaléng' dsea' cóo'~ i casíng' Fidié'e' júu^ quíá'r' líiñ' laco' dié'e'. ³⁶ Jo có' Fidiéeb' dsea' caguíñ' jnea' jogui casíñ' jnea' fí' jmigüí' la, joba', çjial cuøøng' fo'^ 'nú' e jnea' fá'a júu^ e ga' fí' quini' Fidié'e' mi' fá'a e Jóó' dsea' íb' lín'n? ³⁷ Jo ja' já'- güilíng'na' jnea' song jnea' ja' jmóo'ò dseáng'~ laco' la jmóo' Tiquié'e. ³⁸ Jogui dsu' song jmóo'b'í e quí'~i jmí~ do e nañí' fa' ja' já'- líng'na' jnea', joba' lí'^ já'- güilíng'na' cóo'~ jalé' e quí'~i jmí~ do e laco' niliñí'na' e jaam' dsea' líng' jnea' cóo'~ Tiquié'e, jogui lajob' ír' cóo'~ jnea' cajo.

³⁹ Jo mi' canúu' dsea' Israel lajji'~ e cajíng'~ Jesús do, joba' caléb' catú' lamí' iñ' e nisáiñ' dsea' do, jo dsu' dsea' do dsifib' caleáang' 'ñia'r'.

⁴⁰ Jo mi' cang' jo, caquim'~ tu Jesús fí' lí'^ lí' 'ngóo'~ gua' Jordán, jo fí' dob cajer' e fí' lí' caseáang' Juan

jm̄ī~ jaléng' dseá lam̄ī jéeng'gui. ⁴¹ Jo lajee' táang' Jesús fí jo, i f̄im' dseá cangolíng' e iin̄~ ninúr- júu' quiá'- dseá do, jo lalab fé' i dseá í:

—E jáb'- e i Juan do ja' cajméer' j̄ī~ coo' e li' e quí'r~ jm̄ī~ lajee' cateáañ' fí jm̄igü' la, jo dsu' lajaléb' e cajíñ'- uii' quiá'- i dseañu' la, dseáng' jáb'-.

⁴² J̄oba' ie~ jo i f̄im' dseá i já'- calíng- júu' quiá'- Jesús e fí jo.

11

Mi~ cajúng- jaang' dseañu' i sii' Lázaro

¹ Jo mi~ cang'gui lajo, lajee' e táam'bi Jesús fí jo, jo ie~ jo niseeng' jaang' dseañu' i sii' Lázaro cóo'~ gui gáng- gui dseam' rúin', jaang' i sii' Yá^ jogui jaang' i sii' Marta, jo laj' gaain' do seein' fí coo' f̄i' li' sii' Betania. Jo ie~ jo guiáang'~ ráang' Lázaro e dsée'r~.

² Jo i dseam' i sii' Yá^ i rúng' Lázaro, íb' i ca'ée- jm̄ī~ jmeaf̄ī~ t̄ī~ Jesús jogui cajmiquiú'r- cóo'~ jñuguir~ t̄ī~ dseá do lam̄ī~ jéeng'gui. ³ Jo co' eáam' dsée'~ gui Lázaro, j̄oba' i dseam' rúin' i gáng- do casíñ' júu' fí li' táang' Jesús, jo lalab júu' quié' i dseá do quiá'- Jesús:

—E lab júu' quiee-, e i dseá i seeng' røø' cóo'~ do i eáam' 'neáan' do i sii' Lázaro eáam' líiñ' lana.

⁴ Jo dsifí mi~ canúu- Jesús e jo, j̄oba' lalab cañír' quiá'- i dseá do:

—Jo e jmohuí' e líiñ'- do ja' nijéng- ír' fí ni' 'mó-, co' e jo nilí'íng' ta~ e lí' lacó' niliñí' dseá jial tí' 'gøng' Fidiée', jogui lacó' niliñí' dseá cajo jial tí' 'gøng' jnea~, dseá lín'n Jóo' dseá do.

5 Jo doñí fa' eáam' 'neáang` Jesús ì dseam' ì siì Marta do jogui ì siì Yá^ jogui ì dseañu' ì siì Lázaro do, 6 dsu' ja` cangór- dsifí' fí' quiáin'- do mi~ caliñir' e niráang` ì Lázaro do dsée'r~, jo cajmí' ì m~ bi' ñia'r' tú- jmí~ gui e fí' lí~ táaiñ` do. 7 Jo mi~ cangí e tú- jmí~ do, joba' lalab casí'- Jesús ì dsea` quiá'r- do:

—Má-túu' fí' lí~ se' Judea.

8 Joba' cañí' ì dsea` í' quiá'- Jesús, jo casí'r- dsea` do:

—Tifa', ja' mí' ngóo' bi' eáang' e jaléng' dsea` Israel ì seeng' fí' jo lamí~ iin~ nijngáin'- 'nu' cóo'~ layaang~ cuu~, jo 'nu' caléb' catú- iin'~ guó' fí' jo.

9 Joba' cañí' Jesús quiá'- ì dsea` quiá'r- do jo casí'- reiñ':

—E jáb'- e sea` guitu' oor~ lajee~ e jmí'; cofa' jaang` dsea` ngir' lajee~ e jmí' do, joba' ja` dseáang'- niquiúin'-, co' jneáb' lí~ ngir'; 10 jo dsu' song jaang` dsea` ngir' fí' cóo' lí~ nuu~, joba' quiung' guiáam' bre ngir', co' ja' sea' jí' cóo'~ e cuø' e jneá' lí~ ngir'.

11 Jo mi~ cangí e café'r' e júu^ na, jo cajíng'- guir casí'r- ì dsea` quiá'r- do:

—Ì dsea` rú' uu' ì siì Lázaro do nicaquiam'- bre, jo dsu' lana ninii~ i e nijmijnéetúu dsí' bre.

12 Joba' cañí' ì dsea` quiá'- Jesús do, jo cajíñ'- casí'r- dsea` do:

—Fí' naa', jo laco' fó' na e nicaquiam'- ì dseañu' í, joba' e jo cuø' lí~ e nitíim'~ tur.

13 Jo dsu' cajíng'- Jesús lado co' e nicajúm- ì Lázaro do, jogui ì dsea` quiá'r- do í dsíir' e já'- ba' e lí' güm' Lázaro lí' laco' gui jí'~ e nicajíng'- dsea` do. 14 Joba' cajíng'- Jesús casí'r- ì dsea` quiá'r- do dseáng'- lajang'- jo casí'- reiñ':

—Lana niráang` Lázaro 'liim~bre. ¹⁵ Jo guiá~gui quíi~ 'nú' e ja` mi` ngóo`o fí` do latí` lana, co` lajoba' e já~gui nilíng`na' júu^ quié~e, joba' eám` íáang` dsii~. Jo lanaguiba' dsé^ee' fí` quiá'r~.

¹⁶ Jo i dsea` quiá~ Jesús i sii` Tomás i lineang` dsea` suung~ mi~ canúur~ lajii~ e júu^ jo, joba' casí'r~ i dsea` rúin~ i caguiaang~ gui do lala:

—Má~aa' jneaa~aa' cóo'r~ cajo, jo song cajnga' dsea` quiá'r~, joba' la quié` jneaa~aab' nijúu~naa' cóo'r~ cajo.

Jesús i cuø' e jí'tu dsea` mi` ningf e júuin~

¹⁷ Jo mi~ caguié~ Jesús colíing~ cóo~ dsea` quiá'r~ e fí` Betania e fí` lí~ cajúng~ i Lázaro do, jo níngoo` quiú` jmiib~ e nica'áng~ dsea` do mi~ caguiliin~ fí` jo. ¹⁸ Jo e fi~ e sii` Betania do ja` huíi~ néé' laco'gui Jerusalén, co' túb'jiu jíi~ la 'ní` kilómetro, ¹⁹ joba' fíim' dsea` Israel i neáang' fí` jo cangoliiñ^ e cango'eer~ i Marta do cóo~gui Yá^ e laco' ja` liin~ do fi'í^ uii~ quiá~ e cajúng~ i rúin~ i sii` Lázaro do. ²⁰ Jo mi~ caliñi` Marta e níngoo` Jesús fí` do, joba' cagüi'ír' e cangojmijíñ' dsea` do; jogui i Yá^ rúin~ do, dob cajer' fí` sinúu^ lajee~ jo. ²¹ Joba' mi~ cajíng' i Marta do Jesús, lalab casí'r~ dsea` do jo cajíñ~:

—Fa' jiu~gui mi~ cagüén~ jéeng'guijiu fí' la, joba' ja` cajúng~ i rún~n do jóng faco' lajo. ²² Jo dsu' tab~ dsii~ e quíb~ jmi~ e nijmicóo~ Fidié~ jnea~ song nimí~ire lajo, co' doñi' ee' e mí~ 'nu' dsea` do, dseáng~ ngíim'ba'.

²³ Joba' cañi' Jesús quiá~ i dseam~ do jo casí~rein~:

—Nijíb'tu i rún~ do.

²⁴ Joba' cañi' i dseam~ do quiá~ Jesús jo cajíñ~:

—Jáb'ⁿ, niñi'baa e jo e nijíb'tu i rún'n do mi~ nití' í' e nijí'tu jaléng'ⁿ 'lii~ mi~ tí' lí' jo.

25 Jo mi~ cangî jo, lalab cañí'tu Jesús quiá'ⁿ i dseamî do jo casí'ⁿ-reiñ':

—Jneab~ dsea` i cuø e jí'ⁿ dsea`, jogui e nijí'tur mi~ ningî e nijúuiñⁿ. Joba' jaléng'ⁿ i dsea` i já'ⁿ líng` júu^ quiéⁿ-e, jo nañí' fa' júungⁿ jí'ⁿ ngúu' táaiñ, dsu' ja` tóo` jmiñⁿ fa' ni'náiñ` e seeiñ` cøøng` cóo'ⁿ Fidiéⁿ; 26 jogui jaléng'ⁿ dsea` i já'ⁿ líng` júu^ quiéⁿ-e jogui e seem'bir mi~ tí' lí' jo, joba' ja` tóo` jmiñⁿ fa' ni'náiñ` e seeiñ` cøøng` cóo'ⁿ Fidiéⁿ cajo. Joba' ¿su já'ⁿ lín'ⁿ jalé' e júu^ e fiñ` i 'nu' la?

27 Joba' cañí' i dseamî do quiá'ⁿ Jesús jo casí'rⁿ dsea` do lala:

—Lajob líí, Fí'i, dseáng'ⁿ jáb'ⁿ líng` jnea~ e 'nub` lín' i Jóo' Fidiéⁿ camíng'ⁿ i sijeeng` jnea'^ i nijáa' fí' jmiñ'ⁿ la i nicá' nifí' quí'ⁿ-i'.

Mi~ caqui' Jesús tñ- ée` quiá'ⁿ Lázaro

28 Jo mi~ cangî e síng` Marta cóo'ⁿ Jesús, caquim'ⁿ-bre e cangotéer` i rúin' i sii' Yá^ do. Jo mi~ caguiéiñ'ⁿ fí' quiá'rⁿ, lalab casí'rⁿ i rúin' do lí' ja` núu` dsea` jo cajíñ'ⁿ:

—Dob guing~ i tifa' do, jo 'nub` tó'r` lana.

29 Joba' dsifí' mi~ canúuⁿ Yá^ e júu^ jo, ladsifí' lanab cagüi'ñir' jo cangórⁿ fí' lí' tó' Jesús ír'. 30 Jo Jesús ja` mí' calí'bir e fí' jee~ fiñ` do, co' dobi guiiñ~ e fí' lí' cajíng' rúin' cóo'ⁿ i Marta do. 31 Jo mi~ tí' lí' calí' i dsea` Israel i caguilíngⁿ cango'eeⁿ ír` e laco' ja` liñ' do fí'í', jo mi~ cangárⁿ e cagüi'ñir' i Yá^ do lajmináⁿ e fí' dsí' sinúu^ quiá'rⁿ do, joba' cangolímⁿ-bre ti'leáaiñ' cajo laco' ngóo' i dseamî

do, co' í dsír' e ngoiñ' do ngoquí'bre e fí lí ca'áng- i 'lii' rúñ' do.

³² Jo mi' tí lí caguié- i Yá^ do fí lí sing' Jesús, ladsifí lanab casí'r- uó- jnir' fí quini' dsea` do jo casí'r- dsea` do lala jo cajíñ'-:

—Facó' mi' 'nu` cagüén'- jéeng'guijia fí la, joba' ja` cajúng- i 'lii' rún' n do jóng facó' lajo.

³³ Jo mi' tí lí cangá- Jesús e qui' i Yá^ do cóo'gui jaléng' i dsea` Israel i caguilíng- cóo'r~ do, joba' eáam' calicu' dsír' i dsea` do, jogui eáam'bi calijiuung~ dsír' cajo, ³⁴ joba' cajmingí'r- jaléng' i dsea` do jo casí'-reiñ':

—¿Jie' fí lí ca'áng-na' i dsea` do?

Joba' cajíng'- jaléng' i dsea` do casí'r- Jesús:

—Má-aa' jo madsijóø^naa' fí jo.

³⁵ Jo canaang` Jesús qui'bre cajo. ³⁶ Jo mi' calilí^ i dsea` Israel do e qui' Jesús, joba' lalab cajíñ'-:

—¡Eáam' ni'neáang` i dseañu` na i 'lii' na!

³⁷ Jo dsu' jee` i dsea` Israel do seem`bing' i fé' lala:

—I nabi i dseañu` i cajmée` e calijné' i dsea` i lamí~ tiuung- do, jo ja` i ñí jialí' ja` cajméer` fa' e ja` cajúng- i dseañu` i nica'áng- na.

Mi' cají'tu Lázaro

³⁸ Jo fí dsír' tó` cuub~ ca'áaiñ- i 'lii' Lázaro do, jo o'ná^ e ée` do cajnír' cóo'~ cóo` 'loo' e fe'. Jo eáam' lijiuung~ dsír' Jesús cangoquiéeiñ' e fí lí ca'áng- i 'lii' do. ³⁹ Jo lalab cajíñ'- casí'r- jaléng' i dsea` i teáang- do ie~ jo:

—Je'na' e 'loo' e sijní e o'ná^ e ée` na.

Jø dsu' mi~ canúu~ i dseamî i sii` Marta do i rúng' i`lii~ do e cajíng' Jesús lado, jøba' lalab casí'r~ dsea` do:

—Fíi`naa', quiú` jmiî~ ningóó' e ca'áng~ i rún`n na, jø lana nisi'léb` ngúu' táaiñ, faa~aa'.

⁴⁰ Jø lalab cañii` Jesús quiá'- i dseamî do:

—¿Já^ mí cafíi~ i 'nu' e song dseáng'- já'- líin' júu^ quié~e, jøba' nimó^ba' jóng jial tíi' laniing~ 'gøng' Fidiéé~?

⁴¹ Jø mi~ cangî jø, cajéb' i dsea` do e çuú~ e sijní' fí' o'nú^ ée` quiá'- i Lázaro do, jogui Jesús dsifí lanab cajøør~ fí' yú^ jmigüû jø cajíñ'-:

—Teaa~, lana cuøø~ø 'nu' gui'máang'~, ço' jáb'- canúu'- júu^ quié~e. ⁴² Jogui ñi`bíi guiá~ cajo e contøøm~ já'- nuu' 'nu' júu^ quié~e, jø dsu' fíi~ i 'nu' lana e lí^ laco' jaléng' i dsea` i teáng~ la jmiî~ na nijá'- líiñ e 'nu' dsea` casíin' jnea~ fí' jmigüû la.

⁴³ Jø mi~ cangî e cajíng'- Jesús e júu^ na, jø café'r teá jø cajíñ'-:

—jJúu' fí' lí~ iuun'- na, Lázaro!

⁴⁴ Jø mi~ calí~ e café' Jesús lajo, jøba' dsifí lanab cagüi'íi i dsea` i lami~ 'liing~ do, jø laco' sibé`bi 'mi' guotíir~, jogui nir~ sibé` ço` jmáang'~ 'mi'. Jø mi~ cangî jø, lalab cajíng' Jesús casí'r~ i dsea` i teáng~ do ie~ jø:

—Síi`na' e 'mi' e sibeáng' i dsea` i cají'tu na, jø lajøba' cuøøng' e ngír~.

Mi~ casíng~ dsea` i quié' nifi' quiá'- dsea` Israel e nisáñ' Jesús

(Mt. 26:1-5; Mr. 14:1-2; Lc. 22:1-2)

⁴⁵ Jø mi~ cangîgui lajo, i fíim' dsea` Israel i cangolíng~ çoçó' Yá^ do já'- calíñ~ júu^ quiá'- Jesús,

co' cangá-bre jalé' e quí' dsea` do jmí' ie~ mí' cajméer` e cají'tu i Lázaro do. ⁴⁶ Jo dsu' i líng' gui i dsea` Israel i cangá- e cajmée` Jesús do cangocóor` júu^ fí' quini` jaléng' dsea` góor` i líng' dsea` fariseo jalé' e cangár- do. ⁴⁷ Jo mí' caliñi' i dsea` fariseo do e jo, joba' casíiñ- cóo'~ jaléng' fii~ jmidsea` e laco' niseáng' i dseata` i quie' nifi' quía'- dsea` Israel e laco' nisíiñ- e~ nijmér- cóo'~ Jesús. Jo lalab jming' rúíiñ':

—¿E~ nijmó'oo' cóo'~ i dseañu' do? Co' eáam' jmiguiá' jalé' e quí'r~ jmí' jmóor` e dsigá' dsí' dsea`. ⁴⁸ Jo song ja` nijning~naa' quía'r-, joba' fíim' dsea` nidsitáaiñ- cóo'~ dsea` do, jo dseáam' e dseata` i neáng' fí' Roma nija'íiñ- guá'- quí' ii' osi lajaléng'naa' dsea` lí'naa' dsea` Israel fíng song caliñir' jalé' e jo.

⁴⁹ Jo jaang` lajee` i fii~ jmidsea` do nisiir` Caifás, jo líiñ' fii~ quía'- jaléng' jmidsea` ie~ jo, joba' lalab cajíiñ'- casí'r- jaléng' i dsea` rúíiñ' caguaang-gui do jo café'r':

—¿Dseáng'~ jíi'~ cóo' ja` ee` ní' 'ná'! ⁵⁰ Jo ja` í' óo'na' e guiá-gui quí-ii' e nijúung- jaang` dsea` góo'naa' cuaiñ~ quí-ii' lajalé'naa' e laco'gui e ni'íng-naa' lajaléng'naa' dsea` lí'naa' dsea` Israel.

⁵¹ Jo i Caifás do ja` cajíiñ'- lajo uíi' e la tiiñ' 'ñia'r', dsu' fii~ jmidseab` líiñ' ie~ jo, joba' Fidiéeb` cacuø' ír` e cajíiñ'- lajo e Jesús nijúuiñ- cuaiñ~ quía'- jaléng' dsea` góor` dsea` Israel; ⁵² jo o' jíi' e nijúung- dsea` do uii~ quía'- jaléng' dsea` góor`, co' lajob cajo nijúuiñ- e laco' nitó'r' jaléng' dsea` quía'- Fidiéé` i siguiáng'^ fí' la'úng- fí' jmigüi' e laco' ni'uíiñ'- do cóob` 'lé' lajee` lajaléiñ'. ⁵³ Joba' latí'

ie~ jòb canaang` jaléng` ì dseata~ quiá'- dsea` Israel do e 'nó'r' jial e nijngáin~ Jesús.

54 Jò uing~ lajòba' jò 'ga' li~ jmijnéeng`gui 'ña' Jesús jee~ jaléng` dsea` góor` dsea` Israel, jò cagüí`bre e fí' lamí~ táaiñ` do e li~ se' Judea, jò fí' dob cangór~ fí' còo` fii` e sii` Efraín e née' quiá'- fí' guóo'~ uó^ quiú', jò fí' jòb cajer' còo'~ jaléng` dsea` quiá'r~.

55 Jò mi~ cangí`gui lajò, lajee` e nijaquíéeng' jmii~ e quiá'- títng` dsea` Israel e jmóor` lacoó` jii` e sii` Pascua, jòba' quiá'- tiiñ` e dsilíin~ fí' Jerusalén ná'-gui e jmii~ jò e laco' jmiguiúng~ yaaiñ~ fí' quini` Fidiéé` jò dsiguiar~ guiú' lajii'~ e quiá'- tiiñ` jmóor` do.

56 Jò mi~ caguilíng` ì dsea` Israel do fí' Jerusalén, jò seem`biñ' do ngír' ta~ 'náng' Jesús ie~ jò, jògui jmíngí'~ rúin~ lajaang` lajaaiñ` lajee` e teáaiñ'~ fí' dsí' sinúu^ guá'- fé' e sí' fí' jò, jò síin~:

—Jò ¿e~ fól' 'nú'? ¿Su nijáa`gui ì dsea` í fí' la lajee` jmii~ òsi ja` nijáar` é?

57 Jò jaléng` dsea` Israel ì líng' dsea` fariseo còo'~gui jaléng` fii~ jmidsea` quiá'r~ nicangíin~ júu^ quiá'- jaléng` ì dsea` ì caguilíng` e jmii~ do e song jaang` lajee` ír` nija'r~ júu^ jie~ fí' táang` Jesús, jò e güijmée`bre júu^ ladsifí', jò lajòba' e niteng`^ dsea` do.

12

*Mí' ca'éé` jaang` dseamí` jmii` jmeafíi` tii` Jesús
(Mt. 26:6-13; Mr. 14:3-9)*

1 Jò mi~ cangí`gui lajò, jñúu~ jmiiib~ jmóo`gui e nití' e jmii~ Pascua quiá'- dsea` Israel do, jò cangób~ tu Jesús fí' Betania e cango'ee`tur Lázaro ì

cajméer` e cají'tu ie~ lamí~ jéeng'gui do. ² Jo mi~ tí lí caguiér- fí' quíá'- dsea` do, i dsea` seeng` fí' sinúú^ do cajméer` coo` jmí~ e jmí'gór` Jesús, joba' cagó'r` colíng~ ie~ canuu` e jmí~ jo; jo dob guing~ Lázaro e gø'r` colíng~ cóo' i dsea` do cajo, jogui i rúíñ' i sii` Marta do, íb` i jmóo` ta` ngíng` jmiñí` quíá'- jaléng' i dsea` i neáang` gø' do ie~ jo. ³ Jo lajee` guing~ Jesús gø'r`, coo` caguiéb- Yá^ i rúng' Lázaro fí' lí guing~ dsea` do, jo quier` coo` dsuu- niguó'^ e a trescientos gramos jmí` jmeafíi` e líi' cóo'~ layaang~ nardo e 'mo'^ eáang', jo cóo'~ e job ca'éer- fí' tí- Jesús lajee` e guing~ dsea` do gø'r'; jo mi~ cangí jo, cajmiquiú'r- cóo'~ jñuguir~. Jo latøøm- e fí' dsíí sinúú^ do cajó- jmeá' quíá'- e jmí` jmeafíi` do ie~ jo. ⁴ Jo mi~ cangoyúung'~ e jo, jaang` lajee` dsea` guitúung` quíá'- Jesús i sii` Judas Iscariote i nisi'í^ i ni'níng- dsea` do, lalab cajíng'- í ie~ jo:

⁵ —¿Jialí' ja` mí cango'ní~ e jmí` jmeafíi` la cóo'~ 'ní' ciento cutee` e laco' nilísea` cuu- e nilicóo'~ jaléng' dsea` tíñíng-?

⁶ Jo cajíng'- Judas Iscariote e jo dsu' o' já'- dseáng'- e fíi` líiñ- jaléng' dsea` tíñíng-, co' jaang` íib` líiñ' do, co' ie~ jo íbre dsea` néé' nir~ taloo` téé'~ cuu- e líi' quíá'- Jesús colíng~gui cóo'~ i dsea` guitúung` quíá'- do; joba' i Judas Iscariote do gui'bre e cuu- do mi~ iíñ- 'ñia'r'. ⁷ Joba' lalab cañíi` Jesús quíá'- i dsea` í:

—Ja` e fí' jii'~ coo` i dseamí na, co' lajii'~ e nicajméer` na e nicaguiar' guiá- quíé'-e mi~ nití- í' e quíá'- níám-baa. ⁸ Jo contøøm- cuóøng` lí jmicóo'~ 'nú' jaléng' dsea` tíñíng-, jo dsu' jnea~gui ja` contøøng- táan'n cóo'~ 'nú' fí' jmígüi' la.

Mi~ ca'í dsú' dsea` e nijngáin~ i Lázaro do

⁹ Jo mi~ cangf̂gujiu lajo, i f̂im' dsea` Israel caliñir e dobi táang` Jesús e fí Betania do. Joba' cangolíñ^ cangoĵo^bre fí jo, jo dsu' o' ĵi~ Jesús dseáng' i ngir' 'náiñ' do, co' laĵob 'náiñ' Lázaro cajo i cajmée` Jesús e cají'tu calé' catú-. ¹⁰ Joba' i fii~ jmidsea` do casíiñ- r̂ô e la quie' tí Lázarob nijngáin~, ¹¹ co' fé' i dsea` Israel i quie' nifí do e uíi~ íb' f̂ing' i dsea` góor` do ninaang` 'naaiñ' cóo~ i dsea` rúin~ caguaang- gui do, jo cóo~ Jesús ninaaiñ` dsitáaiñ-.

Mi~ ca'í- Jesús fí jee~ f̂i Jerusalén

(Mt. 21:1-11; Mr. 11:1-11; Lc. 19:28-40)

¹² Jo lajee~ nú'- gui jm̂ Pascua e tí fí Jerusalén do, f̂im' dsea` cangolíñ^ fí jo e cangotíñ~ e jm̂ do; jo mi~ cajneá- coo'gui jm̂, job caliñí dsea` e tí niguiée' Jesús fí Jerusalén e quiá'- e jm̂ do. ¹³ Jo mi~ caliñí i dsea` do e jo, joba' cangoquiúur' moo` quiee-, jo cangolíñ^ cango'íñ~ Jesús catí caluu' f̂i e quiá'- nijmiféiñ' dsea` do. Jo mi~ ca'íñ' dsea` do, lalab fé'r` teá e íaang` dsíir':

—iMajmifém'baa' i dsea` na! ĵogui juguiá~jiu quiá'- i dsea` na i casíing` Fidiée' fí jm̂gúí la cuaiñ~ quiá'r'! ĵogui majmifém'baa'r cajo i dsea` na i líng' dsea` güeang'^ i quie' nifí quiá'- jaléng' dsea` góo'naa' dsea` Israel!

¹⁴ Jo lajee~ iuung- Jesús fí, lado cadséiñ' jaang` bú^, jo íb' caguár' lí^ laco'gui la fé' fí ni~ ĵi quiá'- Fidiée' e cajme' dsea` malí~gui eáang' lí' fé' lala:

¹⁵ Ja' f̂oong'~na' jaléng' 'nú' i seeng' fí f̂i Sión; jo ĵo-na', lab nijáa' i dseata~ dsea` féng' quií-na' e guin~ fí mocóo~ jaang` bú^ jiuung~.

16 Jo dsu' la'uui~ ja` calilí'^bi i dsea` guitúung` quiá'r- do e` guóng` jalé` e do; lí^ mi~ cangágui lajo, mi~ cangá e cangáng'-tu Jesús fí` ñifí-, joguib calilí'^ i dsea` do e jalé` e cajmée` Jesús do ninitóob` fí` ni~ jì quiá'- Fidiée` e cajme' dsea` lajii~ malii~ gui eáang` lí` fé' uii~ quiá'- Jesús.

17 Jo ie~ jo, jaléng` i dsea` i cangá- mi~ cató'- Jesús i Lázaro do e nigüi'íiñ' do fí` dsí' ée` quiá'r- co' cajib'tur, joba' jaléng` i dsea` íb` i cani' e júu^ jo jee~ jaléng` i dsea` caguiaang- gui do. 18 Jo lajob i fíim` dsea` cangolíñ^ e cangojmijíñ' Jesús, co' caliñíbre jalé` e quíi~ dsea` do jmii~ e cajméer` e fí` do ie~ jo. 19 Jo i dsea` Israel i líng` dsea` fariseo do lalab síiñ` la'ó` yaaiñ`:

—Nab nimóo- 'nú', jii~ coo` ja` e quíi~naa' jmii~ nijmóo' lana, co' jnéeng- ne'baa' e jia' ja' lajiiim` dsea` nisitáaiñ^ cóo' i Jesús na lana.

Mi~ ca'nang'- dsea` griego Jesús

20 Jo jee~ jaléng` i dsea` i cangolíng` fí` Jerusalén e cangojmiféiñ' Fidiée` lajee` e jmii~ jo, jee~ i dsea` íb` niquiéeng` coo` tú- máng` dsea` griego. 21 Jo i dsea` griego do cangoquiéeiñ' fí` lí~ sing' jaang` dsea` guitúung` quiá'- Jesús i sii` Lii~, jo í seeiñ` fí` Betsaida e néé` lí~ se' Galilea, jogui i dsea` griego do camí'r` jmi'ee` i Lii~ do jo casí' reiñ':

—Dsíng` ii~ jnea'^ e nilicúing`naa' Jesús.

22 Joba' dsifí mi~ canúu- Lii` e jo, cangó-bre cangosí'r` Df` i líng` jaang`gui dsea` guitúung` rúíñ` cajó, joba' laji` huáam-bre cangolíñ^ e cangojmée'r` júu^ Jesús lajii~ e jíng'- i dsea` griego do.

23 Joba' lalab cañí` Jesús quiáiñ'- do:

—Lana tí nití- í' quié-e e ninín^túu fí ñíff- fí lí cagá-a mi~ cagüén-n fí la e lán'n jaang` dsea` jmigüí. ²⁴ Jogui jnea~ jmitaa^ óo'na' e fa' camí^ micui'iee` e ja` mí cató^ fí ni~ uó^ jo o'gui ní~ cajo, joba' lami~ líb' lí' e camíb'^ e mijú` do; jo dsu' song camí^gui e micui'iee` do catób' fí ni~ uó^ jogui caníib'^, joba' jmiguiab' ni'uíng^- do mi~ niró. ²⁵ Cofa' i dsea` i eáang'gui guing~ dsíí jalé' e dsijéé' fí jmigüí la, joba' ni'ím- quiá'- i dsea` í mi~ tí lí jo; jo dsu' i dsea` i ja` guing~ dsíí jalé' e dsijéé' fí jmigüí la, joba' i dsea` í guíab- ni'uíng- quiá'r- mi~ tí lí jo, co' cøøm` niliseeíñ` cío^ Fidiéé` lata. ²⁶ Jogui song jaang` dsea` iíñ~ e nilíñ- jaang` dsea` i jmóo` lajúí~ e iin~n, joba' 'né- ngír- colíim~ cío^ jneab~; jogui lacaang` jie' fí lí seen~, joba' fí job 'né- seeíñ` cío^ jnea~ cajo. Jo song seeng` dsea` i jmóo` lajúí~ e iin~n, joba' Tiquié'e dsea` guing~ ñíff- nijmi'gó^bre i dsea` í cajo.

Mi~ cajíng^-tu Jesús e nijngáng^- dsea` ír`

²⁷ Jo fá'guí lana e dseáng^- dsíng^- nijáa' fí í quié-e; jo ¿e~ nijmee~e? ¿Su nífá'^a: “Teaa~, leaang- jnea~ jee~ jalé' iihuí' e nidsingún-n do”? U~, o' lajo, co' jnea~ cagá-a fí jmigüí la e lí^ laco' nidsingún-n jalé' e jo. ²⁸ Joba' fí i 'nua', Teaa~, jmee- e laco' nijmi'gó^ dsea` 'nua'.

Jo dsifí mi~ cangí e cajíng^- Jesús lajo, joba' guicanú^ co^ luu~ fí yá^ jmigüí, jo guicajíng^- lala:

—Nícajmé-baa lajo, jo dsu' tí lí~ nijmee~baa calé' catú^-.

²⁹ Jo jaléng' i dsea` i teáang- núu` do ie~ jo cajíñ^- e líng~ ee` guicangoo` fí yá^ jmigüí; dsu' i líng~ gui i dsea` do fé'r`:

—Jaang` ángel i niguicafé` na.

³⁰ Jō mi` cangf̄ jō, jō cañí` Jesús quiá` i dsea` do jō cajíñ`:

—Ja` catíng` jnea` e guicajíng` e luu` do, co` 'náb` dsea` catíng`-na' e jō. ³¹ Jō lanab catí` í` e Fidiéé` niquidsir` í` quiá`- jaléng` dsea` jmigüí` uii` quiá`- jalé` dsee` quiá`r-, jōgui lanab cajo catí` í` e ni`íng`- bí` quiá`- fii` i 'líng` i quiu` ta` fí` jmigüí` la. ³² Jō dsu` mi` ningf̄ e niteáng` dsea` jnea` fí` dse` crúu` e laco` nijúun`-n, jō lajoba` nitóø`ø` jaléng` dsea` e laco` ni`uíñ` dsea` quié`-e.

³³ Jō cajíng`- Jesús lana co` niñí`bre guiú`- jial nijnga`- dsea` quiá`r-. ³⁴ Jō mi` tí` lí` canúu`- jaléng` dsea` i teáng`- do ie` jō e júu` quiá`- Jesús do, jōba` lalab cañír` quiá`- dsea` do:

—Níneb` jnea` røø` e tōø` fí` ni` jì` quiá`- Fidiéé` e latab` niliseeng` Dsea` Jmáang`, jōba` çjialí` fó` 'nu` e i dsea` i jáa` fí` ñiff`- e líiñ` jaang` dsea` jmigüí` 'né`- nisáiñ` fí` yú`^ mi` nijnga`- dsea` quiá`r`? Jōgui çí` i dsea` i julí` na?

³⁵ Jōba` lalab cañí` Jesús quiá`- i dsea` do:

—Jnea` bi e jì` e jneá` jee` 'nú` lajee` lana, jō dsu` jō` huøø`- e líng`guí` lajō jee` 'nú` fí` la. Jōba` jmí`úum`ba' e seem`ba' guiú`- lajee` e seem`bí` jee` 'nú` fí` la e laco` ja` nilí` e lí` nuu` do 'nú`. Dsaco` jaléng` dsea` i seeng` e fí` lí` nuu`, jōba` jíí`- ja` ñír` jie` fí` lí` seeiñ`. ³⁶ Jōba` jáang`- yaang`-na' e fí` lí` jneá` jì` do lajee` e seem`bí` jee` 'nú` e laco` qui`- jmí` e niliseeng`-na' contøøng`- fí` lí` jneá` jì`.

Jō mi` tí` lí` cangf̄ e cajíng`- Jesús jalé` e júu` na, jōba` cangó`-bre, jō ca`nám`- 'ñia`r` jee` i dsea` do.

Jialí` ja` já`- líng` dsea` Israel júu` quiá`- Jesús

37 Jo ie~ jo, ja` e líí e Jesús cajméer` jalé` e lí` laniing` e quíí`r` jmíí` fí` quini` jaléng` dsea` góor` dsea` Israel, jo dsu` ja` já`- líím`bi` i` dsea` do júu` quiá`- Jesús; 38 jo lajoba` e caliti` e cajme` Saíí`, jaang` dsea` i` café` cuaiñ` quiá`- Fidiéé` malíí`gui eáang` ie~ lami~ cajíí`- lala:

Fíí`naa', ¿i` i` já`- nicalíng`- júu` quií`- e guía`naa'?

Jogui ¿i` i` nicalíí` jial tíí` 'gøñ', Fíí`naa' Fidiéé`?

39 Jo lajob jaléng` dsea` do jíí`- ja` lí`r` ningáíí`, co` lalab cajme`gui Saíí` cajo` fí` ni` jì` quiá`- Fidiéé` lí` fé` lala:

Jnea~ Fidiéé` jo fá`a e júu` la:

40 Nícajn`baa` jminir` jogui` nícajn`baa` moguir` cajo`

e laco` ja` cuóøng` niliñir` júu` quié`- e

o`gui` cuóøng` e ningáíí` jial líí` cajo`;

jo lajoba` ja` niquí`- jíng` yaaiñ` fí` quinií`-,

jogui lajobi` jnea~ ja` nijmi`leáan`-nre cajo`.

41 Jo cajíng`- Saíí` lana, co` nícan`gá`-bre jial tíí` laniing` 'gøng` Jesús, joba` fé`r` uii` quiá`- dsea` do.

42 Jo nañí` fa` cajím`- i` yúu` Saíí` do e júu` jo, dsu` fíím` dsea` Israel já`- calííñ`- júu` quiá`- Jesús ie~ jo, jogui` fíím` dseata` dsea` Israel i` laniing`- já`- calííñ`- júu` quiá`- dsea` do ie~ jo cajo`. Jo dsu` ja` fé`r` lajo` fí` quini` jaléng` dsea` jíéng`, co` 'góm`-bre jaléng` dsea` Israel i` líng` dsea` fariseo e ni`uóng`-neiñ` fí` dsíí` sínúu` guá`- quiá`r`, 43 co` eáang`gui` iíñ` e dsea` jmígüí`bing` nijmi`gó` ír` laco`gui` e nijmé`-`ñaí` Fidiéé` lajo` cóo`r`.

Jial dseáng`- 'né`- nijmi`gó` dsea` júu` quiá`- Jesús

44 Jo mi~ cangí`gui` lajo`, lalab cajíng`- Jesús cóo`- júu` teá`:

—Jaléng' dsea` i já' líng` júu` quié`e, joba' i dsea` í o' júi' júu` quié`e já' líiñ, co' lajob já' líiñ júu` quiá' Tiquí'ii' Fidié` cajo, dsea` i casíng` jnea` fí` jmigüi' la. ⁴⁵ Jo doñi' i dsea` i níng` jnea~, joba' níim`bre cajo i dsea` i casíng` jnea` fí` jmigüi' la. ⁴⁶ Jo jneab` dsea` lín`n e jì` do, jo cagá`a fí` jmigüi' la e lí` lacó' jaléng' dsea` i já' líng` júu` quié`e ja` niliseeiñ` fí` lí` nua. ⁴⁷ Jo i dsea` i lico' núu` jalé' júu` quié`e jo dsu' ja` jmóor` núu'r` jalé' e jo, joba' o' jnea` dsea` niquidsii` í' quiá' i dsea` í. Co' ja` cagá` jnea` fí` jmigüi' la e lacó' niquidsii` í' quiá' jaléng' dsea`, co' jnea` cagá`a e lí` lacó' nilaan`re jee` jalé' dsee` quiá'`bre. ⁴⁸ Jo jaléng' i dsea` i ja` júi' jnea` o'gui já' líiñ` júu` quié`e, joba' i dsea` í niseem`bing' i ní' í' quiá'r` quiá'` jalé' e dsee` e nica'éer` do; co' cóo' jalé' e júu` e nica'fá`a na, cóo' júi' job nitidsi' í' quiá'r` m` tí' lí' jo. ⁴⁹ Co' jnea` ja` fá'a la ñii` 'ñiá'a, dsuco' Tiquí'ii' i casíng` jnea` fí` jmigüi' la, íb` i nicaqui' ta` quié`e lajúi' e 'né` e nifá'a. ⁵⁰ Jo lajob niñi' jnea~, e jaléb' ta` e qui' Tiquié`e do cuø` e liseeng` dsea` cøøng` cóo' Fidié`e lata~. Joba' lajob lí', jaléb' e fá' jnea` dseáng' fá'a júi' lacó' ta` ca'ín`n quiá' Tiquí'ii'.

13

Mi` caru' Jesús tñ` dsea` guitúung` quiá'r`

¹ Jo mi` cang`gui lajo, lajee` e guati'ló` jmñ` Pascua e qui'` títng` dsea` Israel jmóor` fí` Jerusalén, jo ie` jo niñib' Jesús e nica'tíb` í' quiá'r` e nitúr` fí` jmigüi' la jo nidséiñ'` nidsigüea'tur cóo' Tiquí'ii' fí` ñifí`. Jo lajee` cateáaiñ` fí` jmigüi' la, eám' cajmi'neáaiñ` jaléng' dsea` i ca'uíng` dsea` quiá'r`,

jo lajob cajméer` cartí cangáng` tur fí ñíff`. 2-3 Jo ie` jo, tí lí` ni`íb` fii` i` 'ling`^ fí` dsí` Judas, jóo` jaang` dseañu` i` sii` Simón Iscariote, jo i` fii` i` 'ling`^ do cajméer` e ca`í` dsí` i` Judas do e ni`ñíñ` Jesús fí` quini` jaléng` dsea` i` quie` nifí` quía`- dsea` Israel. Jo Jesús niñi`bre guiá` e fí` lí` guing` Fidié` jáar` mi` cagüéiñ` fí` jmigüi` la, jogui e fí` job nidséng` tur mi` nití` í` quía`r`. Jo i` Tiquí`ii` dob i` nicacuø` ír` fí` e néé` nir` lajalé`. 4 Jo ie` job cagø` Jesús í` canu` cóo` dsea` guitúung` quía`r`, jo lajee` e neáaiñ` gø`r` dob mi` caráaiñ` e fí` lí` guiiñ` do jo caguir` e si`r` e quier` lí` lí` ni~, jogui ca`ñá`r` coo` jmáang` 'mi` fí` 'ñúíñ`. 5 Jo mi` cang` jo, caguié`r` jmí` fí` dsí` coo` úu` e ja` a` eáang`, jo cóo` e job canaaiñ` ru`r` tii` lajaang` lajaang` i` dsea` guitúung` quía`r` do, jo mi` calí` jo, cajmiquiá`r` cóo` e 'mi` e ca`ñá`r` tu`r` do.

6 Jo mi` tí` lí` catíng` Tú` Simón e nijgíi` tír` e nirú`- Jesús, joba` lalab cañi`r` quía`- dsea` do:

—Fíi`, ja` catíng` 'nu` e nirúu` tii`.

7 Jo lalab cañi` Jesús quía`- dsea` do:

—Ja` mí` ngáng` 'nu` lana e` guøng` lajii` e jmóo` la, jo dsu` lajee` lab ningán`.

8 Jo cañi`tu` Tú` Simón quía`- Jesús jo cas`r` dsea` do:

—iDseáng` ja` cuø`baa fí` e 'nu` nirúu` tii`!

Joba` lalab cañi`tu` Jesús quía`- dsea` do:

—Lí` jíi` e laba` lí`, e song ja` nirúu`u` tii~, joba` ja` quí` jmí` jóng e líng`gui` dsea` quie`e.

9 Joba` cañi`tu` Tú` Simón quía`- dsea` do jo ca`jíñ`:

—Jo song lajob nilí` Fíi`, joba` guiá`gui e nirúu`ba` la quie` guóo` cóo`gui moguii` cajo.

10 Jo dsu' lalab cañíi'tu Jesús quiá'- Tâ^ Simón jo cajíñ'-:

—Doñí' ii` dsea` i lalí- calá'-, joba' ja` 'né- lá'-tur ladsifí lado, jo jíi~ tii-bre 'né- nirú'-tur co' sijgúim^bre latøøiñ-. Jogui 'nú' líim'ba' dsea` sijgúing^, nañí fa' ja` lajaléng'na' líing'na' lajo.

11 Jo cajíng'- Jesús lana e ja` lajüing` i dsea` do líiñ` dsea` sijgúing^, co' niñi'bre guiú- i~ i dsea` i ni'níng- ír' fí' quini` dsea` i quie' nifí quiá'- dsea` Israel.

12 Jo mi~ tí' lí~ cató' e ru' Jesús tii- jaléng' i dsea` guitúung` do quiá'r-, joba' caquib'-tur e si'r^ do, jogui caguáb'tur e fí' lí~ guiiñ~ gø'r' do, jo mifüing` cajíñ'- lala:

—¿Su ñí^ 'nú' e~ guøng' jalé' e nicajmé-e quíi' na' na? 13 Co' 'nú' ca'íing'~na' jnea~ e lín'n Fíi'na' jogui e lín'n Tífa' quíi'-na', jo e jáb'-, lajob lí', co' lajob dseáng'- lín'n. 14 Jo co' jnea~, dsea` lín'n Tífa' jogui Fii~ quíi'-na', nicarúu'~baa tii~na' lajaang` lajaang'na', joba' lajob cajo` 'né- jmée^ 'nú', 'né- rúu'~ba' tii- dsea` rúng'na'. 15 Jo jnea~ nica'ée~baa 'nú' jial 'né- nijmee~na' e laco' 'nú' nijmee~na' røøb` laco'gui jíi~ e nicajmé- jnea~. 16 Jo e laba' jmitaa^ óó'na', e jíi~ jaang` dsea` 'léeng'~ niing-guir laco' fii~, jogui e jíi~ jaang` dsea` i ngí ta~ quie' júu^ niing-guir laco'gui i dsea` i casíng` ír' do. 17 Jo song ngám'ba' jalé' e júu^ na jogui jmití'bi' e íaang` óó'na' cajo, joba' juguiáb- niliseeng'na' jóng.

18' Jo dsu' e fá'a na ja` catíng- 'nú' lajüing'na'; co' ñi'baa guiú- i~ jaléng' i nicaguín'~n. Dsu' dseáng'- 'né- litib~ jíi~ laco' fé' fí' ni~ jì quiá'- Fidiée~ e ca-jme' dsea` mali~ gui eáang' lí~ fé' lala: “Jaang` lajee~

dsea` i gø' coling~ cóo'~baa lana, ni'ní' ním-bre jnea~." 19 Jo fí' i 'nú' e júu^ na lana e lí' laco' niñí'ba' jéeng' mi~ tí' lí' nidsijée' jalé' e jo. Jo mi~ tí' lí' nilí' lajo, joba' jáb'~ nilíng'na' jóng e jneab~ dseáng'~ lín'n jí'~ laco' fá'a e lín'n. 20 Jogui e laba' jmitaa^ óó'na', e doñí' i dsea` i ni'íng' i dsea` i sín~ n do, joba' ím'bre jnea~ cajo; jogui doñí' i dsea` i íng' jnea~, joba' ím'bre i dsea` i casíng` jnea~ fí' jmíguí' la cajo.

Mi~ cajíng'~ Jesús e Judas Iscariotebing' i ni'níng' ír'

(Mt. 26:20-25; Mr. 14:17-21; Lc. 22:21-23)

21 Jo mi~ cangí' e cajíng'~ Jesús lajo, joba' dseáng'~ eáam' fí'í' calíñ~, jo cajíng'~ casí'r~ i dsea` guitúung` quiá'r~ do jo casí'~ reiñ':

—E laba' jmitaa^ óó'na', e jaang` lajee` la'ó' 'nú'bing' i ni'níng~ jnea~ fí' quini` i dsea` quie` nifi' quiá'~ dsea` góo'naa' dsea` Israel.

22 Jo mi~ canúu~ i dsea` guitúung` do e júu^ jo, jo lico' cajóøng~ rúm'bre, jo dsu'ja' calilí'r^ i dseáng'~ i éeng` Jesús do. 23 Jo jaang` lajee` i dsea` guitúung` i iing~ Jesús eáang` do dseáng'~ cáam` dsea` do guiiñ~, jo lajoba' cuóøm` síiñ` cóo'~ dsea` do lajee` e neáaiñ' gø'r'. 24 Jo co' huím~bigui guíng~ Tú^ Simón, joba' cajméer` lí' cóo'~ guóor` quiá'~ i dsea` i guíng~ cáang` Jesús do e laco' dsea` i nijmingí'r~ dsea` do i~ lajee` ír' i éeng` Jesús do. 25 Jo i dsea` i guíng~ cáang` Jesús do cangoquíeeiñ' quiá'~ gui laco' guíng~ dsea` do, jo lalab cajmingí'r~ dsea` do:

—Fí'í, ¿i~ i dsea` i julí' na?

26 Joba' lalab cañí' Jesús quiá'~ dsea` do:

—Lana nijmi'leaa⁻ coo` 'ná'^jiu iñí'^, jo ii` i dsea` i nicuóø`ø e jo, íb` i fá`a na.

Jo dsifí' mi~ café^n Jesús e júu^ jo, joba' cajmi'leá`bre e iñí'^ do, jo i Judas i líng' jóo' Simón Iscariote, íb` i cacuø'r' e jo. ²⁷ Jo dsifí' mi~ ca'íng' i Judas do e iñí'^ do, joba' dsifí' lajob ca'í' fii~ i 'líng'^ i sii` Satanás fí' dsír'. Joba' lalab casí'~ Jesús ír':

—Lajíi'~ e nica'í' o' e nijméel'^, joba' jmeeb` lajminá`.

²⁸ Jo mi~ canúu~ i dsea` i caguaang`gui do lajii'~ e cajíng'~ Jesús do, ja` cangáin^n jiali' cajíng'~ dsea` do lajo. ²⁹ Jo co' ie~ jo i Judas Iscariote do líin' dsea` i sí'má'^ cuu~ quiá'~ Jesús cóo'~gui quiá'~ i dsea` guitúung` quiá'r~, joba' i líng'~ i dsea` do ca'í' dsír' e Jesús sí'r' i Judas do e líng'~ ee` nidsileáa` dsea` do quiá'~ e ni'nér~ lajiiñ` lajee` jmi~ osi quiá'~ e nicuø'r~ jaléng^n dsea` tiñíng` é.

³⁰ Jo dsifí' mi~ ca'íng'~ Judas Iscariote e iñí'^ do, joba' cagüi'í'bre e fí' lí' neáaiñ' do. Jo nicanuub`.

Júu^ laniing` quiá'~ Dsea` Jmáng`

³¹ Jo mi~ tí' lí' cangí' e cagüi'í' i Judas Iscariote do, joba' lalab casí'~ Jesús i dsea` quiá'r~ i cajé'gui do:

—Jo lanab nicalilí'^ 'nú' jial tí' niguo'^ líng' Fidiée` mi~ calili~ jial tí' niguo'^ líng' jnea~, dsea` cagá`a fí' ñifí~ jo cagüén~n fí' jmigüi' la e lín'n jaang` dsea` jmigüi'. ³² Jo song lajob líí', e jnea~ dsea` cagüén~n fí' jmigüi' la lín'n jaang` dsea` jmigüi' e ni'ée^e 'nú' jial tí' niguo'^ líng' Fidiée`, joba' Fidiée` lajob nijmér~ cóo'~ jnea~ cajo, jo lajee` tab~ nijmér~ lajo. ³³ Jogui 'nú', dsea` líng'na' jóo`o, e laba' fíi' i 'nú' e jo` huøø` táang`guí cóo'~ 'nú' fí' la. Jogui 'nú' ni'nam'^ba' jnea~ jo dsu' jo`

niguiéng'na' jnea~; co lí^ laco'gui jíi~ e nicafí~i dsea'Israel caguaang~gui ie~ lamí~ jééng'gui do, jo lajob fíi~i 'nú' lana cajo e ja`cuóøng`nigüiling`na' fí lí~ niníng'^ jnea~. ³⁴ Jo uing~ e joba' e nicuóøø`'nú' e júu^ laniing~ la e ja` mí cafíi~i 'nú' lamí~ jééng'gui, jo e lab e jo: jmi'neáang`na' dsea` rúng'na'. Jo lí^ laco' la 'neáang` jnea~ 'nú', lajob dseáng'^ 'né~ jmi'neáang`na' dsea` rúng'na' cajo. ³⁵ Jo song lajob jmoo`na' e dseáng'^ jmi'neáang`na' dsea` rúng'na', joba' lajim` dsea` nililí'r^ jóng e dseáng'^ dsea` quíe~baa líng'na' song jmoo`ba' lajo.

Mi~ cajméé` Jesús júu^ e nijíng'^ Tú^ Simón e ja` cuíñ`dsea` do

(Mt. 26:31-35; Mr. 14:27-31; Lc. 22:31-34)

³⁶ Jo mi~ canúu~ Tú^ Simón lajíi~ e cajíng'^ Jesús do, joba' cajmingí'r~ dsea` do lala jo cajíñ':

—Fíi`i, ¿jie~ fí lí~ niguó'^?

Joba' cañíi` Jesús quiá'^ dsea` do jo casí'^ reiñ':

—Ja` cuóøng` niguøng'^ 'nu` lana e fí lí~ ninín'^n, jo dsu` mi~ nilicøøng`guijiu lajo, joguiba' e nicuóøng` guøn'^ jóng.

³⁷ Joba' lalab cañíi` Tú^ Simón quiá'^ Jesús jo casí'r~ dsea` do:

—Fíi`i, ¿jiali' ja` cuóøng` e ninín'^n cóo'~ 'nu` lana? ¿Co' guiab' dsii~ e nijáang'~ 'ñiá'a e nijúun~n e laco' nijmicóo'~o 'nu'!

³⁸ Joba' lalab cañíi` Jesús quiá'^ i Tú^ Simón do jo casí'^ reiñ':

—¿Su dseáng'^ já'^ e nijméé'^ e laco' fó' na, Tú^ Simón? Co' lana jmitaa^ o' e lajee~ e ná'^gui e niquí' jaang` tuidséé^, 'nu` nifo'^ 'ní' ya' e ja` cuín' jnea~.

14

Jesús laiñ' e fi' cóo' e guilíng' dsea' fi' li' guing' Tiquiá'r^

¹ Jo mi~ cangî e casíng~ Jesús cóo'~ i Tú^ Simón do, joba' lalab casí'~ guir i dsea` quiá'r~ do:

—Ja` jmáangî~ yaang~na' fi'í^ 'nú', dsea` já'~ nicalíng~na' júu^ quiá'~ Fidié~, jogui ja` jmitúng^ óóna' cóo'~ júu^ quié~e, co' 'né' e jáb'~ nilíng`na' cajo. ² Co' fi' li' guing~ Tiquié^ e fi' ñifi~, féb' joo` e quiá'~ nigüéá` jaléng` dsea` quiá'r~; cofa' ja` lí' lajo, joba' ja` mí' cafíi~ i 'nú' jóng e tí' li' ninín'^n e nigu-iaa~ guiá~ fi' li' nigüiní'na' cóo'~ jnea~ fi' li' guing~ Tiquié^ e faco' lajo. ³ Jo mi~ tí' li' cangî e niguiaa~ guiá~ e fi' li' nigüiní'na' do, joba' nigáab`túu calé' catú~ fi' la e laco' nitøø~ 'nú' e nigüilíng`na' cóo'~ jnea~, jo fi' job nidsi'ié'ee' colíng~ cóo'~ jnea~. ⁴ Co' niñib^ 'nú' jie~ fi' li' ninín'^n jogui nicuí'bi' cajo e fi' e dsijéé' fi' jo.

⁵ Jo mi~ cangî e cajíng'~ Jesús e júu^ jo, joba' jaang` lajee~ i dsea` quiá'r~ do i sii` Tomás lalab cañír` quiá'~ dsea` do:

—Fíi'i, ja` ne~ jnea'^ jie~ fi' li' niguøng'^ 'nu, joba' çjial lí e nilicuí'nna' jnang~ e fi' jo?

⁶ Joba' lalab cañír' Jesús quiá'~ dsea` do:

—Jneab~ dsea` lín'n e fi' e laco' cuøøng` nigu-ilíng` dsea' fi' ñifi~, jogui jneab~ dseáng'~ cuøø~ø 'nú' e liñí'na' jalé' júu^ quiá'~ Fidié~, jogui jíi'~ jnea~bi cuøø~ø 'nú' cajo e seeng`na' cøøng` cóo'~ Fidié~ lata~. Jo jíi'~ la'eáang` cóo'~ jneab~ cuøøng` e niguilíng` dsea' fi' quini` Tiquí'ii' Fidié~. ⁷ Jo song nicuíim` 'nú' guiá~ jnea~ lana, joba' nilicuíim`ba'

Tiquié'e cajo; jò dsu' lati' lanab ninaang` cuíng`na' dsea` do, cò' nicañím`ba're.

⁸ Jò mi~ calí~ fé' Jesús e júu^ na, jòba' lalab cañíi' jaang`gui dsea` quiá'r~ ì siì Lii~ do jò casí'r~ dsea` do:

—Fíi'i, cuóø'~ jnea'^ fí' e nineeng~naa' Tiquí'ii' dsea` guíng~ ñiff~, jò jíi'~ jòba' mñí'~naa' 'nu`.

⁹ Jòba' lalab cañíi' Jesús quiá'- ì Lii~ do jò cajíñ'~:

—Lii~, ningóob` eáang` e seen~ jee~ 'nú', jò ¿su ja` mí calicuím`bi' jnea~? Dsucò' jaléng` dsea` ì níng~ jnea~, jòba' ì dsea` î nímbre Tiquié'e cajo; jòba' ¿jialí' mñí'~ jnea~ fí' e laco' nimáang`na' Tiquí'ii'? ¹⁰ Jò ¿su ja` já'~ lñn` 'nu` e jnea~ cøøm` seeng` cóo'~ Tiquí'ii' jogui e Tiquí'ii' cøøm` seeiñ` cóo'~ jnea~ cajo? Cò' jalé' e fñí' 'nú' na ja` fá'a e la tñn~ 'ñiá'a, cò' Tiquí'ii' ì seeng` cøøng` cóo'~ jnea~ do, dsea` íb` ì jmóo` lajúi'~ ta~ quiá'~. ¹¹ Jò 'né~ liñí'ba' e jnea~ cøøm` seen~ cóo'~ Tiquí'ii', jogui lajòb`i ír` seeiñ` cøøng` cóo'~ jnea~ cajo, jò song ja` já'~ lñng`na' e júu^ jò, jòba' lico' já'~ güilíng`na' júu^ quié~ e mi~ móo~na' jalé' e jmóo`o. ¹² Jogui e laba' jmitaa^ óo'na' cajo, e doñí' ii' ì já'~ lñng` júu^ quié~ e, jòba' nijmé~bre jalé' e quíi'~ jmñí'~ lí^ laco'gui jíi'~ la nicajmé~ jnea~ cajo; jò dsu' sea'ba' do e nijmér~ e niguó'gui eáang`, cò' jnea~ ninín^ n e nijaa^ cóo'~ Tiquí'ii' dsea` guíng~ ñiff~. ¹³ Jò jalé' e nimñí'~na' Fidié~ la'eáang` cóo'~ jnea~, jòba' jneab~ nijmee~ e jalé' e jò quíi~na', jò lajòba' nijmiféng` dsea` Tiquié'e Fidié~ la'eáang` cóo'~ jalé' e jmóo` jnea~ do. ¹⁴ Jò doñí' eeb` cuóøng` lí jmee~ jnea~ song camñí'~na' Fidié~ lajò la'eáang` cóo'~ jnea~.

Mi~ cacuø' Jesús júu^ e nisíng~ Fidiée^ Jmiguí quiá'r~

15 'Jø fíi-guáí 'nú' e song dseáng'- lajang'^ júu^ 'neáang'na' jnea~, joba' nijmée^ba' núu~na' júu^ quié~ e jóng. 16-17 Joba' jnea~ nimíi~i Tiquí'ii' dsea` guíiñ~ ñífi~ e nisíñ~ Jaang` i nijmicóo~ 'nú', jø e job líí Jmiguí quiá'- Fidiée^ cóo~ e cuø' 'nú' e líñí'na' jalé' júu^ quiá'- Fidiée^ . Jø e Jmiguí do contøøm~ niliseeng` cóo~ 'nú'. Jø jaléng' dsea` i ja` mí ca'ing' jnea~, joba' ja` quí'- jmíi~ fa' e ni'íñ' e Jmiguí do, cø' ja` mí cangár~ o'gui cuír` cajo; jø dsu' 'nú' gui nicuía'ba' e Jmiguí do, cø' niseem` cóo~ 'nú' lana, jogui tí lí~ nití' í' e niliseem` fí` áa'na' cajo.

18 'Jø fíi-guáí 'nú' e ja` quí'- jmíi~ fa' niseáan~n 'nú' e lafa' 'núng~na', cø' nigáab`túu calé' catú~ jø niliseem`túu cóo~ 'nú'. 19 Jø lajee^ lab, jaléng' dsea` i ja` cuíng` jnea~ jø` niníng~ guír jnea~; jø dsu' 'nú' nimáam~tu' jnea~ jogui contøøm~ niliseeng`na' cóo~ jnea~ cajo, cø' seem` jnea~ cóo~ 'nú' lata~. 20 Jø ie~ job nililí'na' e jnea~ cøøm` seen~ cóo~ Tiquié^e, jogui 'nú' cøøm` seeng`na' cóo~ jnea~, jogui jnea~ cøøm` seen~ cóo~ 'nú' cajo. 21 Jogui i dsea` i íng' júu^ quié~ e jogui jmóor` núu'r~ jalé' e júu^ jø, joba' i dsea` í cuø' lí~ e dseáng'- lajam'^ba' e 'neáaiñ` jnea~, jø lajob Tiquié^e nijmi'neáam`bre i dsea` i jmi'neáang` jnea~ do, jogui jnea~ ni-jmi'neáam`baa i dsea` í cajo, jogui ni'ée^baare jial dseáng'- lín'n.

22 Joba' cañíi` jaang`gui dsea` guitúung` quiá'- Dsea` Jmáang~ i sii` Judas, dsu' o' i Iscariote do, jø casí'r~ dsea` do lala:

—Fíi'i, ¿jiali' e ni'éeng` uø' fí` quini~ jnea'^ jø o' fí` quini~ jaléng' dsea` i ja` líng' dsea` góo`naa'?

23 Jōba' cañí' Jesús quiá' i Judas do jō cajíñ' -:

—Jaléng' dseá' i jmi'neáang' jnea~, jōba' jmóo`bre núu'r~ jalé' júu^ quié~e; jō Tiquié^e Fidiéé~ ni-jmi'neáam`bre i dseá' í' cajo, jō lajōb Tiquié^e colíing~gui cóo'~ jnea~ cøøm` nilisee~naa' cóo'~ i dseá' í'. 24 Jōgui i dseá' i ja`'neáang' jnea~, jōba' ja` jmóor`núu'r~ jalé' júu^ quié~e. Jō jaléb' e júu^ e fá' jnea~ la, o' dseáng' jjuu^ quié~e 'ñiá'a co' e quiá'- Tiquí'baa', jō íb` dseá' i casíing' jnea~ fí' jmigüí' la.

25 'Jō fñi' i 'nú' jalé' e júu^ la lajee e táam`bñi cóo' 'nú' fí' jmigüí' la; 26 jō dsu' mi~ ninín'^n fí' ñifi' fí' lí' guing~ Tiquié^e, jōba' dseá' íb' i nisíng~ Jmiguí' quiá'r~ cuaiñ~ quié~e e laco' nijmicóo'~ 'nú', jō lajōba' niguiéng' áána' jalé' e júu^ e nicafñi' i 'nú' lajee e nicataang~naa' colíing~, jōgui nilé' 'nú' jalé' e 'né' ñi'na' cajo.

27 'Jō mi~ tí' lí' nití' í' e ninín'^n, jōba' nisée~e cóo'~ 'nú' e niliseem`ba' juguiá~ cóo'~ Fidiéé'. Jōgui nicuøø^baa 'nú' laco'gui la seeng` jnea~ juguiá~ cóo'~ dseá' do, jō dsu' ja` nicuøø~ e jō laco'gui la cuø' dseá' i ja` cuíng` Fidiéé'. Jōba' fñi-guñi 'nú' e ja` jmeáang~ yaang~na' fi'í' uii~ quiá'- jalé' e nidsingúing~na', o'gui føøng~na' cajo uii~ quiá'- jalé' e jō. 28 Jō nicanúu~ba' e nicafñi' i 'nú' lamí~ jéeng'gui e ninín'^n fí' lí' guing~ Tiquí'ii', jō dsu' nigáab'túu jō niliseem`túu cóo'~ 'nú' calé' catú'. Jō faco' dseáng'~ já' e 'nú' 'neáang'na' jnea~, jōba' cali'íáam` óóna' jóng mi~ cali'ñi'na' e ninín'^n fí' lí' guing~ Tiquí'ii' faco' lajō, co' í'bre dseá' niing~guir laco'gui jnea~. 29 Jō uíing~ e jōba' e fñi' i 'nú' jalé' e la e lí' laco' mi~ nití' í' e nidsijéé' jalé' e jō, jō lajōguiba' e já' nilíng`na' jalé' e júu^ quié~e do.

³⁰ 'Jō lana jo` 'ga' lĩ s̄iing~guñ cōo' 'nú', cō' nijaquíem' i fi' i 'ling' i quiá' ta' fí' jmigüi' la, jō dsu' nañi' fa' ja' bí' óo' i fi' i 'ling' do e niquiá'r- jnea~ ta~, ³¹ dsu' lajōb dseáng' nisí'í' e nidsijée' e laco' niliñi' jaléng' dsea' jmigüi' e 'neáam'baa Tiquí'ii' jōgui e jmóo'ò lajii' ta' e nicaquiá'r' quié'baa.

Jō mi' cató' e fé' Jesús jalé' e júu' na, jōba' cajíñ' casí'r- i dsea' guiáng' quiá'r- do lala:

—Ráang-na' na, jō ma'uøø- duu' la.

15

Jesús líiñ' e huñg' jó' e jlo' siníi'

¹ Jō mi' cangí'gui lajō, lalab cajíng'-gui Jesús casí'r- i dsea' guiáng' quiá'r- do:

—Jnea~ líñ'n e huñg' jó' e jlo' siníi', jōgui Tiquié' e líiñ' laco' i dsea' jmáng' í' guiá' e huñg' jó' do. ² Jō song cōo' guo' e huñg' jó' quié' e do ja' cuø' mí' huñg' jó', jōba' niquiáb'- Fidiée' e guo' jō; jō dsu' song guiá'-bi cuø' mí' huñg' jó', jōba' Fidiée' ni'ia'-bre jōgui nisám'-bre guo' quiá'- e laco' ni'í' jmigui'gui. ³ Jōgui 'nú' lana nisiguiúm'-ba' la'eáang' e nica'íing'-na' lajii' júu' e nicañi' i 'nú'. ⁴ Jō güiliseem'bi' cøng' colíing' cōo' jnea~ lí' laco'gui la seeng' jnea~ cøng' colíing' cōo' 'nú'. Cofa' cōo' guáng' quiá'- mí' huñg' jó' ja' qui' jmii' ni'í' 'ñia' song si'naam' e guáng' do quiá'- e huñg' quiá'-; jō lajōb lí'gui cōo' 'nú' cajo, ja' qui' jmii' nijmee'-na' e guiá' song ja' seeng'na' cøng' colíing' cōo' jnea~.

⁵ 'Jō fii-túu' 'nú' e jneab~ líñ'n e huñg' jó' do, jōgui 'nú' líng'na' guáng' quiá'- e huñg' do. Jō

doñi' ii` dsea` i seeng` cøøng` cõo`~ jnea~, jõba' jnea~
 seem`baa cøøng` cõo`~ ír` cajo, jõba' eáam` íng` ta`
 jalé` e jmóor`; cofa' ja` seeiñ` cøøng` cõo`~ jnea~,
 jõba' jji`~ cõo` e guiú`- ja` ee` quí`r`~ jmi`~ jmér` jóng.
 6 Co' i dsea`gui i litúng`- dsí' e seeiñ` cøøng` cõo`~
 jnea~, jõba' i dsea` î ni'nám`bre cõo`~ jnea~, jõba'
 ni'ím`- quiá'r`- lí`^ laco`'gui mi` liqui`u` e guáng`' e
 si'naang` quiá'- e huñg` jø`^ do, jõ sitím` jalé` e jõ,
 jõ niné`- fí` lí` nicób` jóng.

7 'Jogui song 'nú` ja` tú`na' e seem`ba' cøøng`
 colüñg`~ cõo`~ jnea~ jogui e teáb` teáng`~na' cõo`~
 jú`^ quié`-e cajo, jõ song lajob jmoo`na', jõba'
 mí`~na' jnea~ ee` iing`~na' jõ lajob nilí'. 8 Jogui mi`
 'nú` eáam` íng` ta`~ jalé` e jmoo`na', jõ e jõba' cuø` lí`
 e líng`na' dseáng`- lajang`^ dsea` quié`-e, jõba' ni-
 jmiféng` dsea` Tiquié` e Fidié` dsea` guing`~ ñí`f`-.
 9 Jõ jnea~ eáam` 'neáan`n` 'nú` lí`^ laco`'gui la 'neáang`
 Tiquí`ii' jnea~; jõba' fí`-i` 'nú` e güiliseem`b'i' e ñí`na'
 jial` tí' e 'neáan`n` 'nú`. 10 Jõ song 'nú` nú`~ba' jalé`
 jú`^ quié`-e, jõba' seem`ba' e 'neáam`b`i` 'nú` jóng
 lí`^ laco`'gui la jmoo` jnea~ nú`~u` lajji`~ jú`^ quiá`-
 Tiquié`e, jõba' seem`baa e jmi'neáang` Tiquié`e
 jnea~.

11 'Jõ fõn`n` 'nú` lana e lí`^ laco`' nili`iáang` áa`na'
 laco`'gui e iáang` dsí` jnea~, jogui e dseáng`- la iéb`
 nili`iáang` óo`na' cajo lí`^ laco`' catüñg`- e líng` dsea`
 quié`-e. 12 Jõgui fí`-tú` 'nú` e jú`^ quié`-e e 'né`- lití`
 do, jõ e lab e jú`^ jõ: 'né`- nijmi'neáam`ba' dsea`
 rúng`na' lí`^ laco`'gui jnea~ jmi'neáan`n` 'nú` lajaang`
 lajaang`na'. 13 Jõ e jmi'neáang` dsea` rú`iñ` e lani-
 ing`-gui eáang` lí` mi` jáng`' 'ñia`r` e laco`' nijmicõo`r`
 dsea` seeng` røø` cõo`r` nañí` song cajú`iñ`- dsu`

uúí~ e cajméer` lajō. 14 Jō song náu~ba' jalé` júu`
 quié~e e nicafñ~i 'nú' e 'né~ jmee~na', jōba' dsea`
 seeng` røø` cóo~' jneab` líng'na' jóng. 15 Jō lana
 jō` líng'na' dsea` i lico' jmóo` ta~ quié~e, dsuco'
 i dsea` la'í` jii~ ja` ñir' e~ uuing~ e ta~ e jmóor`
 quiá~' i fiir~ do. Dsu' lana nilíng'na' dsea` seeng`
 røø` cóo~'baa, co' nicacuøø~baa 'nú' e nicaliñí~na'
 jalé' e júu` e ca'ín~n quiá~' Tiquié~e. 16 Jogui
 o' 'nú' dsea` caguíng'~na' jnea~ e quiee~ nifi'
 quí~na', dsuco' jneab~ dsea` nicaguín~n 'nú' e
 laco' ni'uíng~na' dsea` quié~e, jogui nicacuøø~ø
 'nú' ta~ e nigüilíng~na' nigüijmee~na' jmang~' e
 nili'íng^ ta~ quí~na' lata~. Jō lajōba' Tiquí~i'
 Fidié~ nicuó~bre 'nú' jalé' e nimí~na're la'eáng'
 cóo~' jnea~. 17 Jō e lab e fñ~túu 'nú' do calé' catú~ e~
 'né~ nijmee~na': nijmi'neáng'na' dsea` rúng'na'.

'Ní~níng~ dsea` Jesús cóo~'gui jaléng' dsea` quiá~r~

18 Jō fñ~guí~ 'nú', dsea` quié~e, e ja` güidsigá`
 óóna' e 'ní~ níng~ jaléng' dsea` jmigüi' 'nú', dsu'
 güiliñí~na' guí~ e jnea~bing' la'uii~ i calí~ 'ní~
 níng~ jaléng' dsea` do. 19 Co' faco' 'nú' líng'na'
 dsea` jmigüi' i ja` cúíng' jnea~, jōba' nijmi'neáam`
 jaléng' i dsea` í 'nú' jóng lí^ laco'gui la jmi'neáng`
 rúíñ' la'ó' yaaiñ~. Jō dsuco' jneab~ dsea` caguín~n
 'nú' jee~ jaléng' dsea` jmigüi' i ja` cúíng' jnea~ e
 laco' ni'uíng~na' dsea` quié~e, jō uúí~ e lajōba' e
 jaléng' i dsea` í ni'ní~ níñ~ 'nú', co' 'nú' jō líng'na'
 laco' ír. 20 Jō téé~ áa'na' lajii~ e nicafñ~i 'nú' do:
 “Jii~ jaang` dsea` jmóo` ta~ níng~guir laco' fiir~.” Jō
 quie~na' cuente e gab` nijmeáng' dsea` jnea~, jōba'
 lajōb nijmeáng' dsea` 'nú' cajo; jogui song ja` mí
 calinú~r~ júu` quié~e, jōba' lajōb ja` nilinú~r~ júu`

quí-na' cajo. ²¹ Jo jaléb' e ga` na nijmeáiñ' 'nú' uí' e líng'na' dsea` quié-e, jo nijmér- lajo co' ja` cuíñ' i dsea` i casíng' jnea~ fí' jmigüí' la.

²² 'Jo faco' mi~ jnea~ ja` cagüén-n fí' jmigüí' la e caga'ée-e dsea` jmigüí' júu^ quiá'- Fidiée~, joba' ja` calilí'r^ jóng e líiñ' dsea` røøng` dsee- faco' lajo; jo dsuco' lanagui nicagüém-baa fí' la e quíe- júu^ quiá'- Fidiée~, joba' jo` cuøøng` lí fé'r` náng e ja` dsee- røøiñ', co' dseáng'- lajob líiñ'. ²³ Jo jaléng' dsea` i 'ní' níng- jnea~, joba' la quíe' Tiquié'e dsea` guing~ ñifí' 'ní' níñ- cajo. ²⁴ Jo ja` dsee- røøng` dsea` jmigüí' faco' mi~ jnea~ ja` cajmé-e jee~ ír' jalé' e quí' i jmi~ e cajmé-e e jí' jaang` dsea` jiéng' ja` quí'r~ jmi~ mi~ cajméer-. Jo ja` ee' lí' e nicangáb- jaléng' i dsea` í jalé' e quí' i jmi~ do, jo dsu' mí' 'noo'bi 'ní' níñ- jnea~ jogui 'ní' níñ- Tiquié'e cajo. ²⁵ Jo dsijéé' jalé' e na, co' dseáng'- 'néb- lití~ lají' laco' tóo' fí' ni~ jì quiá'- Fidiée~ e cajme' dsea` malí~ gui eáng' lí fé' lala: "Eáng' calí- 'ní' níng- dsea` jnea~ e jí' ja` uing~ sea`."

²⁶ 'Jo dsu' mí' niguiéng'- túu fí' ñifí-, joba' nisñ-n e Jmiguí' quiá'- Tiquí'ii' Fidiée~ e sñiñ` e laco' nijmicóo' 'nú'; jo e Jmiguí' dob cajo e ní'é- 'nú' jalé' e já'- jogui e nífé' uii~ quié-e jalé' e ní e jmóo'o. ²⁷ Jogui 'nú' cajo dsea` catíng-na' e nifo'^na' uii~ quié-e fí' quini~ dsea` jmigüí', co' conrøøb` nicalisé'naa' jí' ie~ latí' mi~ calicuíng' rú'naa' do.

16

¹ 'Jo fí' i 'nú' jalé' e júu^ la e lí' laco' ja` nilitúng- óo'na' e já'- líng'na' júu^ quié-e. ² Co' jaléng' dsea` góo'naa' dsea` Israel ni'uóñ- 'nú' fí' dsí' guá'-

quí-naa', jo jì'gui niguiéé' jmíi~ e doñí' ìi' dsea` ì
 nijngáng'- 'nú' ní'í- dsír' e lajoba' e jmitir~ ta' fí'
 quini~ Fidiéé' fing song cajméer' lajo. ³ Jo nijmér-
 jalé' e na uí'~ e ja` mí' calicuím`bir jnea~ o'gui mí'
 calicuíiñ` Tiquí'ii' dsea` guing~ ñifí- cajo. ⁴ Jo fíi- i
 'nú' lana e lí'^ laco' mí~ nití- í' e nidsijéé' jalé' e jo,
 joba' niguiéng' áa'na' e nica'fíi- baa 'nú' jéeng'gui e
 nilí' lajo.

Lajíi' ta' óo' Jmiguí' quíá'- Fidiéé'

'Jo ja` mí' cafíi- i 'nú' jalé' e na latí' mí~ uing~,
 co' lajeé' jo táam` jnea~ cóo'~ 'nú'. ⁵ Jo dsu' lanagui
 ngóo' catí' b' í' quíé- e e ninín'^túu fí' ñifí- e nijaa`
 cóo'~ i dsea` i casíng` jnea~ fí' jmigüí' la, jo jíi'~ jaang`
 'nú' ja` mí' cajmingíi' na' jnea~ jie~ fí' lí' ninín'^n.
⁶ Jogui 'nú' lí'^ lí' jmoo'na' fí' í' b' dsu' fíi- i 'nú' jalé'
 e júu^ na. ⁷ Jo dsu' dseáng'- jáb'- júu^ e fíi- i 'nú'
 la, e guíá- guí ni'uíng- quíi' na' e niním'^baa. Co'
 fing song ja` ninín'^n, joba' ja` quí'~ jmíi' jóng e
 nigüéeng- i nijmicóo'~ 'nú' fí' jmigüí' la, jo dsu'
 mí~ niguién'- n fí' ñifí-, joba' jneab~ dsea` nisín'^n
 i nijmicóo'~ 'nú' fí' jmigüí' la. ⁸ Jo mí' nigüéeng-
 í, joguib nijmítar~ dsíi' dsea` jmigüí' jalé' dsee-
 quíáiñ'- jogui jial lí' e seeng` dsea` e ja` éer' dsee-,
 jogui cajo jial íi' Fidiéé' í' laco' catíng-. ⁹ Jogui
 e Jmiguí' do nijmíta~ dsíi' dsea` e líng' dsea` i
 røøng` dsee- uí'~ e ja` já'- líiñ` júu^ quíé- e; ¹⁰ jogui
 e Jmiguí' do cajo nijmíta~ dsíi' dsea` e jnea~ ja`
 røøñ- dsee- co' niníng'^túu cóo'~ Tiquí'ii' Fidiéé'
 jo jo` nimáang`gui' jnea~ fí' jmigüí' la. ¹¹ Jogui cajo
 e Jmiguí' quíá'- Fidiéé' doba' nijmíta~ dsíi' dsea`
 jmigüí' e nica'íi' b- Fidiéé' í' laco' catíng- quíá'- fíi'

ἰ 'ling' i quiu' ta~ fi' jmigüü' la, co' dseáng'- latab~ ni'íñ' iihuñ'.

12 'Jo jmiguiü'bi jalé' e sea` nifñ'i 'nú', dsu' ja` nifñ'i 'nú' jalé' e jo dseáng'- lana e lí' laco' ja` ni'uíng- jmiguiü' quií'-na'. 13 Jo dsu' mi~ tí lí~ nigüéeng- e Jmiguü' quiá'- Fidiée' dojee~ 'nú', joba' e job e nicá' jmang'- júu^ já'- quií'-na', jogui e job cajo e ni'é'-gui 'nú' jalé' e ja` mi' cafñ-i 'nú' lana; co' ja` nifé' jíí' laco' í dsí' ñia' e Jmiguü' do, co' lajíí' júu^ e ni'íng' quiá'- Fidiée', jíí' joba' e nifé'; jogui cajo ni'é'- 'nú' e~ jalé' e nidsijée' fi' jmigüü' lajee' lí~ dsé'gui. 14 Jo e Jmiguü' do nifé' guiá~ uii~ quié'-e, co' nicuó'- 'nú' lajíí' e ni'íng' quié'-baa e laco' nilíñ'na' jalé' e jo. 15 Jo lajib' jalé' e sea` quiá'- Tiquí'ii' e quié'-baa lí' cajo, jo uii~ e lajoba' e fá'a e lajalé' e júu^ e ni'íng' e Jmiguü' do jáá' fi' quié'-baa, jo jaléb' e jo nicuó'- 'nú' e ningáng'na'.

16 'Jo fñ-guñ 'nú' cajo e jo` huóø- táang'guñ jee~ 'nú', joba' jo` nimáang'gui' jnea~; jo dsu' mi~ ningí'guijia lajo, joba' nimáam~tu' jnea~ calé' catú'.

Cateá'ba' e calíng- dsea` guijáng` quiá'- Jesús fi'í'

17 Jo mi~ canúu- ἰ dsea` guijáng` do lajíí' júu^ e cajíng'- Jesús do, joba' canaaiñ` jmíng'í'- rúñ' la'ó' yaaiñ~ jo sñiñ`:

—¿E~gui guóng' e fé' ἰ Fí'naa' na mi~ jíñ'- e jo huóø- dsé' e táang'guir fi' jee~ jneaa~aa', joba' jo` nineeng~guí're, jo dsu' mi~ ningí'guijia lajo, joba' nineem~túu're calé' catú'-? jogui ¿e~gui guóng' e jíñ'- e nidséiñ'- fi' lí~ guíng~ Tiquiá'r^ fi' ñifí'-? 18 Jogui cajo, ¿e~gui guóng' e jíñ'- e jo` huóø- dsé-

e táang'guir jee~ jneaa~aa'? Jo lana dseáng' jii' capí' ja' ngáng'naa' e~ guóng' jalé' e fé'r' na.

19 Jo dsifib' calilí' Jesús e i dsea` quiá'r- do lüm~ ee` iñ~ nijmingí'r- dsea` do, joba' lalab cañír' quiá'- i dsea` quiá'r- do jo cajíñ'-:

—Jnea~ nicañí' i 'nú' e jo huóø- dsé- e máang'gui' jnea~ fi' jmigüi' la, jo dsu' mi~ ningí'guijiu lajo, nimáam~tu' jnea~ calé' catú-. Jo ¿su e nab e iing~na' e ñí'na' do e~ guóng'? 20 Jo dsu' jnea~ jmitaa' óó'na' e mi~ tí' lí' nití- e í' jo, joba' eáam' fi'í' nilíng-na' jóng co' jiguí cartí' niquí'ba', jogui ie~ jo jaléng' dsea` i ja' cúing' jnea~ eáam' nijmi'iaáng' dsír'. Jo dsu' 'nú'gui cateá'ba' nilíng-na' fi'í' ie~ jo, co' cóo' e joba' nijmé- e nili'iaáng'tu' óó'na'. 21 Co' e la lí' laco'gui mi~ jaang' dseamí' iñ' iihuí' lajee' dsea' jmohuí' quiá'r- e liseeng' jiuung~ quiá'r-; jo dsu' dsifí' mi~ caliséng' i yuu' do quiá'r-, joba' íim- dsír' lajú' e iihuí' e ca'íñ' do, co' eáam' jmi'iaáng' dsír' dsu' uí' e nicaliséng' i yuu' do quiá'r-. 22 Jo lajob líng' 'nú' fi'í' lana, jo dsu' mi~ nimáang~tu' jnea~ calé' catú-, joguiba' nili'iaáng' áa'na' dseáng'- laco' si'í', jo e jo jii' jaang' cuóøng' lí' jé'gui quií'na' e iaáng' óó'na' do.

23 'Jo ie~ jmii~ jo, jo' e nijmingí'gui' jnea~ jii' coo'; co' e já'-ba' e fi' i 'nú' e ie~ jo Tiquí'ii' nicuó'-bre 'nú' jalé' e nimí'na're la'eáang' cóo' jnea~. 24 Jo dsu' latí' lana, jii' coo' ja' ee' mí' camí'na're la'eáang' cóo' jnea~; jo dsu' mí'na're joba' niñím'ba', jo lajoba' nili'iaáng' óó'na' dseáng'- laco' si'í'.

Jial laniing- 'gøng' Dsea' Jmáang-

25 'Jo nɪcafɪi 'i 'nú' jalé' júu^ e huíngjiu ngáng'na', jo dsu' tɪ' lí~ nitɪb- í' e jo' nifɔng'^guí 'nú' cóo'~ jalé' e júu^ jo, có' ie~ jo dseáng'~ condseéb' nifɪi 'nú' cuaiñ~ quiá'- Tiquí'ii' dsea` guing~ ñiff-. 26 Jo mi~ nitɪ- e í' jo, 'nú' nimí'~na're e nijmicóo'r~ 'nú' la'eáang' cóo'~ jnea~; jo ja` fá' jnea~ e nimí'~i Tiquí'ii' uí'~ 'nú', 27 có' 'ñiab' Tiquí'ii' 'neáaiñ` 'nú' cajo uí'~ e 'neáam'ba' jnea~ jogui e já'- nilíng'na' e Fidiéeb` dsea` casíiñ` jnea~ fí' jmigüí` la cuaiñ~ quiá'r-. 28 Có' fí' lí~ guing~ Tiquí'baa' cajú-u mi~ cagüén- n fí' jmigüí` la, jo dsu' lanagui nitá'baa fí' la e laco' niníng'^túu fí' lí~ guíiñ~ fí' ñiff-.

29 Jo mi~ cangɪ e cajíng'- Jesús lajo, joba' lalab cajíng'- i dsea` guijáng` quiá'r- do jo casí'r- dsea` do:

—Jo lanaguiba' fó' 'nu` condseé' dseáng'- laco' la ngáng'naa' náng. 30 Jogui lana nine~baa' cajo e lajib` ñí' 'nu', joba' jo` 'né- fa' ii' nijmingí'-gui 'nu', có' cóo'~ júi'~ e júu^ nab nijáb'- lí'naa' e Fidiéeb` dsea` casíiñ` 'nu' fí' jmigüí` la cuaiñ~ quiá'r-.

31 Joba' cañí' Jesús quiá'- i dsea` quiá'r- do jo casí'-reiñ':

—Jo ¿su lanaguiba' já'- nilíng'na' lajúi'~ júu^ e fíi- i 'nú'? 32 Jo dsu' lana dseáng'- ngóo' catɪb- í' e nináng` sojóng-na' lajaang` lajaang-na' fí' la fí' na, joba' 'ñíá'baa nitiúung-guí. Jo dsu' e já'- e ja` 'ñíá'a seen- cajo, có' seem` Tiquí'ii' colíng~ cóo'~ jnea~ contøng-. 33 Jo fíi- i 'nú' jalé' e júu^ la e lí' laco' niliseeng-na' juguiá- júu^ røø la'eáang' e seeng-na' cøøng` cóo'~ jnea~; jo 'nú' fí' jmigüí` la ni'íng'na' iihuí', jo dsu' ja` jmitúng^ óo'na' uí'~ e jo, có' jnea~ nicalí'baa fíi~ i 'líng' i ngí' ta~ jmigøøng` dsea` fí' jmigüí` la.

17

Mĩ camĩ Jesús uii quíá' dsea quíá'r-

¹ Jo mi cangĩ e café' Jesús jalé' e júu^ jo fĩ quini dsea guijáng' quíá'r-, joba' caséer' nir' fĩ yá'^ jmi'güũ jo cajĩn' lala:

—Teaa~, lanab catĩ í' quíe'-e, joba' jmi'goo' jnea~ e lí'^ laco'gui jnea~ nijmi'goo' 'nu'. ² Co' 'nu' nicacuóø'~ jnea~ e oo' ta~ jee~ jaléng' dsea jmi'güũ e laco' jaléng' dsea quíi' i nicacuóø'n' jnea~, nicuóø'ø're e niliseeiñ' cøøng' cóo'~ 'nu' lata~. ³ Jo niñiñ' e seeiñ' cøøng' cóo'~ 'nu' lata~ fĩng song calicuíñ' 'nu' jogui caliñir' e jíi'~ 'nu'b' dsea lin' Fidié' i já', jogui fĩng song calicuíñ' jnea~ cajo e lĩn'n Dsea Jmáang' i casíng' 'nu' fĩ jmi'güũ la.

⁴ Jo jnea~ nicajmi'goo' baa 'nu' jee~ jaléng' dsea jmi'güũ, co' lana nicatám' baa lajíi'~ ta~ quíe'-e e casín' jnea~ e cagajmée' e fĩ jmi'güũ la. ⁵ Joba' fón'n 'nu' lana, Teaa~, e nijmi'góo' jnea~ mi' niguién' tũu fĩ cáan' na lí'^ laco'gui la jmi'goo' 'nu' jnea~ fĩ ñiff' quíi' lajíi'~ ie~ mi~ nú'-gui e catiroo' jmi'güũ.

⁶ Jo jaléng' dsea i caguíng'~ 'nu' jee~ jaléng' dsea jmi'güũ e laco' ca'uíñ' dsea quíe'-e, joba' nicajmé' baa e nicaliñir' i~ dseáng' líng' 'nu'. Jo lajíng' dsea i cacuóø'n' jnea~ do, dsea quíi' ba' líiñ', jogui lana nica'ím' bre jalé' júu^ quíi'-. ⁷ Joba' lana jaléng' i dsea quíe'-e do niñir' e jalé' e nica'íng'~ jnea~, 'nu'b' dsea nicacuóø'~ jnea~ e jo, ⁸ co' nicaníi'~ baa jee~ jaléng' i dsea quíe'-e la jalé' júu^ e ca'ín'~ n quíi'~, jo nica'ím' bre jalé' e júu^ jo. Jo dsea do nicali'í' bre e dseáng'~ 'nu'b' dsea casín' jnea~ fĩ jmi'güũ la, jogui dseáng'~ jáb' líiñ' cajo e gáa' jnea~ fĩ lí' guíng'~ 'nu' fĩ ñiff'.

9 'Jogui lana m̄h̄'í 'nu' uii~ quiá'- jaléng' i dsea í; jo dsu' ja m̄h̄'í 'nu' uii~ quiá'- jaléng' dsea j̄m̄igüü i ja líng' dsea`quí'-, dsu' j̄j̄i' dsea` i cacuóøñ' j̄nea` dobing' i m̄h̄' uii~ quiá'-, co' j̄j̄i' í'bing' i líng' dsea`quí'-. 10 Jo e quíib- 'nu' lajalé' e sea`quíe- e jogui e quíeb- j̄nea` lajalé' e sea`quí'-, jogui la'eáang' i dsea` la nijnéng' j̄ial tí' niguó'^ lín'n.

11 'Joba' f̄h̄-guá' 'nu', Teaa~, jo` nija`gui j̄nea` f̄i' j̄m̄igüü la, dsu' jaléng'gui i dsea`quíe- e la nijé-bir f̄i' j̄m̄igüü la lajee~ e niníng'^ j̄nea` e nijaa` cóo' 'nu'. Jo co' 'nu' dsea` güean'^, joba' m̄h̄'í 'nu' e nijmée'^ í' i dsea`quíe- e la la'eáang' cóo' e 'gøñ' do lí'^ laco'gui e nicacuóøñ' j̄nea` e 'gøñ'n cajo, jo lajoba' niliseeng' i dsea`quíe- e la cøng' cóo' j̄neaa`aa' lí'^ laco'gui la seeng' 'nu' cóo' j̄nea` dseáng'- con-røø. 12 Jo lajee~ e nicataan~n f̄i' j̄m̄igüü la cóo' jaléng' i dsea`quíe- e la, nicaneb'- nii-re jogui nicajmé-baare í' la'eáang' cóo' e 'gøng' quíi- lí'^ laco'gui e nicuóøñ' j̄nea` e lín'n. Jo j̄j̄i' jaang' i dsea`quíe- e la ja` mí' ca'naaiñ` cóo' j̄nea~, dsu' dseáng'- j̄j̄i' i jaang' i nijáng' j̄nea` f̄i' jaguó' jaléng' dsea` i 'ní' níng- j̄nea~, j̄j̄i' í'bing' i nica'naang' conguaí, jo dsu' nicalí- lajo e lí'^ laco' niliti~ laj̄j̄i' e tóo' f̄i' ní' j̄i' quí-ii' e cajme' dsea` malí'gui eáang'.

13 'Jo lanagui catí í' e ninín'^n f̄i' lí' guiin'; jo dsu' jalé' e júu^ e fá'a la, fá'a lajee~ e táam`b̄h̄ f̄i' j̄m̄igüü la e lí'^ laco' jaléng' i dsea`quíe- e la nilí'íang` dsíir' dseáng'- laco' sí'í' lí'^ laco'gui la íang` dsii- 'ñiá'a cajo. 14 Jo j̄nea` nicaní'~baa júu^ quíi'- j̄ee~ i dsea`quíe- e la, jo dsu' jaléng' dsea` j̄m̄igüü i ja` cuíng' 'nu' 'ní' níim-bre jaléng' dsea`quíe- e la, co' jaléiñ' la ja` jí'r~ jalé' e 'lí'^ e sea` f̄i' j̄m̄igüü la o'gui j̄nea`

jíi'~i jalé' e jō cajo. 15 Jō dsu' ja` mǎi'~i 'nu' e laco' ni'uøøñ'~ i dsea` quié'~e fí' jmigüü' la, co' lajii'~ e mǎi'~i 'nu' e nijmées' í' íbre e laco' ja` nijmigøøng` i 'líng' ír'. 16 Jō lí' laco'gui jnea` ja` jíi'~i jalé' e 'lí' e sea` fí' jmigüü' la, joba' lajob líng' i dsea` quié'~e la cajo, co' ja` jíi'r~ jalé' e jō. 17 Jō mǎi'~guǎi' 'nu' e nijmigüëang'~ i dsea` quié'~e la e laco' nijmér' lajii'~ ta` e niqiuá'~ quiá'~bre la'eáang' e nica'íñ' jalé' júu` quií'-. 18 Jō lí' laco'gui 'nu' casín' jnea` jee` jaléng' dsea` i ja` cúing' 'nu' fí' jmigüü' la, joba' lajob jnea` cajo nisín' n i dsea` quié'~e la jee` jaléng' dsea` i ja` cúing' 'nu'. 19 Jō nijáang'~ 'ñiá' a e nijmee` e lajii'~ e iing'~ 'nu' e lí' laco' i dsea` quié'~e na nijáng' yaaiñ` e nijmér' lajii'~ e iing'~ 'nu'. Jō nilí' lajō la'eáang' cóo'~ e já' líng' i dsea` quié'~e la jalé' júu` quií'-.

20 Jō ja` mǎi'~i 'nu' dseáng'~ jíi'~ uii` quiá'~ i dsea` quié'~e la, co' lajob cajo mǎi'~i 'nu' uii` quiá'~ jaléng' i ná' gui i nijá' líng' júu` quié'~e mi` tí' lí' ninúr' e júu` e ni' i dsea` quié'~e la. 21 Jō mǎi'~i 'nu' e jaléng' i dsea` í' niliseeiñ` dseáng'~ cøøng' lajee` la'ó' rúíñ' e laco' ni'uíñ' lafa' jaang' dsea` la'eáang' e seeiñ` cøøng' cóo'~ jneaa`aa', Teaa~, lí' laco'gui seeng' 'nu' cøøng' cóo'~ jnea` jogui jnea` seen` cøøng' cóo'~ 'nu'. Jō mǎi'~i 'nu' e güiliseem`bre cøøng' lajō la'ó' ír' lí' dseáng' laco' sí'í', jō lajoba' nilijá' líng' jaléng' dsea` jmigüü' e 'nu' dsea` casín' jnea` fí' jmigüü' la. 22 Jogui nicacuøø`baa jaléng' i dsea` quié'~e la e niligüëaiñ' lí' laco'gui 'nu' nicacuøø'~ jnea` e nicaligüëan`n, jō lajoba' i dsea` quié'~e la ni'uíñ' lafa' jaam` dsea` lí' laco'gui la líng' jnea` cóo'~ 'nu' e jaam` dsea` líí'íí': 23 jogui niliseeng' jnea` cøøng' cóo'~ ír' jogui 'nu' cøøng' cóo'~ jnea~, jō lajoba'

ni'uíng⁻ laj^hiñ^h do dseáng^h lafa' jaam` dsea, jo lajoba' nililí^h jaléng^h dsea' jmigüí^h e 'nab` dsea' casín^h jnea~ fí' jmigüí^h la, jogui e eáam' 'neáan're cajo lí^h laco'gui la 'neáang' 'nua` jnea~.

²⁴ Jo mí^h guí^h 'nua, Teaa~, co' 'nab` dsea` cacuóø^h jnea~ jaléng^h i dsea` quié⁻ e la, joba' iing~ jnea~ e seem`bre cøøng` cóo^h jnea~ fí' lí^h niní^h, jo lajoba' ninír` jial tí' niguó^h lín^h, jo e job e cacuóø^h 'nua` jnea~ do. Co' laj^hi' lí^h ba' e 'neáan' 'nua` jnea~, co' laj^hi' lati' mí^h nua^h gui e catiroo` jmigüí^h ba' e jmoo^h lajo cóo^h jnea~. ²⁵ Teaa~, dseáng^h eáam' guiúng⁻ 'nua, jo fíim' dsea` i seeng` fí' jmigüí^h la ja` cuíñ^h 'nua; jo dsu' jnea~ dseáng^h lajam^h cuín^h 'nua, jogui niñi'bi jaléng^h i dsea` quié⁻ e la e 'nab` dsea` casín^h jnea~ fí' jmigüí^h la. ²⁶ Jogui nicacuóø`baar e caliñir` i dseáng^h líng^h 'nua, jogui mí' noo'bi nifí^h ire lajo cajo e laco' nijmi'neáang` rúñ^h lí^h laco'gui la 'neáang' 'nua` jnea~; jogui lajoba' niliseeng` jnea~ cøøng` cóo^h ír` cajo.

18

Mí' casang^h dsea` Jesús

(Mt. 26:47-56; Mr. 14:43-50; Lc. 22:47-53)

¹ Jo mí^h cang^h e casíng⁻ Jesús cóo^h Tiquiá'r^h, joba' cagüi'bre colíng⁻ cóo^h i dsea` guiáng⁻ quiá'r⁻ do e fí' dsí' 'nua' tú⁻ fíng⁻ do, jo cangolíñ^h lí^h lí' 'ngóo^h lí^h iu` cóo^h í^h e sií` Cedrón. Jo mí^h catáñ⁻ lí^h lí' 'ngóo^h e í^h do, jo caguilíñ⁻ fí' cóo^h dsí' iá, jo fí' job ca'í⁻ Jesús colíng⁻ cóo^h i dsea` quiá'r⁻ do. ² Jogui i Judas Iscariote i nicanaang⁻ 'nñng` Jesús do, guiúb⁻ cuír` e fí' dsí' iá` jo, co' lamí⁻ jéeng`gui jmiguiub' ya' caseáng^h Jesús cóo^h i dsea`

quia'r- do e fi' jo. ³ Jo fi' job caguié- Judas Iscariote ie~ jo, jo nijeeiñ` i fíng' 'lée- quia'- dsea` romano cóo'~gui cóo` tú~ máng'~ dsea` i nées' ni~ guá'- quia'- dsea` Israel i casíng' fi~ jmidsea` quia'- dsea` do colíng' cóo'~ i dsea` góor` i líng' dsea` fariseo cajo. Jo jaléng' i dsea` do quier' jalé' ñisú' cóo'~gui jalé' quí' e coo` e laco' cuø` jì e jné'r'. ⁴ Jo co' niñi'bi Jesús jalé' e tí' lí' nidsingúiiñ- do, joba' mi~ calilí'r^ e caguilíng- i dsea` do fi' jo, joba' casíng' 'ñia'r' tí' quini'gui laco' la teáang- i dsea` quia'r- do, jo lalab cajmíngí'r- i dsea` i caguilíng- do jo cajíñ'-:

—¿i' ñilíng-na' 'náng'na' fí' la?

⁵ Joba' cañi' i dsea` do quia'- Jesús jo cajíñ'-:

—Jesús i seeng` fí' Nazaret 'néng'naa'.

Joba' cañi' Jesús quiaíñ'- do jo casí'r- dsea` do:

—Jnea~bi dsea` í'.

Jo ie~ jo dob quíng'~ Judas Iscariote jee~ i dsea` i caguilíng- tóø` Jesús do. ⁶ Jo mi~ tí' lí' cajíng'- Jesús e í'bre siir` lajo, joba' lajim` i dsea` i caguilíng- do cató- yaaiñ~ ladsifí' lana cartí' caneaiñ- uø-.

⁷ Jo mi~ cangí' jo, Jesús cajmíngí'-tur i dsea` do jo casí'-reiñ':

—¿i' dseáng'- i 'náng'na' fó'na'?

Joba' cañi'tu i dsea` do quia'- Jesús jo cajíñ'-:

—Jesús i seeng` fí' Nazaret 'néng'naa'.

⁸ Joba' Jesús cañi'tur quiaíñ'- do calé' catú- jo casí'-reiñ':

—Jo nicafíi~baa 'nú' e jneab~ dsea` í', jo song jneab~ dsea` 'náng'na', joba' cuøø'~ba' fí' i dsea` quie` e la e nidsilíñ`.

⁹ Jo café' Jesús e júu^ na e lí'^ laco' caliti~ lajii~ júu^ quia'r- e café'r' lami~ jééng'gui mi~ cajíñ'- lala: “Tea~, jaléng' i dsea` quí' i cacuøø'n~ jnea~

do, jíi'~ jaang` ja` ii` ca'naang` cóo'~ jnea~." 10 Jo dsifí lanab cagui` Tú^ Simón ñisú' e quier' ie~ jo, jo caquiú'r` cataang` logua` dsée' quia'- jaang` dseañú" i sii` Malco i nilíng' dsea` 'léeng'~ quia'- i jmidsea` i laniing~ ie~ jo. 11 Jo mi~ cangá~ Jesús quia'- lajii'~ e calí~ do, joba' lalab casí'r~ Tú^ Simón jo cajíñ'~:

—Tú^, te'tu' ñisú' quíi'- eáang^ quia'-, co' Tiquié^baa i cuø' jnea~ e iihu' la, joba' 'né~ ni'ím'~baa jíi'~ laco' e nicuør~.

Mi~ cangojgeáaiñ^ Jesús fí' quini` jaang` jmidsea` i sii` Anás

(Mt. 26:57-58; Mr. 14:53-54; Lc. 22:54)

12 Jo mi~ cangí jo, jaléng' i 'léé~ do cóo'~gui i fii~ quia'r~ do colíng~gui cóo'~ i dsea` Israel i née' ni' guá'- quia'r~, casam'~bre Jesús jo ca'ñú'r' guoo` dsea` do. 13 Jo la'uii~ cangojgeáaiñ^ dsea` do fí' quia'- jaang` jmidsea` i sii` Anás, co' í' nilíiñ' ngoo~ quia'- i jmidsea` i sii` Caifás ie~ jo, jo i Caifás do líiñ' jmidsea` laniing~ quia'- dsea` Israel ie~ jii` jo. 14 Jo i jmidsea` Caifás lab cajo, lami~ jéeng'gui casí'r~ dsea` i quie' nifí' quia'- dsea` Israel e guiá~guib ni'uíng~ quia'- jaléng' i dsea` í' e nijúung~ jaang` dseañú" cuaiñ` quia'- góor` laco'gui e nijúung~ i fíng' i dsea` góor` do.

Mi~ cajíng'~ Tú^ Simón e ja` cuiñ` Jesús

(Mt. 26:69-70; Mr. 14:66-68; Lc. 22:55-57)

15 Jo mi~ catør~ Jesús fí' quia'- i jmidsea` Anás do, jo ti'leám' gáng~ dsea` quia'- Jesús laco' cangáng'~ dsea` do, jaaiñ' do siir` Tú^ Simón, jogui i jaang'gui do cuím` rúíñ' cóo'~ i jmidsea` laniing~ do, joba' ca'í~biñ' do e fí' dsí' lí~ catør~ Jesús, 16 dsu' i Tú^

Simón do fi' caluu' o'nú' cajer'. Jo mi~ calilí' i dsea` quiá'- Jesús i cuíng` rúng' cóo' i jmidsea` laniing` do e caluub` caje' Tú' Simón, joba' cagü'í'bre fi' caluu' jo casíiñ` cóo' i dseamf` i sing' jmóo` í' e jní' do e laco' nicuóñ' do fi' e ningíng` Tú' Simón fi' dsí' sigui' quiá'- e 'nú' do, joba' cacuø'biñ' do fi' lajo. ¹⁷ Jogu' i dseamf` i jmóo` í' e jní' do, lalab cajmingí'r` Tú' Simón jo cajíñ'`:

—¿Su o' dsea` quiá'- i dseañu' i ní' nabi 'nu'?

Joba' cañí' Tú' Simón quiá'- i dseamf` do jo casí'-reiñ':

—U~, o' í' jnea~.

¹⁸ Jo co' ie~ jo eáam' güí', joba' jaléng' dsea` 'léeng' i jmóo` ta~ sinúu' quiá'- i jmidsea` Caifás do cóo' gu' jaléng' i née' ní' guá' quiá'- dsea` Israel ninicaji'r` j' e sigui' do, jo fi' dob neáaiñ' jmiguiáñ' ca' j'. Jo fi' dob caje' Tú' Simón e jmiguiáñ' cóoñ' do cajo.

*Mi~ caguiéng' Jesús fi' quini' fi' jmidsea`
(Mt. 26:59-66; Mr. 14:55-64; Lc. 22:66-71)*

¹⁹ Jo lajee` e teáng` i dsea` i jmiguiáng' e fi' sigui' do, joba' dob iuung` Jesús cóo' gu' i fi' jmidsea` do e fi' dsí' sinúu' do. Jo lajee` jo i fi' jmidsea` do canaaiñ' jmingí'r` Jesús uii' quiá'- dsea` quiáñ' do cóo' gu' jalé' e nica'e'r' jaléng' i dsea` í' cajo.

²⁰ Joba' lalab cañí' Jesús quiá'- i dsea` do jo casí'-reiñ':

—Jnea~ nica'ée` e jaléng' dsea` fi' jee~ dsea` fím'; jogui contøøm` nica'ée` ere fi' dsí' sinúu' guá'-jiu` osi fi' guá' fé' quiá'- dsea` góo`naa' dsea` Israel e si' fi' Jerusalén e fi' lí' seáñ' e laco' jmféñ' Fidié'; jo ja` mí' caguiá'a jalé' e júu` jo fa' coo' lí' ja` lí'

nú⁻ dsea[.] 21 J_oba', ¿jiali' jnea[~] jmingí[~] e jo? Co' cuøøm[~] güijmingí[~] jaléng[~] i dsea[~] i nicanúu⁻ jalé[~] júu[^] quié⁻ e e nicaguiá⁻ a do, j_oba' í[~]bing' i nijmeá⁻ 'nú[~] júu[^] e[~] jalé[~] e nicafí⁻ ire do. Co' niñib' jaléng[~] i dsea[~] í[~] jalé[~] e júu[^] e nicafá⁻ a do.

22 J_o mi[~] tí[~] lí[~] cañí[~] Jesús quiá⁻ i fi[~] jmidsea⁻ do e júu[^] j_o, j_oba' jaang[~] i dsea⁻ i néé[~] ni[~] guá⁻ quiá⁻ dsea⁻ Israel do cajnéer[~] moni[~] Jesús, j_o mifíng[~] casí⁻r⁻ dsea⁻ do j_o cajíñ⁻:

—¿Su lanab ngí⁻ quiá⁻ i fi[~] jmidsea⁻ na?

23 J_oba' cañí[~]tu Jesús quiá⁻ i dsea⁻ do j_o casí⁻reiñ⁻:

—Song gab[~] lí[~] e júu[^] e nicafá⁻ a na, j_oba' iin[~]n jmée[~] júu[^] jiali' e lí[~] laj_o e nicafá⁻ a na; j_ogui song guiáb⁻ lajii[~] e júu[^] e nicafá⁻ a na, j_oba' ¿jiali' caba[~] monii⁻?

24 J_o mi[~] cangí[~] j_o, i fi[~] jmidsea⁻ Anás do caguiéiñ[~] Jesús e 'núung[~] dsea⁻ do fí[~] quini[~] i fi[~] jmidsea⁻ rúiiñ[~] i sii[~] Caifás do.

Mi[~] cajíng⁻tu Tú[^] Simón e ja⁻ cuiñ[~] Jesús

(Mt. 26:71-75; Mr. 14:69-72; Lc. 22:58-62)

25 J_o lajee[~] j_o, do[~]bi sing[~] Tú[^] Simón e jmiguiáiñ[~] fí[~] 'ni[~] jí[~] e fí[~] sigui[~] do, j_o co_o⁻ cajmingí⁻ i dsea⁻ teáang⁻ do í[~] j_o cajíñ⁻:

—¿Su o' quíim[~]bi 'n[~] jee[~] dsea⁻ quiá⁻ i dseañ[~] i iuung⁻ do?

J_oba' cañí[~] Tú[^] Simón quiáiñ⁻ do j_o casí⁻reiñ⁻:

—U[~], o' í[~] jnea[~].

26 J_o mi[~] cangí[~] j_o, jaang[~]gui dsea⁻ 'léeng[~] quiá⁻ i jmidsea⁻ laniing⁻ do i líng[~] ee[~] i dseañ[~] i caqui[~] Tú[^] Simón logua[~] do, j_o dsea⁻ í[~] cajmingí⁻r⁻ Tú[^] Simón lala j_o cajíñ⁻:

—¿Su o' 'nʉ̀'bi i camánˉn mi˜ cangoséng'ˆnaa' i Jesús na e fi' dsí' íá do?

27 Jogui caléˆ catúˉ cajíng'ˆ Tʉ́ˆ Simón e o' dseaˆ í líiñ', joba' dsifí' mi˜ cangíˆ lajɔ mifíngˆ caqui' jaangˆ tuidséeˆ jóng.

*Mi˜ cangojgeáaiñˆ Jesús fi' quiniˆ dseata˜ Pilato
(Mt. 27:1-2, 11-14; Mr. 15:1-5; Lc. 23:1-5)*

28 Jo mi˜ cangíˆ jo, caguímˆbre Jesús fi' quiáˆˉ i jmidseaˆ Caifás do, jo cangojgeáaiñˆ dseaˆ do fi' quiniˆ jaangˆ dseata˜ romano i sií Pilato. Jo dsaco' ie˜ jo nijaquíéngˆ nijneábˆ, jogui guati'lóˆ jmiibˆ cajo, joba' jaˆ cangotáang'ˆ i dseaˆ Israel do fi' dsí' e 'nʉ̀fiˆ do, co' faco' mi˜ cajméerˆ lajɔ, joba' jaˆ jmitir˜ jóng lají'ˆ júuˆ quiu' ta˜ quiá'rˆ quiáˆˉ lají'ˆ e quí'ˆ tiiñˆ e jmóorˆ mi˜ tí jmi˜ Pascua; jo co' jaˆ cangotáang'ˆ guir fi' dsí' jo, joba' cuøømˆ dø'rˆ e jmiñiˆ e silíngˆ e gø'rˆ ie˜ jmi˜ jo. 29 Jo mi˜ tí líˆ cangáˆ dseata˜ Pilato e nitéeˆ dseaˆ Jesús, joba' cagüi'firˆ jo casí'rˆ jaléngˆ i dseaˆ do lala:

—¿E˜ dseeˆ e cuø'na' i dseañu' na?

30 Joba' cañí' dseaˆ Israel quiáˆˉ i dseata˜ Pilato do jo casí'rˆ reiñ'ˆ:

—Fa' jiuˆgui i dseañu' la jaˆ jmóorˆ ta˜ 'lée' jee˜ jaléngˆ dseaˆ, joba' jaˆ jáang'ˆnaa're jóng fi' quini'ˆ faco' lajɔ.

31 Joba' lalab cañí' dseata˜ Pilato quiáˆˉ i dseaˆ Israel do jo cajíñ'ˆ:

—Teeˆ 'nú' yaangˆna' i dseañu' góona' na jo quidsina' í' quiá'rˆ yaangˆna' lí'ˆ laco'gui la quí'ˆ tíngˆna' cóo'ˆ júuˆ quiu' ta˜ quí'ˆna', 'nú' dseaˆ língˆna' dseaˆ Israel.

Jō mi~ canúu~ i dsea` Israel do e júu^ jo, jōba' lalab cajíñ'~:

—Dsũ' jnea^, dsea` lí'naa' dsea` Israel, ja` sea` fí qui~naa' quiá'~ dsea` romano e nicuøø^naa' iihuí' lí'^ doñí' ií` dsea` cartí' nijúuiñ~.

³² Jō jōb caliti~ lajii'~ júu^ e cajíng'~ Jesús lami~ jéeng'gui quiá'~ jial lí' 'mó~ e nitíñ~. ³³ Jō mi~ cangí' jō, ca'ib~tu dseata~ Pilato fí dsí' 'nufí' quiá'r~, jō cató'r~ Jesús fí lí~ quidsir' í', jō cajmingí'r~ dsea` do jō cajíñ'~:

—¿Su 'nũb` i líng' dseata~ dsea` féng' i quié' nifí' quiá'~ dsea` Israel?

³⁴ Jōba' cañí' Jesús quiá'ñ'~ do jō casí'r~ dsea` do:

—¿Su uøø'ba' iin'~ ñí'^ e jmíngí'~ jnea~ na, ofa' lí'^ canúu'~ e fé' dsea` jím' é?

³⁵ Jōba' lalab cañí' dseata~ Pilato quiá'~ Jesús jō casí'r~ dsea` do:

—Ja` dsea` Israel líng' jnea~ la. Cō' jaléng' dsea` góo' dsea` Israel colíng'gui cóo'~ jaléng' fii~ jmid-sea` quí~na', dsea` í'bing' i nicajáng' 'nũ' fí' quini~ la lana. Jōgui 'nũ, ¿e~ dsee~ sea` quí'~ quiá' e 'n'íng' dsea` 'nũ'?

³⁶ Jōba' lalab cañí'tu Jesús quiá'~ i dseata~ do jō cajíñ'~:

—Ja` sí'íng' jnea~ e niquí'ú'^u ta~ lacō'gui quiu' ta~ jaang' dsea` jmigüí' fí' la, cō' facō' lajō, jōba' seem' dsea` quié~ e i nijmeáan'~n ta~ e lacō' ja` nijáng' dsea` jnea~ fí' quini~ dsea` góo'o dsea` Israel facō' lajō. Cō' lí'^ lacō' fá'a na, e ja` sí'íin^n e niquí'ú'^u ta~ lacō' jaang' dsea` jmigüí'.

³⁷ Jōba' cañí'tu dseata~ Pilato quiá'~ Jesús jō casí'r~ dsea` do:

—Jō 'nub`dsea`lin' dseata~ dsea`féng' i quie' nifi' quiá'- dsea`Israel liya.

Jōba' cañi'tu Jesús quiá'- i dseata~ do jō casi'-reiñ':

—Lajōb lí' lí^ laco'gui nicafee'~ na, e jneab~ i dseata~ dsea`féng' í. Cō' jnea~ cagá-a fí jmiǵüí la mi~ cangáan'~n e laco' niguiaa- jalé' júu^ já'- . Jō jaléng' dsea` i já'- líng` e júu^ jō, jōba' dsea` quie'-baa líiñ', cō' núu'~bre jalé' júu^ quie'-e.

³⁸ Jō mi~ canúu- dseata~ Pilato lajii'~ júu^ quiá'- Jesús, jōba' cajmingí'r- dsea` do lala jō cajíñ'-:

—Jō ¿jngang~ e júu^ já'- do?

Mi~ cahuí' ta~ e nijúung- Jesús

(Mt. 27:15-31; Mr. 15:6-20; Lc. 23:13-25)

Jō mi~ cangí e cajmingí dseata~ Pilato e júu^ jō, jōba' cagüi'hib'tur calé' catú- fí lí' teáng^ i dsea` Israel do e laco' nisíng-tur cóoiñ'~ do calé' catú-, jōba' lalab casi'r- i dsea` do:

—Jii'~ coo` dsee- ja` niguié' jnea~ e nica'ée` i dseañu' la. ³⁹ Jō cō' 'nú' quí'- t'ing`na' e laan- jaang` dsea` góó'na' i sijníng~ lajee' mi~ tí jmií~ quí'na' e catí lana e sií Pascua, jōba' jmingí'í' 'nú' lana, ¿su iing~na' e nilaan- i dseata~ dsea`féng' quí'na' i síng' la?

⁴⁰ Jō mi~ canúu- jaléng' dsea` Israel i teáng- do ie~ jō e júu^ quiá'- i dseata~ Pilato do, jōba' lajim`bre canaaiñ` ta'r' mii'~ jō fé'r':

—¡Ja' laan'- i dsea` na! Jō ¡leaang- Barrabás!

Jō i Barrabás i éeiñ` do sijníiñ' do dsu' uí' e jmóor` ta` 'ní' níng- dseata~.

19

¹ Jo mi~ canúu~ dseata~ Pilato lajii~ júu^ e casí~ dsea` ír` do, joba' caquiur' ta~ e nisám' i `lée~ quiá'r~ do Jesús e laco' nibóøng~ neiñ' do cóo~ loo~ jó' e lí' 'nii~. ² Jo mi~ cangî jo, i `lée~ do cajméer` coo` lí'^ corona cóo~ layaang~ tóo~, jo e job catá'r~ fí mogui~ Jesús, jogui cajlíiñ` dsea` do cóo~ coo` 'mi' niung' e lí' laco' e quie` dsea` niing~ i quiu' ta~. ³ Jo mi~ cangî jo, cangoquieeiñ' fí quiá'~ lí' sing' dsea` do, jo lalab canaañ` lóøiñ` dsea` do jo sí'r` lala:

—¡Güiliseem` huóø^, dseata~ dsea` féng' quiá'~ dsea` Israel!

Jo lajee` jo jnóor' fí moni~ dsea` do.

⁴ Jo mi~ tí lí' cagüi'í'tu dseata~ Pilato e fí lí' teáng^ i dsea` Israel do, joba' lalab casí~ reiñ' do jo cajíñ'~:

—E laba' fíi~ i 'nú'`, e lab nisín'^n i dseañu' la fí quini^na' e laco' niliñi^na' e jii~ coo` dsee~ ja` mí cadsé'e quiá'r~, co' lajib` nicajmingí'ire.

⁵ Jo lajee` job cagüi'í' Jesús e ni'iu~ e lí'^ corona e lí' cóo~ yaang~ tóo` do fí moguir~, jogui jlíiñ` e 'mi' e niung' huíng' do. Jo lajee` nising' Jesús fí quini` i dsea` do, lalab cajíng'~ dseata~ Pilato e sí'r` jaléng' i dsea` teáng~ do ie~ jo:

—¡Lab nising' i dseañu' la fí quini^na' náng!

⁶ Jo mi~ tí lí' cangá~ jaléng' fii~ jmidsea` quiá'~ dsea` Israel cóo~ gui jaléng' dsea` i née' ni` guá'~ quiá'r~ e nising' Jesús do, joba' lalab canaañ` áiñ` i dseata~ do jo fé'r`:

—¡Fí dse' crúu^ teáng^ i dsea` na!

Joba' cañi' dseata~ Pilato quiá'~ i dsea` teáng~ do ie~ jo, jo casí~ reiñ':

—Tee⁻ba're, jo yaam[~]ba' güiteáang[~]na're fí dse[^] crúu[^], co[^] jnea[~] ja[^] mí cadse[^]e jíí[^] coo[^] dsee⁻ quiá^{r-} quiá⁻ lajíí[^] e nicajmingí[^]ire.

⁷ Jo dsu[^] lalab cañí[^] i dsea[^] Israel i teáang⁻ do ie[~] jo quiá⁻ dseata[~] Pilato jo casí^{r-} dsea[^] do:

—Seab[^] coo[^] júu[^] quiu[^] ta[~] qui⁻ jnea[^], dsea[^] líí[^] dsea[^] Israel, jo lalab líí: Song jaang[^] dsea[^] fé^{r-} e røøb[^] cøøiñ[^] cóo[^] Fidié[~], joba[^] 'né⁻ nijúum⁻bre jóng. Jo lajòb líí cóo[^] i dsea[^] na, joba[^] dseáng⁻ 'né⁻ nijúum⁻bre.

⁸ Joba[^] mí[~] tí lí[~] canúu⁻ dseata[~] Pilato e júu[^] jo, eáang[^]gui cafóíñ[^] jóng. ⁹ Jo ca'íb⁻tur e fí lí[~] quiu^{r-} ta[^] do colíing[~] cóo[^] Jesús, jo fí job[^] cajmingí^{r-} dsea[^] do jo cajíñ⁻:

—¿Jie[~] fí lí[~] ñí[^] 'nu[?]

Jo dsu[^] Jesús jíí[^] coo[^] ja[^] e cañír[^] quiá⁻ dsea[^] do. ¹⁰ Joba[^] cañí^{t-}tu dseata[~] Pilato jo casí^{r-} Jesús jo cajíñ⁻:

—¿Su ja[^] iin[^] ngíí⁻ jíí[^] coo[^] quié⁻ e jóng? ¿Su ja[^] ñí[^] 'nu[^] e cuøøm[^] nifí[^] i dsea[^] quié⁻ e e niteáiñ⁻ 'nu[^] fí dse[^] crúu[^], jogui cuøøm[^] bi cajo e nifí[^] ire e nileáiñ⁻ 'nu[^] faco[^] lajò?

¹¹ Joba[^] lalab cañí[^] Jesús quiá⁻ i dseata[~] do jo casí^{r-} dsea[^] do:

—Jíí[^] coo[^] bí ja[^] sea[^] quií⁻ e niquíu[^] ta[~] quié⁻ e faco[^] ja[^] Fidié[~] nicacuø^{r-} 'nu[^] e catíñ⁻ lajò; joba[^] i dsea[^] i cajáng[^] jnea[~] fí jaguóo[^], eáang[^]guib røøiñ[^] dsee⁻ lacò[^]gui 'nu[^].

¹² Jo job[^] mí[~] canaang[^] dseata[~] Pilato e 'nór[^] jial nileáiñ⁻ Jesús, jo dsu[^] mí[~] calíí[^] i dsea[^] Israel do e jo, joba[^] canaaiñ[^] ta[^]guír mí[^] jo sí^{r-} dsea[^] do lala:

—Song nilaan⁻ i dsea[^] na, joba[^] líí lafa[^] 'ní[^] máam[^]ba[^] jóng i dseata[~] dsea[^] féng[^] i guing[~] fí

Roma, co' lí^ doñí' ii` dsea` i jing'- e líiñ' jaang` dseata~ dsea` féng', joba' líí' lafa' e 'ní' ním-bre i dseata~ i guing~ fí' Roma do.

13 Jo mi~ tí' lí~ canú- dseata~ Pilato e cajing'- i dsea` Israel do lajo, joba' caquiur' ta~ e niguím-biñ' do Jesús jo nidsijéiñ` dsea` do dseáng'- lí~ quidsí' dseata~ Pilato í' quía'- dsea` fí' coo' lí~ sii' Gabata, jo cóo' jmi' hebreo guóng' Guiá' fí' lí' Siní' Cúu~.

14 Jo ie~ jo dseáng'- guati'ló- jmi~ Pascua quía'- dsea` Israel, jo ná'- guieñib'- ningóo' mi~ cajing'- dseata~ Pilato e casí'r- i dsea` Israel do:

—¡Lab sing' i dseata~ dsea` féng' i quie' nifí' quí-na'!

15 Jo dsu' jaléng' i dsea` do canaaiñ` ta'tur mi~ jo fé'r':

—¡Güijúung- i dseañu' na fí' dse' crúu'!

Joba' cajmingí'- dseata~ Pilato jaléng' i dsea` do jo casí'-reiñ':

—¿Su jneab~ catín-n nijngán!^n jaang` dseata~ dsea` féng' i quie' nifí' quí-na'?

Joba' cañí' jaléng' fi~ jmidsea` i teáng- do ie~ jo, jo casí'r- i dseata~ do lala:

—¡Dseáng'- jíi~ dseata~ dsea` féng' i guing~ fí' Roma, jíi~ dseata~ í'bing' i seeng' quí-naa'!

16 Joba' dseata~ Pilato cajám'bre Jesús fí' quini~ jaléng' i dsea` do ie~ jo, jo i dsea` do cangojéem'bre Jesús fí' lí~ nitáng- dsea` do fí' dse' crúu'.

Mi~ catáng- Jesús fí' dse' crúu'

(Mt. 27:32-44; Mr. 15:21-32; Lc. 23:26-43)

17 Joba' ca'uøøm i dsea` do jéiñ` Jesús, jo 'ñiab' dsea` do dsíiñ` crúu' quía'r- cangór- fí' coo' lí~ sii' Cuo' Mogui~ 'Lii~ e sii'bi Gólgota cóo' jmi' hebreo

e féⁿ dsea` Israel. 18 Jo miⁿ caguiliñⁿ fi' jo, joba' fi' job cateáaiñⁿ dsea` do fi' dseⁿ crúu[^], jo jaang`gui dsea` taang` la cataang` cáaiñⁿ fi' dseⁿ crúu[^] cajo.

19 Jo ieⁿ jo i dseataⁿ Pilato do caqui^ur' taⁿ e nitóⁿ fi' yá[^] guiⁿ crúu[^] quiáⁿ Jesú^s e júu[^] la: “Jesús i seeng` fi' Nazaret, dseataⁿ dsea` féng^l quiáⁿ dsea` Israel.”

20 Jo e jo catóⁿ cóo^o ni' íng^l jmíⁱ, jmíⁱ latín cóo^o jmíⁱ hebreo jogui jmíⁱ griego. Jo fím^l dsea` Israel ca'ir^l e júu[^] jo ieⁿ jo, co^l e fi' líⁿ catángⁿ Jesú^s do ja huíⁱ e éang^l laco^l la née^l fiⁿ Jerusalén. 21 Jo dsu^l miⁿ cangáⁿ fiⁿ jmidsea` quiáⁿ dsea` Israel lajiiⁿ júu[^] e to^o fi' yá[^] crúu[^] quiáⁿ Jesú^s, joba' lalab cas'irⁿ i dseataⁿ Pilato do jo cajínⁿ:

—Guiúⁿ gui jaⁿ nitóⁿ e júu[^] na, jo güitóⁿ lala: “Lab i jmigó^o e líiñⁿ dseataⁿ dsea` féng^l quiáⁿ dsea` Israel.”

22 Jo miⁿ canúuⁿ dseataⁿ Pilato e júu[^] jo, joba' lalab cañirⁿ quiáⁿ i dsea` do jo cas'irⁿ reiñⁿ:

—Lajiiⁿ e júu[^] e nicaquiáⁿ taⁿ e nicatóⁿ na, dseángⁿ lanab nijéⁿ.

23 Jo miⁿ tíⁿ líⁿ cang^l e cateángⁿ i 'léeⁿ do Jesú^s fi' dseⁿ crúu[^], joba' casitíiñⁿ sí[^] dsea` do jo cajméerⁿ guié[^] lajeeⁿ quiúuiñⁿ la'ó^l líiñⁿ 'léeⁿ, jmacó^o e 'mi^l do quiáⁿ rⁿ lajaang` lajaaíñⁿ. Jo dsu^l e sí[^] Jesú^s e cóo^o gui do, 'mi^l contø^m líⁿ jo jaⁿ sí^l mi^l cajo. 24 Jo lajeeⁿ jo i 'léeⁿ do canaaíñⁿ síiñⁿ la'ó^l yaaíñⁿ lala:

—Jaⁿ guingⁿ nisiingⁿ naa^l e 'mi^l na, jo macó^o ooⁿ neⁿ duu^l iⁿ nilíⁿ nicó^o.

Jo cóo^o e nab calitiⁿ jiiⁿ laco^l la féⁿ fi' niⁿ jìⁿ quiáⁿ Fidiéⁿ e cajme^l dsea` malíⁿ gui eáng^l líⁿ féⁿ lala: “Cajméeb` dsea` guié[^] jalé^l sí^l jogui cacóor` quiáⁿ iⁿ nilí^l e sí^l contø^{ng} do.” Jo lajob dseángⁿ cajméeⁿ i 'léeⁿ do cóo^o sí[^] Jesú^s.

25 Jo lajee˘ e táang` Jesús fí dse˘ crúu˘, dob teáang˘ quiúung˘ dseam˘ e tii˘ laco˘ si˘ e crúu˘ do; jo jaaiñ˘ do líng` niquiá˘ Jesús, jogui jaang`gui rúng˘ dsea` ngáang˘ cõõ˘ niquiá˘r˘, jogui jaang`gui i sii` Yá˘ i líng` dseam˘ quiá˘- jaang` dseañu˘ i sii` Cleofas, jo jaang`gui i sii` Yá˘ i seeng` fí Magdala. 26 Jo lajee˘ job cangáng˘ Jesús niquiá˘r˘, jo cáang` i niquiá˘r˘ do sing˘ jaang` dsea` quiá˘- Jesús i eáang` 'neáaiñ˘, jo lajee˘ jo lalab casí˘ Jesús i niquiá˘r˘ do e éeiñ˘ i dsea` quiá˘r˘ i iĩñ˘ eáang` do jo cajíñ˘-:

—Janú˘, dseam˘, nab sing˘ i líng` laco˘ jõõ˘ do.

27 Jo mi˘ cang˘ e jíñ˘ e jo, joba˘ casí˘r˘ i dsea` i iĩñ˘ eáang` do lala:

—Nab sing˘ i líng` laco˘ niquiá˘.

Joba˘ mi˘ cajíng˘- Jesús lajo, i dsea` i iĩñ˘ eáang` do ca'ím˘ bre niquiá˘ dsea` do e líiñ˘ do laco˘ dsea` sináú˘ quiá˘r˘.

Mi˘ cajúng˘ Jesús

(Mt. 27:45-56; Mr. 15:33-41; Lc. 23:44-49)

28 Jo mi˘ m̄ng˘ guijiũ lajo, jo cõ˘ niñib˘ Jesús e nicatób˘ jalé˘ ta˘ quiá˘r˘, jogui e laco˘ niliti˘ jíi˘ laco˘ fé˘ fí ni˘ jí˘ quiá˘- Fidié˘ e cajme˘ dsea` malii˘ gui eáang`, joba˘ cajíñ˘ lala:

—Dsíng˘- jmijm̄n˘.

29 Jo ie˘ jo nisi˘ cõõ˘ dsuu˘ e røøng˘ a˘ jmí˘ mí˘ huíng˘ jó˘ e níjii˘, joba˘ cayé˘ dsea` e jmí˘ mí˘ huíng˘ jó˘ do cõõ˘ cõõ˘ joo˘, jo casiguír˘ fí cõõ˘ yá˘ si˘, jo cõõ˘ e job ca'úuiñ˘ fí mo'oo˘ Jesús. 30 Jo cayub˘ Jesús e jmí˘ mí˘ huíng˘ jó˘ jí˘ do. Jo mi˘ cang˘ jo, joba˘ cajíñ˘-:

—Nab nicató˘ lajii˘ ta˘ cagá˘ a.

Jō cō' cató' e café'r e júu^ jō, jō cajgiéer- moguir-
jō mifñing` cajúm-bre jóng.

Mi~ ca'ia' jaang` 'léé- ñisü' fí' mo'uóø' Jesús

³¹ Jō 'ñaia' ie~ jmii~ e cajúng- Jesús do, líí e
guati'ló- jmii~ Pascua quiá'- dsea` Israel, jō cō' ja`
quí'- tñing` i dsea` í fa' e seáng- 'líí quiá'r- fí' dse`
crúu^ lajee` e jmii~ jō, cō' dseáng'- jmii~ e laniim-
quiá'r- ie~ jō, joba' camí' dsea` Israel fí' i dseata`
Pilato do e nicuóñiñ'- do fí' e nijér- tñi~ i dsea` taang`
dse` crúu^ do e laco' nijúuiñ'- do jminá-gui, jō
lajoba' cuóøng` e nijgiáaiñ' do e fí' lí' taaiñ'~ do.
³² Joba' cangám` i 'léé- do fí' e nidsilíiñ- e nijér-
tñi~ i dsea` gaang` i taang` dse` crúu^ do; jogui lajōb
cajméer', cajée`bre tñi~ i dsea` la'uui~ i táang` dse`
crúu^ cáang` Jesús do; jō mi~ cangf jō, lajōb cajméer`
quiá'- i dsea` jaang`gui do i táang` dse` crúu^ cajo
ca' dse` crúu^ lí' táang` Jesús. ³³ Jō mi~ caguilíng- i
'léé- do fí' lí' táang` Jesús fí' dse` crúu^, joba' calilí'r`
e ni'líim~ dsea` do, joba' jo` e cajmeáiñ' dsea` do fa`
cajée`guir tñiñ'.

³⁴ Jō nañi' fa' e calilí' i 'léé- do e ni'líim~
Jesús, dsu' jaang` lajee` la'ó' ír` ca'iar` ñisü' fí'
dse` mo'uóø' dsea` do, jō ladsifí lanab catuü`
jmii` cōq'gui jmi'øøiñ-. ³⁵ Jō i dsea` i fé' e júu^
la, dseáng'- e já'-ba' e cangár- laco' calí-, joba'
dseáng'- jáb'- júu^ e fé'r` do e laco' jaléng' 'nú' jáb'-
nilíng`na' dseáng'- laco' calí-. ³⁶ Jō cangojée` jalé`
e la e lí' laco' caliti~ lajii'~ júu^ quiá'- Fidiée` e fé'
fí' ni~ jì quiá'r- e cajme' dsea` mali~gui eáang` lí'
fé' lala: "Jii'~ cōq` móo` teáaiñ'~ ja` nijé'." ³⁷ Jogui
fé' bigui cajo lala e fí' ni~ jì jō: "Nimáam~baa' i dsea`
i líng` ee' ca'ia' dsea` quiá'-."

*Mi~ ca'áng~ Jesús**(Mt. 27:57-61; Mr. 15:42-47; Lc. 23:50-56)*

³⁸ Jo mi~ cangí e ca'ién~ Jesús ñisú^ñ, joba' ie~ jo cangó~ jaang` dseañu^ñ i sii` Sé^ i niseeng` fí' cō^o fii e sii` Arimatea, jo cangór~ cangomí^r~ dseata~ Pilato fí' e nidsijgiáaiñ' Jesús fí' lí~ táang` dseá do fí' dseⁿ crúu^ jo nidsijéeng`neiñ' fí' lí~ ni'áiñ~. Jo i Sé^ do nilíiñ' jaang` dseá quíáⁿ- Jesús, dsu^ñ jí^ñ~ la ñir' 'ñiaⁿ'bre, cō' 'gómⁿ'bre jaléngⁿ dseá Israel fíng song caliñiñ' do e nilíiñ' lajo. Jo cacuøb' dseata~ Pilato fí' lajo, jo cangób~ Sé^ e cangojgiáaiñ' Jesús fí' lí~ táang` dseá do fí' dseⁿ crúu^, jo mifíng` cangojéeiñ` dseá do fí' lí~ ca'am~biñ'. ³⁹ Jo jaang`gui i sii` Nicodemo cangór~ cajo colíng` cóo^ñ i Sé^ do fí' lí~ sing' crúu^ fí' lí~ táang` Jesús. Jo i Nicodemo do quier' jíe' ja guigui' kiil' e jmeafii jloⁿ e sicángⁿ cóo^ñ~ tú~ íngⁿ~ míí, cō^o e sii` mirra jogui cóo^ñ~gui e sii` áloe. Jo i Nicodemo la, íb i cangó~ cangosiing^v cóo^ñ~ Jesús cō^o~ néeⁿ e canuu. ⁴⁰ Jo lajob i Sé^ do cóo^ñ~gui Nicodemo cajgiám~bre Jesús fí' dseⁿ crúu^, jo mifíng` canaiñ` súuiñ~ dseá do jalé' e jmeafii do jo caquíng`neiñ' cóo^ñ~ cō^o 'mí' té e siyáⁿ e jmií jmeafii do, cō' lajob quíⁿ~ tíng` jaléngⁿ dseá Israel e jmóor` cóo^ñ~ jaléngⁿ 'líi~ quíá^r~ mí~ ni'áang~neiñ'. ⁴¹ Jo e fí' lí~ cateáaiñ~ Jesús fí' dseⁿ crúu^, fí' job nilí' cō^o dsí' iá, jo e fí' jo nisea` cō^o too` ée' e 'mí~ lí~ jí^ñ~ jaang` ja` ii` mí ca'áng~. ⁴² Jo e fí' dsí' e too` ée' do cangojéeiñ` Jesús e ni'áiñ~, dsuco' quíábⁿ~ lí~ nilí' e too` ée' do, jogui cō' nijaquíém' cajo e jmií~ e jmi'íng' dseá Israel.

*Mi~ caji'tu Jesús**(Mt. 28:1-10; Mr. 16:1-8; Lc. 24:1-12)*

¹ Jò la'uui~ jmii~ quiá'- e seamaan~ mi~ cangî e jmii~ do, e ee'bi eáang' lajee' ná'-gui e nijneá', cangó- Yá^ ì seeng' fí Magdala fí li~ ca'áng- Jesús; jò mi~ caguiér- fí jò, jòba' cangár- e nisijéb'^ e cuu~ e cajlí- e fí oo- too' e li~ ca'áng- dsea` do. ² Jò mi~ tí li~ calilí'r^ e jò` seeng' Jesús e fí dsíí' tó` éé` do, jòba' caquim'-tur güi'íí' e fí li~ guing~ Tú^ Simón colíng~gui cóo'~ ì dsea` quiá'- Jesús ì 'neáaiñ` eáang' do. Jòba' lalab cajíng'- ì Yá^ ì seeng' fí Magdala do mi~ caguiéiñ'- jò casí'-reiñ':

—Ninicaguim` dsea` Fí'naa' e fí li~ ca'áiñ- do, jò ja` ne~naa' jíé' fí li~ nicangojéiñ`.

³ Jò mi~ canúu- Tú^ Simón cóo'~gui ì dsea` rúíñ' ì jaang'gui do lajii~ júu^ e quiéé` ì Yá^ ì seeng' fí Magdala, jòba' dsifib' ca'uøøiñ` e cangolíiñ` lajminá- e fí li~ ca'áng- Jesús do. ⁴ Jò lajì huáam-bre ngolíiñ- cuiir`, lifa' ì jaang'gui do jminá-gui cangór- laco' Tú^ Simón, jòba' jéeng'guibre caguiér- e fí li~ ca'áng- Jesús do. ⁵ Jò mi~ caguiér- fí jò, dsifib' catúuiñ' jò cajóør- fí dsíí' e too' éé` do, jò cangár- e 'mi' e cabeang'- dsea` do e laco' milíib' néé', jò lifa' ja` ca'ír- e fí dsíí' too' éé` do. ⁶ Jò jiab~ cøøng' lajò caguié- Tú^ Simón, jò condséeb' ca'ír- e fí dsíí' tó` éé` do mi~ caguiér-, jòba' cangá-bre e 'mi' e cabeang'- dsea` do cajò e laco' milíib' néé'; ⁷ jøgui cangá-bir cajò e dob røø` e 'mi' e cali'íng^ ta~ e quiá'- cabé' mogui~ dsea` do, jò cangár- e ja` røø` ca' laco' røø` e 'mi' e cabeang'- dsea` do, jò tí doguijiab røø` e sibéeng' ca' laco' røø` e jò. ⁸ Jò mi~ cangî jò, ca'í- ì dsea` ì jaang'gui do ì caguié- la'uui~ e fí too' éé`

do, j̄oba' cangá-bre jalé' e calí- e fí dsí' tó' éé' do, j̄o dseáng'- jáb'- caliñ-. ⁹ J̄o dsu' i dsea' gáng- do dseáng'- ja' mí' cangám'bir laco' la fé' fí' ní' j̄i' quiá'- Fidiéé' e cajme' dsea' malii'gui eáang' lí' fé' e dseáng'- si'í'ba' e nijí'tu Jesús. ¹⁰ J̄o mi' cang' j̄o, caquim'- tu i dsea' quiá'- Jesús i gáng- do fí' quiá'r-.

Mi' cajmijnéeng' 'ñia' Jesús fí' quini' Yá' i seeng' fí' Magdala

(Mr. 16:9-11)

¹¹ J̄o mi' caguié-tu Yá' e fí' lí' ca'áng- Jesús, j̄oba' dob cajer' qui'r' fí' caluu' e too' éé' do. J̄o lajee' siñ' qui'r' dob catúuiñ' e laco' nijóør- e fí' dsí' tó' éé' do, ¹² j̄oba' cangár- e neáang' gáng- ángeles i qui' 'mi' té' e fí' dsí' tó' éé' do, j̄o jaañ' do guiiñ' lí' catiroo' mogui' Jesús j̄ogui' jaañ' do guiiñ' fí' lí' cané- tii- dsea' do. ¹³ J̄o i ángeles do cajming'r- i dseam' do j̄o casí'-reiñ':

—Janú', dseam', ¿jiali' sin' qui'?

J̄oba' cañí' i dseam' do quiá'- i ángeles do j̄o casí'-reiñ':

—Qui' i dsuco' ja' ñii- ii' n̄inicaguíng' Fíi' i ca'áang- dsea' e fí' dsí' tó' na, j̄o ja' ñii- jie' n̄icangojéeiñ' lana.

¹⁴ J̄o j̄obi lico' n̄icató' e jíñ'- e j̄o mi' tí' lí' cajing' 'ñia'r', j̄o cangáñ- Jesús e dob n̄ising' dsea' do cáaiñ', j̄o dsu' j̄ii' ja' ñir' e íb' dsea' do. ¹⁵ J̄oba' cajíng' Jesús casí'r- i dseam' do lala:

—Janú', dseam', ¿jiali' sin' qui'? ¿i' sin' 'nán' lana?

Dsu' i dseam' do í' dsíir' e i dsea' i jmóo' í' e dsí' íá' dob i sing' s̄íng' cóo'r- do, j̄oba' lalab casí'r- dsea' do:

—Janú', éé', song 'nub` nicaguiin` i Fíi` do, joba' iin`n jmeé'` jnea` júu` jie` fí' lí` nicaguijéen`re, joba' fí' job ni`nén`^nre.

16 Joba' cañí'` Jesús quiá'` i dseam` do lala jo casí'`-reiñ':

—¡Yá'!

Joba' cajing'` 'ñia'` i Yá` do jo cajíñ'` cóo'` jmí'` hebreo lala:

—¡Rabuni! —e guóng` tifa'.

17 Joba' cañí'tu Jesús quiá'` i dseam` do jo casí'`-reiñ':

—Ja` güin` jnea~, co' nabi ja` mí' cají'tu rú'`naa' cóo'` Tiquié`e. Joba' fíi`-i 'nua` lana e niguøñ` güijmeé'` júu` jaléng` dsea` i nilíng` laco'` rún`n e nijmijíng`tu rú'`naa' cóo'` i líng` Tiquié`e jogui í`bi i líng` Tiquí'`na' cajo, jo íb` Fidié` quié` e jogui íb` Fidié` quií`-na' cajo.

18 Jo mi` cang` jo, cangám'` i Yá` i seeng` fí' Magdala do jo cangojmeá'`bre júu` jaléng` i dsea` quiá'` Jesús do e nicangám`bre dsea` do jogui casí'`-bireiñ'` cajo jalé'` e júu` e ca'íñ'` quiá'` dsea` do.

Mi` cajmijnéeng` 'ñia'` Jesús fí' quini` dsea` quiá'r` (Mt. 28:16-20; Mr. 16:14-18; Lc. 24:36-49)

19 Jo mi` ca'í`- nuu` 'ñia'` ie` jmíi` jo, e jmíi` la'uii` quiá'` seamaan` do, jo ie` jo ninicasitíng` rúng` i dsea` quiá'` Jesús do fí' cóo` dsí'` 'nuu` lí` jni` røø, co'` 'góm`bre jaléng` dsea` góor` dsea` Israel fíng song calilí`^ í` e niseáng`tu rúng` i dsea` do calé'` catú'`. Jo lajee` neáng` i dsea` do, job mi` tí' lí` ca'í` Jesús fí' jo, jo casíng` 'ñia'r' guiá'`^ jóo` e lí` neáng` i dsea` quiá'r` do, jo lalab caféng`neiñ'` do jo casí'`-reiñ':

—¡Güiliseem`ba' juguiá'` júu` røø'!

20 Jo mi~ cangŕ e cajíng'~ Jesús e júu^ na, joba' canaaĩn` e'r' i dsea` quiá'r~ do fí' lí' cacuí' guotĩir~ cóo'~gui mo'uóør'. Joba' i dsea` quiá'r~ do eáam' cali'iaang` dsíir' mi~ cangáng~tur i Fiir~ do. 21 Jo mi~ cangŕ jo, lalab cajíng'~tu Jesús casí'r~ i dsea` quiá'r~ do:

—iGüiliseem`ba' juguíá~ júu^ røø! Jo lí'^ laco'gui Tiquí'ii' casíĩn` jnea~ fí' jmígüi' la, joba' lajob cajo jnea~ nisíin`n 'ná' fí' jmígüi' la.

22 Jo mi~ cangŕ jo, cajiúur~ fí' lí' neáang' i dsea` quiá'r~ do jo casí'~reiĩ':

—Íing'~na' Jmígui' quiá'~ Fidiée~. 23 Jogui doñi' ii' dsea` i ni'íing`na' dsee~ quiá'~, joba' ni'íim~ dsee~ quiá'~ i dsea` í'; jogui doñi' ii' dsea` i ja` ni'íing`na' dsee~ quiá'~, joba' ja` ni'íing` dsee~ quiá'~ i dsea` í' cajo.

Mi~ já'~ calíng~ Mó^ e cají'~tu Jesús

24 Jo jaang` dsea` guitúung` quiá'~ Jesús i siĩ` Mó^ dsea` suung~, íb` i ja` seeng` ie~ lami~ cajmijnéeng` 'ñia' Jesús jee~ i dsea` quiá'r~ do. 25 Jo mi~ cangŕ jo, lalab casí'~ i dsea` caguiaang~ do Mó^ jo cajíĩ'~:

—Nicanee~baa' Fí'inaa'.

Jo dsu' Mó^ lalab cañíir` quiá'~ i dsea` rúĩn` do jo casí'~reiĩ':

—Ja` já'~ nilíin`n e fó'na' na song ja` nimoo~o guóor` lí' caliá~ m'í'^ clavo, jogui song ja` nijnúu^u niguóo`o lacaang` lí' sicuí' quiá'r~, jogui song ja` nigüi'~i mo'uóør` e lí' caliá~ ñisú'.

26 Jo mi~ cangŕ jñiá~ jmĩ~ lajo, caseáng'~tu rúng' i dsea` quiá'~ Jesús do calé' catú~ fí' coo` sináú^ lí' sijní røø, jo ie~ jo quíim'~ Mó^ cóo'~ i dsea` rúĩn` caguiaang~gui do. Jo lajee~ job ca'í~tu Jesús fí' dsíi'

sinúu^ e li~ neáaiñ' do jo casíng'tu 'ñia'r' guiá'^ jóo',
jo lalab caféng'tureiñ' do jo cajíñ'⁻:

—¡Güiliseem`ba' juguiá⁻ júu^ røø'!

27 Jo mi~ cangî jo, lalab casí'⁻ Jesús i Mó^ do jo
cajíñ'⁻:

—Jøø⁻ guóo`o, jogui jnúu⁻ niguóo^n li~ sicuí^n
quíe⁻ e la, jogui jnúu⁻ niguóo^n e li~ sicuí^n mo'uøø⁻
la cajo. Ja`jmoo^n e ja`já'⁻ lín^n jo`já'⁻ güilín^n lana.
jneá~bi la!

28 Jo mi~ canúu⁻ Mó^ e jo, joba' cañír` quiá'⁻ Jesús
jo cajíñ'⁻:

—¡Dseáng'⁻ e`já'⁻ e`nab` Fíi` jogui` nab` Fidiéẽ
quíe⁻ e cajo!

29 Joba' cañí'tu Jesús quiá'⁻ Mó^ jo casí'r⁻ dsea`
do jo cajíñ'⁻:

—¿Su car` cañin' jnea~, joguiba'`já'⁻ calín'⁻ e
nicajíb'túu? Dsü' juguiá`gui quiá'⁻ i dsea` i`já'⁻
calíng⁻ e nicajíb'túu e jíi'~ ja`mí cangáam`bir jnea~.

E uiing~ e cajme' Juan e jì la

30 Jo lajee` cateáang⁻ Jesús fí` jmigüi` la, jmiguiab`
jalé^n e li~ e quí'r~ jmí~ cajméer` fí` quini` jaléng^n
dsea` guitúung` quiá'r⁻, jo dsü' jmiguiá`bi jalé^n e jo
ja`silí` e fí` ní` jì la. 31 Jo dsü' lajii'~ e silí` e fí` ní` jì la
nicalí⁻ e lí` laco'`já'⁻ nilíng` jaléng^n dsea` e dseáng'⁻
Jesús líiñ' i Dsea` Jmáang⁻ i nicá` nifi' quiá'⁻ dsea`
Israel jogui i línng` i Jóo' Fidiéẽ i camíng'⁻ do, jo
lajoba' jaléng^n dsea` i`já'⁻ nilíng` júu^ quiá'⁻ dsea`
do quí'⁻ jmí~ e niliseeiñ` cøøng` cóo'~ Fidiéẽ lata~.

21

Mí~ cajmijnéeng`'ñia'" Jesús fí` lí~ se'" Galilea

1 Jo mi~ cangîgui lajo, cajmijnéem` 'ñia' Jesús calé` catú~ fí' quini` guiáng~ i dsea` i la'ó' quíng'~ jee~ dsea` guitúung` quiá'r~ e fí' 'ni'` coo` guiée' lí~ sii` Tiberias e née' lí~ se' Galilea. 2 Jo i lab jaléng' i dsea` i taang~ do ie~ jo: jaaiñ' do siir` Tú` Simón, jo jaang`gui i sii` Mó` i sii`bi Dsea` Suung~ cajo, jo jaang`gui i sii` Natanael i seeng` fí' coo` fii` e sii` Caná e née' lí~ se' Galilea, jogui gáng~gui i líng' joo' jaang` dseañu' i sii` Zebedeo, jogui gáng~gui dsea` jiéng' i quíng'~ jee~ dsea` quiá'~ Jesús. 3 Jo lajee` job cajíng'~ Tú` Simón e sí'r i dsea` rúíñ' i siseáng' e fí' 'ni'` guiée' do ie~ jo, jo cajíñ'~:

—Nii`teáa ta~ sáng' 'ñu`.

Joba' cañíi` i dsea` do quiá'~ Tú` Simón jo casí'~reiñ':

—Ii~baa' dsé`ee' coo'~ 'nu` cajo.

Joba' lajob cajméer~, jo cangotáam~bre fí' coo` dsíi' móo' jo cangolíñ` fí' lí~ ni'a'gui quiá'~ e jmii` do; jo fí' job canaaiñ` bír` 'máa' quiá'r~ e nisáiñ' 'ñu`, jo dsu' e uóø` jo dseáng'~ jíi'~ camíng'~ 'ñu` ja` ii` calí'r~. 4 Jo mi~ ningóo' nijneá' e uóø` jo, jo cajmijnéeng` 'ñia' Jesús fí' quiá'~ e guiée' do, jo dsu' mi~ cangáng~ i dsea` quiá'r~ do ír', jíi'~ ja` calicuíñ` dsea` do lajminá'. 5 Joba' cajmíng'~ Jesús i dsea` do jo cajíñ'~:

—Janú'` simíng', ja` mí' lí'na' 'ñu`, ¿já` já'~?

Joba' cañíi` i dsea` quiá'r~ do jo cajíñ'~ casí'r~ dsea` do:

—U~, jíi'~ jaang` ja` ii` mí' calí'naa'.

6 Joba' cañíi`tu Jesús quiá'~ i dsea` quiá'r~ do jo cajíñ'~:

—Bíi'na' 'máa' quíi`na' fí' é'` jmii` lí'` lí' dsée' laco'` ngóo' e móo' quíi`na' na, jo mó`du' fa' ja` lí'na' 'ñu`.

Joba' lajɔb cajméé' i dsea` do, cabíbre e 'máa' quiá'r- do fí dsí' jmí; jɔ mi~ cangí jɔ, i 'leáam- 'ñu' calí'r- e jí' o' ró'r' fa' ni'òng- guir e 'máa' do dsu' e ni'ii` teáng'~ 'ñu'. ⁷ Jɔba' i dsea` quiá'- Jesús i iin~ eáang' do lalab casí'r- Tú^ Simón jɔ cajín'-:

—¡Fí'baa' i sing' dɔo-!

Jɔ dsifí mi~ calilí'^ Tú^ Simón e Fii~bre i sing' do, jɔba' lajmináb- caquí'r^ sí'r^ e ca'uò'r' lajee' jmóor` ta~, jɔ ngí jɔ canaaín` bár' jmí e nidsér- fí lí~ sing' dsea` do, jɔba' lajɔb cajméer'. ⁸ Jɔ i dsea` caguaang- gui i cóo'~ Tú^ Simón do caguilím`bre e fí 'ni' jmi' do e teáiín'~ dsí' móo' e øøiñ' e 'máa' do, co' sirøøm` teáng'~ 'ñu, jɔ huím- jiu lí~ cangobíir' e 'máa' do laco'gui 'ni' guiéé, co' tíib'jiu la cien metros. ⁹ Jɔ mi~ tí lí~ caquing'-tɔr fí uó- quiú, jɔba' cangár- coo' lí~ ninicají' dsea` jí, jɔ e fí ni~ jito' quiá'- e jí do niráang` jaang` 'ñu cóo'~ gui iñí'^. ¹⁰ Jɔ lalab cajíng'- Jesús casí'r- i dsea` quiá'r- do:

—Cuøøng-na' jaang` gáng- 'ñu i nicalí'^na' na.

¹¹ Jɔ mi~ cajíng'- Jesús lajɔ, jɔba' cajgóo- Tú^ Simón fí yá'^ e móo' do quiá'r-, jɔ ca'øøiñ' e 'máa' do dseáng'- catí ni~ tóo'~ 'ni' jmi'. Jɔ dseáng'- eáam' ii' do, co' ciento cincuenta y tres 'ñu calí'r- ie~ jɔ, jɔ jmang'- i cóøm'~ cajo; jɔ dsu' cateáb'- e 'máa' do e ja' ca'guii' nañí' fa' fím' i 'ñu do calí'r-. ¹² Jɔ mi~ calí- e jɔ, lalab cajíng'- Jesús casí'r- i dsea` quiá'r- do:

—Ñilíng-na' ñiquié'na' í' ta'é.

Jɔ jí'~ jaang` i dsea` quiá'r- do ja' teá dsíir' fa' ee` nijmingí'r- dsea` do i~ dseáng'- líng' dsea` do, co' ñi'bre e dsea` dob líng' Fíir'. ¹³ Jɔ mi~ cangí jɔ, cangoquíéng' Jesús fí quini' i dsea` quiá'r- do

jō casá'r- e iñí^ do jōguí casaiñ'- i ñu` do cajo, jō canaañ` jmóor` guié^ jee~ i dsea` quiá'r- do. Jō jalém^bre cagó'r` ie~ jō.

14 Jō cóo~ e lab catí 'ní ya' e cajmijnéeng` 'ñia' Jesús fí' jee~ dsea` quiá'r- ie~ mi~ cangí e cají'tur calé' catú-.

Mi~ casñng- Jesús cóo' Tú^ Simón

15 Jō mi~ tí lí~ cangí e cagó'r` e í' ta'é do, lalab cajmingí'- Jesús i Tú^ Simón do jō casí'r- dsea` do lala:

—Tú^ Simón, jōó' jaang` dseañu' i sii` Juan, ¿su eáang`gui 'neáan` jnea~ laco'gui i dsea` quié-e i caguiaang`gui la?

Jōba' cañíi' Tú^ Simón quiá'- Jesús jō casí'r- dsea` do lala:

—Lajōb lí' Fíi', có' ñíb^ 'nu` guiá- e 'neáam`baa 'nu`.

Jōba' cañíi'tu Jesús quiá'- Tú^ Simón jō cajíñ'-:

—Te' fñng` røø` jaléng` dsea` i líng` lafa' jo'se' jiuung` quié-e.

16 Jō mi~ cangí jō, caléb'tu cajmingí'- Jesús i Tú^ Simón do jō casí'-tur dsea` do:

—Tú^ Simón, jōó' jaang` dseañu' i sii` Juan, ¿su 'neáan` jnea~?

Jōba' cañíi'tu Tú^ Simón quiá'- Jesús jō cajíñ'-:

—Lajōb lí' Fíi', có' ñí'ba' guiá- e 'neáam`baa 'nu`.

Jō ngí jō, caléb'tu cajíng'- Jesús casí'r- dsea` do lala:

—Jmee- í' jaléng` dsea` i líng` lafa' jo'se' quié-e.

17 Jō cóo~ e la catí 'ní ya' e jmingí'- Jesús i Tú^ Simón do jō cajíng'-tur calé' catú-:

—Tú^ Simón, jōó' jaang` dseañu' i sii` Juan, ¿su 'neáan` jnea~?

Jō mi~ canúu^ Tú^ e júu^ jō calé' catú-, jōba' fi'íb^ calíiñ-, cō' cōo~ e la catí 'ní yab' e jmingí'- Jesús ír' su 'neáang' dsea` do ír'.

Jōba' cañí'tu Tú^ Simón quiá'- dsea` do jō cajíñ'-:

—Fíi'i, guiáb- dseáng'- ñí^ 'n#` lajalé', jōba' ñí^ba' e 'neáam'baa 'n#`.

Jō ngí jō, calé' catú- cañí' Jesús quiá'- Tú^ Simón jō casí'r- dsea` do lala:

—Jmee- í^ jaléng' dsea` i líng' lafa' jo'se^` quié- e.
 18 Jō e laba' jmítaa^ o', e ie~ lamí~ bí'bi a', guía'ba' guiá- quií'- e guo' jíe' fí lí~ iin'^; jō dsu' mi~ tí lí~ nídseáan'-, niníi'~ cuéé' jō dsea` jíem' niguíá- guiá- quií'-, jōguí nijéiñ- 'n#` jíe' fí lí~ ja' iin'~ guó'.

19 Jō casí'- Jesús i Tú^ Simón do lana e lí^ laco' jmóor` júu^ jial nijúung- dsea` do mi~ nití- í' lajō, jōguí nidsingíiñ'- do lajō e lí^ laco' nijmi'gó' dsea` Fidiéé' cōo' e 'mó- quiá'r- do. Jō mi~ cangí jō, cajíng'- guí Jesús casí'r- Tú^ Simón:

—¡Ja` güihuín'- cōo'~ jnea~!

I dsea` quiá'- Jesús i iñ~ eáang' do

20 Jō mi~ cangí e cajíng'- Jesús e júu^ na, jōba' caji'tu Tú^ Simón nir~ jō mífíng` cangáíñ- i dsea` quiá'- Jesús i eáang' 'neáaiñ` do e jáaiñ' do caluur~, jō i dsea` íb` cajo i caguá` cáang` Jesús ie~ mi~ cagó'r` íí can#`, jō cajmingí'r- dsea` do e i~ dseáng'- lajee' la'ó' ír' i ni'níng- ír'. 21 Jō mi~ tí lí~ cangáng-tu Tú^ Simón i dsea` do, jōba' lalab cajmingí'r- Jesús jō cajíñ'-:

—Fíi'i, jō i dseañu' i sing' la, ¿e~ nidsingíiñ-?

22 Jōba' cañí'tu Jesús calé' catú- quiá'- i dsea` do jō casí'- reiñ':

—Jo song jnea~ iin~n e seem`bi i dseañu` la cartí mi~ nigüéeng` túu fí jmi güi` la calé` catú~, joba' ¿e~ cuaiñ~ quíi~ 'nu` uii~ quíi~ i dseañu` la? Lí^ 'nu`, ja` güihuín`- cóo~ jnea~.

²³ Jo job mi~ canaang` e ngí júu^ jee~ jaléng` dsea` quíi~ Dsea` Jmáang` e i dsea` i iing~ Jesús eáang` do ja` nijúuiñ~. Jo dsu` ja` cajíng`- Jesús fa' dseáng` e ja` nijúung` i dsea` do, co' lalaba' cajíñ`-: “Song jnea~ iin~n e seeiñ` cartí mi~ nigüéeng` túu fí jmi güi` la calé` catú~, joba' ¿e~ cuaiñ~ quíi~ 'nu` faco' lajo?”

²⁴ Jo i dsea` i iing~ Jesús eáang` dob cajo, í`bing` i tíi` ni~ jalé` e cangojée` do jogui jmo`r` jalé` e júu^ la. Jogui ne~baa' røø e jmang`- júu^ já`-ba' fé`r`.

²⁵ Jo jmi güi` bi jalé` e cajmée` Jesús jíi~ laco' e silíi` e fí` ni~ jì` la, jogui faco' nilíi` fí` ni~ jì` dseáng`- lajalé` e cajméer` do, joba' jíi~ fí` jmi güi` ja` ni`í` jalé` e jì` jo faco' lajo.

Jo lanab cadséng` jalé` júu^ quíi~ Dsea` Jmáang` e cajme` Juan.

Jo lajob nilí`.

Júu 'má e cacuo fidié
New Testament in Chinantec, Comaltepec
(MX:cco:Chinantec, Comaltepec)

copyright © 2002 Wycliffe Bible Translators, Inc.

Language: Chinantec, Comaltepec

Translation by: Wycliffe Bible Translators, Inc.

Chinanteco, Comaltepec [cco], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chinantec, Comaltepec

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022
30c6f873-0dee-5863-8883-ba3c5eaa988c